

तेथ निजानंद—बहुवसा । माजि अर्जुनु तो सहसा ।
 हारतला चंद्रु जैसा । चांदिणेन ॥ २१ ॥
 आहो संग्रामु हा वाण्यां । मापें नाराजांचिया अण्यां ।
 सूनि मांस घे मवण्यां । जीवितेंसि ॥ २२ ॥
 ऐसेयांचां हिं घरिं कर्कसें । भोगिजत स्वानंदराज्य कैसें ।
 आजि भाग्यउदो हान असे । आनी ठांइ ॥ २३ ॥
 संजयो ह्मणे कौरवराया । गुणा रिझों ये रिपुचेया ।
 आणि गुरु ही हा आमचेया । सुखाचा स्वामि ॥ २४ ॥
 हा न पुसता हे गोठि । तरि देवो सोडिते कां गांठि ।
 तरि कैसेनि आह्मां भेटि । परमार्थेंसि ॥ २५ ॥
 होंतों अज्ञानाचा आंधारां । बोसंतीत जन्म वारा ।
 तें अत्मप्रकाशमंदिरा । आंतु आणिलों ॥ २६ ॥
 येवडा आह्मां तुह्मां थोरु । केला एणें उपकार ।
 ह्मणौनि हा व्याससहोदरु । गुरुत्वे होए ॥ २७ ॥
 तेविं चि संजयो ह्मणे चित्तीं । हा अतिसो या नृपती ।
 खुपैल ह्मणौनि केती । बोलों असो ॥ २८ ॥
 ऐसी बोली सांडिली । मग येरीची गोठि आदरिली ।
 जे पार्थें कां पूसिली । श्रीकृष्णातें ॥ २९ ॥
 तें चि जैसें जाणणें । तैसें मीं हीं करीन बोलणें ।
 आइकिजो ज्ञानदेउ ह्मणे । निवृत्तिचा ॥ ३० ॥
 ॐ तत्सदिति श्रीमद्भगवद्गीतासूपनिषत्सु ब्रह्मविद्यायां
 योगशास्त्रे श्रीकृष्णार्जुनसंवादे श्रद्धात्रयविभागयोगो
 नाम सप्तदशोऽध्यायः ।



ज्ञानेश्वरी

अध्याय अठरावा

श्रीगणेशायनमः ॥

जय जय देव निर्मला । निजजनाखिलमंगला ।
जन्मजराजलदजाला । प्रभंजना ॥ १ ॥
जय जय देव प्रबला । विदलितामंगलकुला ।
निगमागमद्रुमफला । फलप्रदा ॥ २ ॥
जय जय देव सकला । विगतविषयवत्सला ।
कलितकालकौतूहला । कलातीता ॥ ३ ॥
जय जय देव निश्चला । चलचित्तपानतुंडिला ।
जगदुन्मीलनाविरला । केलिप्रिया ॥ ४ ॥
जय जय देव निष्कला । स्फुरदमंदानंदबहुला ।
निरस्ताखिलामंगला । मूलभूता ॥ ५ ॥
जय जय देव स्वप्रभ । जगदंबुदगर्भनभ ।
भवनोद्भवारंभस्तंभ । भवध्वंस ॥ ६ ॥
जय जय देव शुद्ध । विदुदयोद्यानद्विरद ।
शमदममदनमदभेद । दयार्णव ॥ ७ ॥
जय जय देवैकरूप । अतिकृतकंदर्पसर्पदर्प ।
भक्तभावभुवनदीप । तापापह ॥ ८ ॥

जय जय देव अद्वितीय । परिणतोपरमैकप्रिय ।
 निजजयजितभजनीय । मायागम्य ॥ ९ ॥
 जय जय देव श्रीगुरो । अकल्पनाप्यकल्पतरो ।
 स्वसंविद्रुमबीजप्ररो—। हणावनी ॥ १० ॥
 हैं एकैक ऐसे । नाना परि भाषावसें ।
 स्तोत्र करुनि तुज दोसें । निर्विशेषा ॥ ११ ॥
 जिहि विशेषणीं विशेषिजे* । ते दृश्य नव्हे रूप तूझे ।
 हैं जाणें ह्यगौनि मी लाजें । वानणां इहीं ॥ १२ ॥
 परि मर्यादेचा सागर । हा तव तेया डगर ।
 जव नेदखे सुधाकर । उदया आला ॥ १३ ॥
 सोमकांतु निज निर्झरीं । चंद्रा अर्घ्यादीक न करी ।
 ते तो चि अवधारीं । करवी कीं जी ॥ १४ ॥
 नेणों कैसें वसंतसंगें । अवचिति झाडांचि आंगें ।
 फूटति ते तेया ही जोगें । धरणें नोहे ॥ १५ ॥
 पद्मिनी रविकिरण । लाहे मग लाजे कवण ।
 कां जलें सीतलें लवण । आंग भूले ॥ १६ ॥
 तैसा तूतें मीं जेथ स्मरें । तेथ मालातिलें जें विसरें ।
 मग जाकलिला ढेंकरें । तृप्तु जैसा ॥ १७ ॥
 मज तुवां जी केलें तैसें । माझें मीपण दवडूनि देशें ।
 स्तुतिमीसें पांचपीसें । बांधलिं वाचे ॥ १८ ॥
 ना यन्हविं तन्हि आठवीं । राहुनि स्तुति जें करावी ।
 ते गुणां गुणियां धरावी । सरोभरी ॥ १९ ॥
 तरि एकरसाचें जी तूं लिंग । केवि करुं गुणागुणि भाग ।
 मोति फोडुनु सांधितां चांग । किं तैसें चि भलें ॥ २० ॥
 जी जालेनि पाइकें आलें । ते गोसांविपण केवि बोलें ।
 ऐस उपाधि उसिटिलें । काइ वानूं ॥ २१ ॥

आणि बापु तूं माए । इहिं बोलिं ना स्तुति होये ।
 तरि डिभोपाधिकु आहे । विडालु तेथ ॥ २२ ॥
 तरि आत्मा तूं यकसरा । हें इं हणों जांतां दातारा ।
 आंतौनि बाहिरा । घापतासि ॥ २३ ॥
 हणौनि साच तुज लागि । स्तुति नेदखें जर्गी ।
 मौन वांचौनि लेणें आंगि । सूंसि नामा ॥ २४ ॥
 स्तुति काहिं न बोलणें । पूजा काहिं न करणें ।
 संनिधि केहीं न होणें । तूझां ठाई ॥ २५ ॥
 तन्हीं जीबलें जैसैं भूली । पिसे आलव घाली ।
 तैसैं वानूं तें माउली । उपसाहे तूं ॥ २६ ॥
 आतां गीतार्थाची मुदी । लावीं माझिये वागुरिझी ।
 जियां माने सभासदि । सज्जनांसि ॥ २७ ॥
 तवं हणितलें श्रीनिवृत्ती । नको हें पुडुतीं पुडुतीं ।
 परिसिं लोहघृष्टी केती । वेला कीजे गा ॥ २८ ॥
 तवं विनर्वातु ज्ञानदेउ ॥ हणें हो कां जी पसावो ।
 तरि अवधान देतु देउ ॥ ग्रंथा आतां २९ ॥
 जी गीतारत्नप्रासादाचा । कलशु अर्थार्चितामणिचा ।
 सर्वगीतादर्शनाचा । पाढावो जो ॥ ३० ॥
 लोकिं तन्हीं आथि ऐसैं । जें दूरौनि कलशु दीसे ।
 भेटी चि हातवसे । देवतेचिये ॥ ३१ ॥
 तैसैं चि एथ आहे । जें एकें चि एणें अध्यायें ।
 आघवा चि दृष्टु होए । गीतागमु हा ॥ ३२ ॥
 मी कलशु या कारणें । अठरावां अध्याउ हणें ।
 वाइला बादरायणें । गीताप्रसादासि ॥ ३३ ॥
 नाहिं कलशा परौतें काहिं । प्रासादिं काम नाहिं ।
 ते सांगतसे गीता ही । संपलेपणें ॥ ३४ ॥

व्यासु सौहार्जे सूत्रीं बली । तेणें निगमरत्नाचलिं ।
 उपनिषदाची माली । माजि खांडिली ॥ ३५ ॥
 तेथ त्रिवर्गाचा अणुआरु । आड निगाला जो अपारु ।
 तें महाभारतप्राकारु । भवंता केला ॥ ३६ ॥
 माजि आत्मज्ञानाचें एकवट । दलवाडें झाडूनु चोखट ।
 घडिलें पार्थवैकुण्ठ । संवादकुसरी ॥ ३७ ॥
 निवृत्तिसूत्रसोडवणियां । सर्वशास्त्रपुरवणियां ।
 आवो सांघिला मांडणियां । मोक्षरेखेचा ॥ ३८ ॥
 ऐसेन करितां उभारा । पन्हरा अध्याय ते पन्हरा ।
 भूमि निर्वाललेया पुरा । प्रासादु जाला ॥ ३९ ॥
 उपरि सोलावां अध्या० । तो ग्रीवघंटेचा आ० ।
 सप्तदशु तो ठा० । पडिघाणिये ॥ ४० ॥
 तेया ही वरि अष्टादशु । तो आपैसेया मांडला कलशु ।
 उपरि गीतादि किं व्यासु । ध्वजे लागला ॥ ४१ ॥
 ह्यणौनि मागील अध्याये । जे चढतेयां भूमीचे आये ।
 तेयांचें पुरें दावितु आहे । आपुलां आंगीं ॥ ४२ ॥
 जालेया कामा नाहिं चोरी । ते कलशें होये उजिरी ।
 तेवि अष्टादशु विवरीं । साद्यंत गीता ॥ ४३ ॥
 ऐसा व्यासें विंदाणियें । गीताप्रासादु सोडवणिये ।
 आणूनि रक्षिले प्राणिये । नाना परीं ॥ ४४ ॥
 एक प्रदक्षिणा जपाचिया । बाहिरौनि करिति एया ।
 एक श्रवणमीसें छाया । सेविति येयाची ॥ ४५ ॥
 एक अवधानाचा पुरा । विडा पाउड भितरां ।
 देउनि रिगति गाभारां । अर्थज्ञानाचां ॥ ४६ ॥
 ते निजबोधें उराउरी । भेटति आत्मेयां श्रीहरी ।
 परि मोक्षप्रासादिं सरी । सर्वा हीं आथि ॥ ४७ ॥

ऐसा गीतावैष्णवप्रासाद । अठरावां कलशु विशुदु ।
 मियां हणितला हा मेदु । जाणौनियां ॥ ४८ ॥
 आतां सप्तदशा पाठि । अध्या३० कैसेनि उठी ।
 तो संबधु-सांघों दीठी । दीसे तैसा ॥ ४९ ॥
 न मोडतां दोन्हीं आकार । घडलें एक शरीर ।
 हें अर्धनारीनटेश्वर । पूरें दीसे ॥ ५० ॥
 कां गंगायमुनाउदक । वोघबलें वेगलीक ।
 दावी होउनि एक । पाणीपणें ॥ ५१ ॥
 नाना वांटली दिवसें । कला बिंबि बैसे ।
 परि वेगलें जैसें । चंद्रि नाहिं ॥ ५२ ॥
 तैसीं सिनानीं च्यान्ही पदे । श्लोकु श्लोकावबोधें ।
 अध्यायो अध्यायभेदें । गमे किर ॥ ५३ ॥
 परि प्रमेयाची उजिरी । आनान रूप न धरी ।
 नाना रत्नें मणी दोरी । एकी चि जैसी ॥ ५४ ॥
 मोतियें मेलउनि बहुवें । एकावलिचा पाडु आहे ।
 परि शोभे रूप होये । एक चि जेथि ॥ ५५ ॥
 फूलां फुलसरा लेख चढे । द्रुति दूजी आंगुली न पडे ।
 श्लोक अध्याय तेणें पाडे । जाणावे हे ॥ ५६ ॥
 सातें शतें श्लोक । अध्यायां अठरांचें लेख ।
 परि दे३० बोलिले एक । जें दुजें नाहिं ॥ ५७ ॥
 मिया हिं न संडूनि ते सोए । ग्रंथा व्यक्ति केली आहे ।
 प्रस्तुत ही तेणें निर्वाहें । निरूपण आइकां ॥ ५८ ॥
 तरि सतरावां अध्या३० । पावतां पुरता ठा३० ।
 संपतां श्लोकिं दे३० । ऐसें बोलिले ॥ ५९ ॥
 अर्जुना ब्रह्मनामाचां विधि । बुद्धि सांडुनि आस्तिकी ।
 कर्म कीजति जेतुकिं । असतें होंति ॥ ६० ॥

हा आइकौनि देवाचा बोलु । अर्जुना आला डोलु ।
 ह्मणे कर्मनिष्ठा मूढ । ठेला देखों ॥ ६१ ॥
 तो अज्ञानांधु बापुडा ईश्वरू चि नेदखे एवडा ।
 तेथ नावं एक पुढां । कां सुझे तेया ॥ ६२ ॥
 आणि रजतमें दोन्हीं । गेलेयां सात्वीक श्रद्धा सानीं ।
 ते कां लागे अभिधानीं । ब्रह्माचिये ॥ ६३ ॥
 मग कोंतां खेवं देणें । वार्त्ते वरिल धावणें ।
 संडीं फडे खेलवणें । नागिणिएची ॥ ६४ ॥
 तैसिं कर्में हुवाडें । तेयां हिं जन्मांतराचि कडे ।
 दुर्मलावे यव्हडे । कर्मा माक्षि ॥ ६५ ॥
 ना विपायें उजू होए । तरि ज्ञानाची योग्यता लाहे ।
 यव्हविं येणें चि जाये । निरयासि ॥ ६६ ॥
 कर्मिं हा ठावो वेन्हीं । आहाति बहुवा अवसरी ।
 आतां कर्मठा कैची वारी । मोक्षाची एथ ॥ ६७ ॥
 तारि फीटो कर्माचा पांगु । कां जो आघवा चि त्यागु ।
 आदरिजो अव्यंगु । संन्यासु तो ॥ ६८ ॥
 कर्मबाधाची काहिं । जेथ भयाची गोठि नाहिं ।
 तें आत्मज्ञान जिहीं । स्वाधीन केलें ॥ ६९ ॥
 ज्ञानाचे आव्हान मंत्र । जें ज्ञान पीकतें सुक्षेत्र ।
 ज्ञान आकर्षिते सूत्र । तंतु जे कां ॥ ७० ॥
 दोन्हीं संन्यास त्याग । अनुष्ठूनि सूटो जग ।
 तारि आतां हे चि चांग । व्यक्ति घूसों ॥ ७१ ॥
 ऐसें ह्मणौनि पार्थे । त्यागसंन्यासव्यवस्थे ।
 रूप होआवेया जेथें । प्रभु केला ॥ ७२ ॥
 तथ प्रत्युत्तरें बोलि । श्रीकृष्णें जे सांगितली ।
 तेया भ्यक्ति जाली । अष्टादशो ॥ ७३ ॥

एवं जन्यजनकभावं । अध्यावो अध्यायातें प्रसवे ।
 आतां आइकां बरवें । प्रसिलें तें ॥ ७४ ॥
 तरि पांडुकुमरें तेणें । देवाचें सरतें बोलणें ।
 जाणौनि अंतष्करणें । काणि घेतली ॥ ७५ ॥
 यन्हविं तत्वविषिं भला । तो निश्चितु किर आहे जाला ।
 परि देऊ राहे उगला । हें साहावे ना ॥ ७६ ॥
 वत्स भालेयां हिं वरि । धेनु न वचावी दूरि ।
 अनन्य प्रीतिची परि । ऐसी चि असे ॥ ७७ ॥
 तेणें काजें विण बोलवें । तें देखिलें तन्हीं पाहावें ।
 भोगितां चाड दूणावे । पढियंतां ठाई ॥ ७८ ॥
 ऐसीं प्रेमाची जाति । पार्थु तवं ते चि मूर्ति ।
 ह्मणौनि करुं लाहे खंति । उगेपणाची ॥ ७९ ॥
 आणि संवादाचेनि मीसैं । जें अव्यवहारी वस्तु असे ।
 तें चि भोगिजे जैसैं । आरिसां रूप ॥ ८० ॥
 मग संवादु तो चि पारुखे । तरि भोगणें भोगीं थोके ।
 हें कां साहावेल मुखें । लांचावलेयां ॥ ८१ ॥
 या लागि त्याग संन्यास । पुसावेयाचें घेउनि मीस ।
 उपरतविलें दूस । गीतेचें तें ॥ ८२ ॥
 अठरावां अध्याऊ हा नोहे । हे एकाध्याई गीता चि आहे
 जें वांसुरुं चि गाये दुहे । तें वेल काइसी ॥ ८३ ॥
 तैसैं संपतां हिं अवसरि । गीता आदरविली माघारी ।
 स्वामिभृत्याचा न करी । संवादु काई ॥ ८४ ॥

अर्जुन उवाच ॥

संन्यासस्य महाबाहो तत्वमिच्छामि वेदितुं ॥
 त्यागस्य च हृषीकेश पृथक्केशिनिषूदन ॥ १ ॥

परि हें असो ऐसें । अर्जुनें प्रसिजत असे ।
 हणें विनती विश्वेशें । अवधारिजो ॥ ८५ ॥
 हां जी संन्यासु आणि त्यागु । यां दोहिं एकिं अर्थ लागु ।
 जैसा साधातु आणि संगु । संगतें बोलिजे ॥ ८६ ॥
 तैसें त्यागें आणि संन्यासें । त्यागू चि बोलिजत असे ।
 अमचेनि तव मानसें । ऐसें जाणिजे ॥ ८७ ॥
 ना काहिं आथि अर्थभेदु । तो देवो करीतु विशदु ।
 एथ हणें मुकुंदु । भिन्न चि पै ॥ ८८ ॥

श्रीभगवानुवाच ॥

काम्यानां कर्मणां न्यासं संन्यासं कथयो विदुः ॥
 सर्वकर्मफलत्यागं प्राहुस्त्यागं विचक्षणाः ॥ २ ॥
 यन्हविं अर्जुना तूष्णां मनिं । त्याग संन्यास दोन्हीं ।
 एकार्थं गमले हें मानी । मीं ही साच ॥ ८९ ॥
 किर दोहिं इहिं शद्धिं । त्यागु चि बोलिजे त्रिशुद्धी ।
 परि कारण एथ भेदीं । एतुलें चि ॥ ९० ॥
 जें निपटौनि कर्म सांडिजे । तें सांडणें संन्यासु हणिजे ।
 आणि फलमात्र कां तेजिजे । त्याग तो गा ॥ ९१ ॥
 परि कोणा कर्माचें फल । सांडिजे कोण वर्म केवल ।
 हें इं साधों विमल । चित्त दे पां ॥ ९२ ॥
 तरि आपैसेया दांगें डोंगर । झाडलीं वीति असार ।
 तैसे लांबे राजागर । नुठिति ते ॥ ९३ ॥
 न पेरितां सैब तृणें । उठिति तैसें सालिचें होणें ।
 नाहिं गा राबाउणें । जेया परीं ॥ ९४ ॥
 कां आंग जालें साहाजे । परि लेणें उद्यमें कीजे ।
 नई आपैसी आपादिजे । विहिर जेवि ॥ ९५ ॥

तैसैं नित्यनैमित्तिक । कर्म होये स्वाभाविक ।
 परि न कामितां कामिक । न निफजे जें ॥ ९६ ॥
 कामनेचें दलवाडें । जें उभावेया घडे ।
 अश्वमेधादिक फुडे । याग जेथ ॥ ९७ ॥
 बापी कूप आराम । अग्रहारें हान ग्राम ।
 आणिक ही संभ्रम । व्रतांचे जे ॥ ९८ ॥
 ऐसैं इष्टापूर्त सकल । जेया कामना एकि मूल ।
 जें केलें भोगवी फल । बांधौनियां ॥ ९९ ॥
 देहाचेया गावां आलेयां । जन्ममृत्युचेया सोहलेया ।
 ना ह्मणों नैए धनंजया । जेया परीं ॥ १०० ॥
 कां लळाटिचें लिहिलें । न मोडे काहिं केलें ।
 काले—गोरेपण धूतलें । फीटों नेणे ॥ १ ॥
 केलें काम्य कर्म तैसैं । फलभोगाचें धरणें बैसैं ।
 न फेडिता रिण जैसैं । वोसंडी ना ॥ २ ॥
 कां कामना हिं न करितां । अवसांत घडे पांडुसुता ।
 परि वायकांड न जुझतां । लागे जैसैं ॥ ३ ॥
 गुल नेणतां तोंडीं । घातला दे चि गोडी ।
 अग्नि नेणोनि राखौडी । चेंपिलें पोली ॥ ४ ॥
 काम्य कर्माचें हें एक । सामर्थ्य असे स्वभाविक ।
 ह्मणौनि नको कवतिक । मुमुक्षुं एथ ॥ ५ ॥
 किंवहुना पार्था ऐसैं । जें काम्य कर्म गा असे ।
 तें तेजिजें विष जैसैं । वोकुनियां ॥ ६ ॥
 मग तेया त्यागातें जर्गी । संन्यासु ऐसेया भंगी ।
 बोलिजे अंतरंगीं । सर्वद्रष्टां ॥ ७ ॥
 हें काम्य कर्म सांडणें । तें कामनेतें चि उपडणें ।
 धनत्यागें दवडणें । जैसैं भय ॥ ८ ॥

सोमसूर्यग्रहणें । एउनि करिति पार्वणें ।
 कां मातापितरमरणें । अंकितें जें दीस ॥ ९ ॥
 अथवा अतिथी हान पावे । ऐसां पडे जें करावें ।
 तें तें कर्म जाणावें । नैमित्तिक गा ॥ ११० ॥
 वारिषिया क्षोभे गगन । वसंतं दुणावे वन ।
 देहशृंगारीं यौवन । दशा जैसी ॥ ११ ॥
 कां सोमकांतु सोमें पाल्हाले । सूर्ये फाकति कमलें ।
 एथ असे तें चि पघलें । आन नैए ॥ १२ ॥
 तैसें नित्य जें कां कर्म । तें नैमित्तिकाचें लाहे नियम ।
 एथ उंचावें तेणें नाम । नैमित्तिक होए ॥ १३ ॥
 आणि सायंप्रातर्मध्यानीं । जें करणीय प्रतिदिन्हीं ।
 परि दृष्टि जैसी लोचनीं । अधिक नोहे ॥ १४ ॥
 कां नापादितां गति । चरणीं जैसी आथि ।
 नातरि दीप्ति । दीपबिंबि ॥ १५ ॥
 वासु नेंदितां जैसैं । चंदनीं सुगंधत्व असे ।
 अधिकाराचे तैसें । रूप चि जें ॥ १६ ॥
 नित्य कर्म ऐसें जनीं । पार्था बोलिजे तें हें मानीं ।
 एवं नित्यनैमित्तिकें दोन्हीं । दाविलिं तुज ॥ १७ ॥
 हें नित्यनैमित्तिक । अनुष्ठितां आवस्यक ।
 ह्यणौनि ह्यणों पांति एक । वांझ ययातें ॥ १८ ॥
 परि भोजनीं जैसैं होए । तृप्तिलाभें भूक जाए ।
 तैसें नित्यनैमित्तिक आहे । सर्वांगिं फल ॥ १९ ॥
 कीड आगिठां पडे । मल तूटे वानीं चढे ।
 या कर्मा तेया सांगडें । फल जाणावें ॥ १२० ॥
 जें प्रत्यवावो तवं गले । स्वाधिकार बहुवें उजले ।
 तेथ हातोफलिया मिले । सद्गतीसि ॥ २१ ॥

एवढें वेरि ढिसाळ । नित्यनैमित्तिकिं आहे फल ।
 परि त्यजिजे मूल । नक्षत्रीं जैसैं ॥ २२ ॥
 लता पीके आघवी । तवं चूतु बांधे पालवी ।
 मग हातु न लवी माधवी । सांडुनि घाली ॥ २३ ॥
 तैसी नोलांडितां रेखा । चित्त दीजे नित्यनैमित्तिका ।
 पाठि फला कीजे अशेषा । वांतिची वानी ॥ २४ ॥
 एया कर्मफलत्यागातें । त्यागु पै ह्मणति जाणते ।
 एवं संन्यास त्याग तूतें । परिसविले ॥ २५ ॥
 हा संन्यासु जें संभवे । तें काम्यबाधु न पवे ।
 निषिद्ध तवं स्वभावे । निषिद्धें गेलें ॥ २६ ॥
 आणि नित्यादिक असे । तें एणें फलत्यागें नासे ।
 शिर लोटिलेयां जैसैं । एर आंग ॥ २७ ॥
 मग सस्य फलपाकांत । तैसैं निमालेयां कर्मजात ।
 आत्मज्ञान गिवसीत । आपैसैं ए ॥ २८ ॥
 एसिया निगुती दोन्हीं । त्यागसंन्यासअनुष्ठानिं ।
 पडिले गा आत्मज्ञानीं । बांधति पाटु ॥ २९ ॥

त्याज्यं दोषवदित्येके कर्म प्राहुर्मनीषिणः ॥

यश्च दानतपःकर्म न त्याज्यमिति चापरे ॥ ३ ॥

नातारि हे निगुति चूके । मग त्यागु कीजे हाततूकें ।
 तें काहिं न त्यजे अधिकें । गोवी चि पडे ॥ १३० ॥
 जें अखद व्याधी अनोलख । तें घेतलेयां परते चि विष ।
 कां जें अन्न न मनीं भूक । तें मारी ना काई ॥ ३१ ॥
 ह्मणौनि त्याज्य जें नोहे । तेथ त्यागातें न सुआवें ।
 त्याज्या लागि नोहावें । लोभापरां ॥ ३२ ॥
 चूकलेयां त्यागाचें बेझें । केला सर्वत्यागु हो वोझें ।
 निषिद्धेंसिं सर्वत्र ज्ञे । वीतरागां ॥ ३३ ॥

एकां फलत्यागु न टके । ते कर्माते ह्यणति बंधके ।
 जैसे आपण नम्र भांडुके । जगाते ह्यणे ॥ ३४ ॥
 कां जिह्वालंपटु रोगिया । अने दुखीं धनंजया ।
 नातरि आंगें नरु कुष्टिया । मासियां कोपे ॥ ३५ ॥
 तैसें फलकामिं दुर्बल । ह्यणति कर्म कीडाल ।
 मग निर्णयो देति केवल । त्यजावें ऐसा ॥ ३६ ॥
 एक ह्यणति यागादिक । करावें आवश्यक ।
 हें वांचौनि शोधक । आन नाहिं ॥ ३७ ॥
 मनशुद्धिचां मार्गि । जें विजैयां होआवें जगीं ।
 तैं कर्मसंबंधा लागि । आलसु न कीजे ॥ ३८ ॥
 भांगार आधि शोधावें । तरि आगी जेवि नुभगावें ।
 कां आरिसेया लागि सांचावें । अधिकें रजें ॥ ३९ ॥
 ना लुगडीं चोखें होआविं । ऐसें जरि आधि जीविं ।
 तरि सवंदणि न मनावी । मलीन ऐसी ॥ ४० ॥
 तैसिं कर्म क्लेशाकारें । ह्यणौनि ने नाविं अब्हेरें ।
 कां अन्न लाभे अरुवारें । रांधितिए उणे ॥ ४१ ॥
 तरि इहिं गा शर्द्धी । एक कर्म बांधति बुद्धी ।
 ऐसा त्यागु विसंवादीं । पडौनि ठेला ॥ ४२ ॥
 परि आतां विसंवादु तो फीटे । हा त्यागाचा निश्चयो भेटे ।
 तैसें बोलों गोमटे । अवधान देइ ॥ ४३ ॥

निश्चयं शृणु मे तत्र त्यागे भरतसत्तम ॥
 त्यागो हि पुरुषव्याघ्र त्रिविधः संप्रकीर्तितः ॥ ४ ॥
 तरि त्यागु एथ पांडवा । त्रिविधु पै जाणावा ।
 तेया ही त्रिविधा बरवा । निवाडु सांघों ॥ ४४ ॥
 त्यागिचे तीन्ही प्रकार । कीजति जन्हीं गोचर ।
 तन्हीं इत्यर्थाचें सार । एतुलें एथ ॥ ४५ ॥

मज सर्वज्ञाचिये बोधी । जें अलोट माने त्रिशुद्धी ।
तें निश्चित तव आधी । विचारि पां ॥ ४६ ॥

यज्ञदानतपःकर्म न त्याज्यं कार्यमेव तत् ॥
यज्ञो दानं तपश्चैव पावनानि मनीषिणां ॥ ५ ॥

तरि आपुलिये सोडवणे । जो मुमुक्षु जागों हणने ।
तेया सर्वस्वें करणें । हें चि एक ॥ ४७ ॥
जियें यज्ञदानतपादिकें । यें कर्म आवश्यकें ।
तियें न संडाविं पांधिकें । पाउलें जैसीं ॥ ४८ ॥
हारतलें न देखिजे । तव मागु न संडिजे ।
कां न धांतां न लोटिजे । भाणें जेवि ॥ ४९ ॥
नाव थडी न पवतां । न संडिजे केलि न फलतां ।
कां ठेविलें न दिसतां । दीपु जैसा ॥ १५० ॥
तैसी आत्मज्ञानविधि । जवं निश्चिती नाहिं नीकी ।
तव न व्हावें यागादिकि । उदासीनां ॥ ५१ ॥
पैं स्वाधिकारानुरूपें । तियें दानयागतपें ।
अनुष्ठाविं आक्षेपें । अधिकें वर ॥ ५२ ॥
जें चालणें वेगावत जाए । तो वेगु बैसावेया चि होये ।
तैसा कर्मा अतिसो आहे । निष्कर्मा लागि ॥ ५३ ॥
अधिकि जवं जवं अखदी । सेवनेची मांडे बांधी ।
तव तव मूकिजे व्याधी । तेयाचिया ॥ ५४ ॥
तैसिं कर्म हातोपातीं । पैं कीजति यथानिगुती ।
तैं रजतमें झडती । दोन्हीं एथ ॥ ५५ ॥
मग पाठिचां वाटीं पुटें । भांगारा देणें घटे ।
तैं कीड झडकारि तूटे । निर्व्याज होए ॥ ५६ ॥
तैसें निष्ठा केलें कर्म । सांझुनि रजतम ।
सत्वशुद्धिचें धाम । डोलां दावी ॥ ५७ ॥

हणौनि गा धनंजया । सत्वशुद्धि गिवसी तेया ।
 तीर्थे ये सावाया । आलें कर्म ॥ ५८ ॥
 तृषार्त्ता मरुत देसी । झले अमृते वोलली जैसी ।
 कां अंधा लागि डोलांसि । सूर्यो आला ॥ ५९ ॥
 बुडतेया नइ चि धांविनली । पडतेया पृथ्वी कलवलली ।
 मरतेया मृत्यू दीधली । आयुष्यरिद्धी ॥ ६० ॥
 तैसें कर्म बांधतां । मुमुक्षू सूटले पांडुसुता ।
 जैसा रसरीती मरता । राखिला विखें ॥ ६१ ॥
 तैसिं येकी हातवटिया । कर्म केलीं धनंजया ।
 बंधकें चि सोडावेया । मुख्य होंति ॥ ६२ ॥

एतान्यपि तु कर्माणि संगं त्यक्त्वा फलानि च ॥
 कर्तव्यानीति मे पार्थ निश्चितं मतमुत्तमं ॥ ६ ॥

आतां ते चि हातवटी । तुज ही सांघों गोमटी ।
 जेया कर्मासि किरीटी । कर्म चि रूसे ॥ ६३ ॥
 तरि महायागप्रमुखें । कर्म निफजति अचुकें ।
 कर्तेपणाचें न टके । फुजणें आंगीं ॥ ६४ ॥
 जो मोले तीर्था जाये । तेयासि यात्रा करीतु आहें ॥
 ऐसिया श्लाध्यता नोहे । तोखु जिवीं ॥ ६५ ॥
 कां मुद्रा समर्थाचिया । एकटु झोंवे राया ।
 तो मीं जीणतसें येया । न ये जेवि गर्वा ॥ ६६ ॥
 जो कासे लागौनि तरे । तेया पव्हती उर्मि नुरे ।
 पुरोहितु नाविष्करे । दातेपणें ॥ ६७ ॥
 तैसें कर्तुत्व अहंकारें । नेघौनि यथावसरें ।
 कृत्यजाताचें मोहिरे । सारिजति ॥ ६८ ॥
 आणि केलें कर्म पांडवा । जो आधि फलाचा यावा ।
 तेया मोहरा न व्हावा । मनोरथु ॥ ६९ ॥

आदि चि फलि आसतूटिया । कर्म आरंभावी धनंजया ॥
 परावें बाल धाया । पाहिजे जैसे ॥ १७० ॥
 पिंपरुवांचेया आशा । न सिंपिजे पिंपळु जैसा ।
 तैसिया फलनिराशा । कौजति कर्म ॥ ७१ ॥
 सांडूनि दूधाची टकुली । गोवारी गावंधणें वेंटाली ।
 किंबहुना कर्मफली । तैसें कीजे ॥ ७२ ॥
 ऐसी हे हातवटी । घेउनि क्रिया जे उठी ।
 आपुलिया आपण गांठी । लाहे चि तो ॥ ७३ ॥
 झणौनि फलि लागु । सांडौनि देहि संगु ।
 कर्म करावि हा चांगु । निरोपु माझा ॥ ७४ ॥
 जो जीवबंधें सीणला । सूटिकि जचे आपुला ।
 तेणें पुडुती या बोला । आन न कीजे ॥ ७५ ॥

नियतस्य तु संन्यासः कर्मणो नोपपद्यते ॥

मोहात्तस्य परित्यागस्तामसः परिकीर्तितः ॥ ७ ॥

ना आंधाराचेनि रोखें । जैसीं डोलां रोविजति नाखें ।
 तैसें कर्मद्वेखें असिकें । कर्म चि सांडी ॥ ७६ ॥
 तेयाचें कर्म सांडणें । तें तामस पै मीं झणें ।
 सिसाराचां रागीं लाणें । सीस चि जैसे ॥ ७७ ॥
 हांगा मार्गु दोवाडु होए । तन्हीं निस्तरतील पाए ।
 किं ते चि खांडणें आहे । मार्गापराधें ॥ ७८ ॥
 भूकैलेया पुढील अन्न । हो कां भटेतैसें उन्ह ।
 तन्हीं बुद्धी नेघतां लंघन । कां भिवारे गा ॥ ७९ ॥
 तैसा कर्माचा बाधु कर्म । नितारिजेल करितेन वर्मे ।
 हें तामसु नेणे भ्रम । माजविला ॥ १८० ॥
 किं स्वभावं आलें विभागा । तें कर्म चि वोसंडी पै गा ।
 परि झनें आतळा त्यागा । तामसा तेया ॥ ८१ ॥

अध्याय १८ वा

दुःखमित्येव यत्कर्म कायक्लेशभयास्त्यजेत् ॥

स कृत्वा राजसं त्यागं नैव त्यागफलं लभेत् ॥ ८ ॥

अथवा स्वाधिकार बूझे । आपुलें विहित ही सूझे ।

परि करितेया उभजे । निबरपणां ॥ ८२ ॥

जें कर्म आरंभाची कड । नावं एक होये दुवाड ।

वाहांतिये वेले जड । सिदोरी जैसी ॥ ८३ ॥

निंबु जिन्हे कडुवटु । हिरडा पहिलें तूरटु ।

तैसा कर्मा सेवटु । खणुवाला होए ॥ ८४ ॥

गाई दोवाड सिंग । सेवंतिये अडव आंग ।

भोजनसुख महाग । रांधितां ठांड ॥ ८५ ॥

तैसैं पुडुतिं पुडुतिं कर्म । आरंभीं चि अतिविषम ।

हणौनि ते ते श्रम । करितां मानीं ॥ ८६ ॥

एन्हविं विहितत्वे मांडी । परि घालितां असुरवाडी ।

एथ पोललें ऐसैं सांडी । आदारिलें ही ॥ ८७ ॥

हणो वस्तु देहा सारिखी । आली बहुविं भाग्यविशेषि ।

मा जाचुकां कर्मादिंकिं । पापिया जैसा ॥ ८८ ॥

केलां कर्मिं जें देयावें । तें ज्ञनें मज होआवें ।

आजि भोगू ना बरवें । हातिचे भोग ॥ ८९ ॥

ऐसा शरीराचेया क्लेशा । भेण कर्म वीरेशा ।

सांडी तो परियसां । राजस त्यागी ॥ ९० ॥

यन्हविं तेथ ही कर्म सांडे । परि त्यागफल न जोडे ।

जैसैं उतलें आगी पडे । परि होमीं न लगे ॥ ९१ ॥

कां बुडौनि प्राण गेले । ते अधोदकीं निमाले ।

हैं हणों न ए जालें । दुर्मरण चि ॥ ९२ ॥

तैसैं देहाचेनि लोभें । जेणें कर्मा पाणी सुभे ।

साच तेणें न लभे । त्यागाचें फल ॥ ९३ ॥



भावार्थदीपिका

किंबहुना आपुलें । जें ज्ञान होये उदया आलें ।
 तें नक्षत्रांतें पाहलें । गिली जैसें ॥ ९४ ॥
 तैसिया सकारणा क्रिया । हारपती धनंजया ।
 तो कर्मत्याग ये जेया । मोक्षफलासि ॥ ९५ ॥
 तें मोक्षफल अज्ञाना । त्यागिया नाहिं अर्जुना ।
 क्षणौनि तो त्यागु न मना । राजसै ते ॥ ९६ ॥

कार्यमित्येव यत्कर्म नियतं क्रियतेऽर्जुन ॥

संगं त्यक्त्वा फलं चैव स त्यागः सात्त्विको मतः॥९॥

तरि कोणें पां एध त्यागें । मोक्षफल घर रिगे ।
 तें हिं आइक प्रसंगें । बोलिजेल ॥ ९७ ॥
 तरि स्वाधिकाराचेनि नावें । जें वांटे आलें स्वभावें ।
 तें आचरिजे गौरवें । शृंगारुनि ॥ ९८ ॥
 परि हें मिं करीतु असें । ऐसा आठौ लजी मानसें ।
 तैसें चि पाणी दे आसे । फलाचिंये ॥ ९९ ॥
 पैं अवज्ञा आणि कामना । मातेचां ठांडे अर्जुना ।
 केलीं दोन्ही पतना । हेतु होंति ॥ २०० ॥
 तरि दोन्ही इयें त्यजाविं । मग माता चि भजावी ।
 बांचौनि मुखा लागि वालावी । गाय चि सलगी ॥ १ ॥
 आवडतिये ही फलीं । असारें सालि आठोली ।
 तेया साठिं अवगाली । फलातें कोणहीं ॥ २ ॥
 तैसा कर्तृत्वाचा मदु । आणि कर्मफलिचा आस्वादु ।
 ययां दोहि चि नावं बंधु । कर्माचा किं ॥ ३ ॥
 तरि यां दोहींचां विखीं । जैसा बापु नातले लेंकी ।
 तैसा होये ना दुःखी । विहितक्रिया ॥ ४ ॥
 हा तो त्याग तरुवर । जो मोक्षफलीं ए थोर ।
 सात्त्विक ऐसा द्वाग । एयासी चि जगीं ॥ ५ ॥

बिं जादूनि चि जैसैं । झाड कीजे निर्वसैं ।

फल त्यजूनि कर्म तैसैं । त्यजिलें जेणें ॥ ६ ॥

न द्वेष्ट्यकुशलं कर्म कुशले नानुषजते ॥

त्यागी सत्वसमाविष्टो मेधावी छिन्नसंशयः ॥ १० ॥

तेया लागत खेउ परिर्सिं । धातुची गंधिकालिमा जैसी ।

जाये रजतमें तैसीं । तूटलीं दोन्ही ॥ ७ ॥

मग सत्वे तेणें चोखालें । उघडति आत्मबोधाचे डोले ।

तेथ मृगांभ सांजवेले । होये जैसैं ॥ ८ ॥

तैसा बुध्यादिकां पुढां । असतु विश्वाभासु एवडा ।

तो नेदखे कव्हणी कडां । आकाश जैसैं ॥ ९ ॥

हणौनि प्राचीनाचेनि बलें । आलिं कृत्यें कुशलाकुशलें ।

तियें व्योमाचां आंगिं अभाळें । जिराली जैसीं ॥ २१० ॥

तैसीं तेयान्निया दृष्टी । कर्में द्विष्टी चि जाली किरीटी ।

हणौनि सुखदुःखीं नुठी । पडे ना जो ॥ ११ ॥

तेणें शुभ कर्म जाणावें । मग तें हर्षें करावें ।

कां अशुभा लागि होआवें । द्वेषिया नां ॥ १२ ॥

तरि ये विषिचा काहिं । तेया एकु ही संदेहो नाहिं ।

जैसा स्वप्नाचा कां ठांड । जागिनलेयां ॥ १३ ॥

हणौनि कर्म आणि करिता । यां द्वैतभावांची वार्ता ।

नेणे तो पांडुसुता । सात्विक त्यागीं ॥ १४ ॥

न हि देहभृता शक्यं त्यक्तुं कर्माण्यशेषतः ॥

यस्तु कर्मफलत्यागी स त्यागीत्यभिधीयते ॥ १९ ॥

ऐसेनि कर्में पार्था । त्यजिलीं त्यजीति सर्वथा ।

अधिकें बांधिजति अन्यथा । सांडिलीं तारि ॥ १५ ॥

हां गा सव्यसाची । मूर्ति होउनि देहाची ।

खंति करीति कर्माची । गाबडीं नां ॥ १६ ॥

मातिएचा वीटु । घेउनि काइ करी घटु ।
 केउते तांधू पटु । सांडितील ते ॥ १७ ॥
 तेवि चि वन्हित्व आंगी । आणि ऊबे उबगणें आगी ।
 तो दीपु प्रभे लागि । द्वेषु करी काई ॥ १८ ॥
 हींगु त्रासला पां घाणी । तरि सुगंधत्व कैचें आणी ।
 द्रवण सांडुनि पाणी । कें राहे तें ॥ १९ ॥
 तैसा शरीराचेनि आभासें । नांदतु जवं असे ।
 तवं कर्मत्यागाचें पीसें । काइसें तन्हीं ॥ २० ॥
 आपण लाविजे टीला । हणौनि पुसूं ये अवलीला ।
 भा घालि फेडि निडला । कां करुं ए गा ॥ २१ ॥
 तैसें विहित स्वयें आदरिलें । हणौनि त्यजूं ये त्यजिलें ।
 परि कर्म चि देह आतलें । तें कां गा सांडे ॥ २२ ॥
 जें श्वासोश्वास वेरि । होंत निदलेया ही वारि ।
 कांहि न करणें चि परि । होंति जेयाची ॥ २३ ॥
 एया शरीराचेनि मीखें । कर्म चि लागले असिके ।
 जीतां मेलेयां न टके । इया रीती ॥ २४ ॥
 एयातें सांडिती एथ परी । एकी चि ते अवधारी ।
 करितां जाइजे हारि । फलासेचि ॥ २५ ॥
 कर्मफल ईश्वरीं अर्पे । तत्प्रसादें बोधु उद्दीपे ।
 तेथ रज्जुज्ञानें लोपे । व्यालशंका ॥ २६ ॥
 तेणें आत्मबोधें तैसें । अधिद्यासिं कर्म नासे ।
 पार्था त्यजिजे जैं ऐसें । त्यजिलें होए ॥ २७ ॥
 हणौनि इया परीं जर्गी । कर्म त्यजी तो महात्यागी ।
 एरु मूर्छने नावं रोगीं । विसांवां जैसा ॥ २८ ॥
 तैसा सीणे कर्मीं एकीं । विसांवां पांहे आणिकि ।
 खांडियांचे घाये बुकिं । धाडणें जैसें ॥ २९ ॥

परि हैं असो पुढुती । तो चि त्यागी त्रिजगती ।
जेणें फलत्यागें निष्कृती । नेलें कर्म ॥ २३० ॥

अनिष्टमिष्ट मिश्रं च त्रिविधं कर्मणः फलं ।
भवत्यत्यागिनां प्रेत्य न तु संन्यासिनां कचित् ॥ १२ ॥

यन्हवि तन्हीं धनंजया । त्रिविधा फला गा इया ।
समर्थ तें किं भोगावेया ॥ जें सांडी चि नां ३१ ॥
आपण चि वीउनि दुहिता । न मम ह्मणे पिता ।
किं तो सुटे येरु घेंता । जावाई सिरके ॥ ३२ ॥
विखाचे ही आगर वाहांती । ते वीकितां तूटले जीति ।
परि निमाले जे घेंति । वणिजूनि मोलें ॥ ३३ ॥
तैसें करितां कर्म करू । अकर्त्ता फलआशे न धरू ।
तेथ न शके आवरू । दोघां तें हिं कर्म ॥ ३४ ॥
वाटे पीकलेया रुखाचें । फल आपेक्षी तेयाचें ।
तेवि साधारण कर्माचें । फल घे तेया ॥ ३५ ॥
परि करूनि फल नेघे । तो जगाचां कर्मि न रिघे ।
जें त्रिविध जग आघवें । कर्मफल हें ३६ ॥
देव मनुष्य स्थावर । या नावं किं जगडंबर ।
तरि हें तवं त्रिप्रकार । कर्मफल पै ॥ ३७ ॥
तें चि एक गा अनिष्ट । एक तें केवल इष्ट ।
आणि एक इष्टानिष्ट । त्रिविध ऐसें ॥ ३८ ॥
परि विषमता बुद्धी । आर्गि सूनि अविधी ।
प्रवर्त्तिजे निषेधी । कुन्यापारि ॥ ३९ ॥
तेथ क्रिमि कीटक लोष्ट । हे देहलाभ होंति निष्कृष्ट ।
तेया नावं तें अनिष्ट । क्रियाफल ॥ २४० ॥
कां स्वधर्मा मानु देंतां । स्वाधिकार पुढें सूतां ।
मुक्त कीजे पूसतां । आम्नायातें ॥ ४१ ॥

तैं इन्द्रादिकां देवांचीं । देहें लाहिजति सव्यसाची ।
 तेया कर्मफलइष्टाची । प्रसिद्धि गा ॥ ४२ ॥
 आणि गोड आंबड मिले । तेथ रसांतर फरसालें ।
 उठी दोहि वेगलें । दोहीं जीणतें ॥ ४३ ॥
 रेचक चि योगवसें । होये स्तंभावेया दोसें ।
 तेवि सत्यासत्यसमरसें । असत्य जिणिजे ॥ ४४ ॥
 ह्मणौनि समभागें शुभाशुभें । मिलौनि अनुष्ठानानें उभे ।
 तेणें मनुष्यत्व लाभे । तें मिश्र फल ॥ ४५ ॥
 एवं त्रिविध या भंगीं । फल मांडले असे जर्गीं ।
 हें न संडे तेया भोगीं । सूदलें आशा ॥ ४६ ॥
 एथ जीमेचा हातु फांटे । तव जेवितां गमे गोमटें ।
 परिणामि सेवटें । विपायें मरण ॥ ४७ ॥
 सबंचोरां मैत्री चांग । जवं न पविजे तें दांग ।
 सामान्या भली जवं आंग । न सिवे तवं ॥ ४८ ॥
 तैसीं कर्म करितां शरीरीं । लाहांति महत्वाची फरारी ।
 पाठि निधनीं एकसरीं । पावति फलें ॥ ४९ ॥
 समर्थुं कां रिणियां । मार्गों आला बाइणियां ।
 न लोटे तैसा प्राणियां । पडे तो भोगु ॥ २५० ॥
 मग कणिसौनि कणु झडे । तो विरूढला कणिसा चडे ।
 पुडुतीं भुइं पडे । पुडुतीं उठी ॥ ५१ ॥
 तैसें भोगिं जें फल होए । तें फलांतरें वीत जाये ।
 चालतां पावो पायें । जीणिजे जैसा ॥ ५२ ॥
 उताराचिये सांगडी । ठाके ते ऐली चि थडी ।
 तेवि न मुकति बोढी । भोग्याचिये ॥ ५३ ॥
 पै साध्यसाधनप्रकारें । फलभोगु तो गा पसरे ।
 एवं गोबिले सबंसारें । अत्यागि ते ॥ ५४ ॥

यन्हवि जाईचेया फुला फांकणें । तेया चि नावं सूकणें ।
 तैसें कर्ममीखें न करणें । केलें जिहीं ॥ ५५ ॥
 जैं बीं चि वरोसी वेचे । तैं वाढती कुलवाडि खांचे ।
 तेवि फलत्यागिं कर्माचें । सारिलें काम ॥ ५६ ॥
 तेया सत्वशुद्धिसहकारें । गुरुकृपामृततुषारें ।
 सांसिनलेनि बोधें उ०सरे । द्वैतदैन्य ॥ ५७ ॥
 तेधवां जगदाभासमीषें । स्फुरतें त्रिविध फल नासे ।
 तेथ भोक्ताभोग्य आपैसैं । निमालें होए ॥ ५८ ॥
 घडे ज्ञानप्रधानु ऐसा । संन्यासु जेयां वीरेशा ।
 ते चि फलभोग ही सोसा । मूकले गा ॥ ५९ ॥
 आणि एणें किर संन्यासैं । जैं आत्मरूपिं दीठि पैसे ।
 तैं कर्म एक ऐसें । देखणें आहे ॥ ६० ॥
 पडौनि ठेलेयां भीति । चित्राची कीजतसे चांधी ।
 पाहालेयां राती । आंधारें उरे ॥ ६१ ॥
 जैं रूप चि नाहिं उभें । तैं साउली काह्याची शोभे ।
 आरिसेन विण बिंबे । वदन कें पां ॥ ६२ ॥
 फीटलेयां निद्रेचा ठाऊ ॥ कैचा स्वप्नासि प्रस्थाऊ ॥
 मग तें साच कां वावो । हें कोण ह्मणे । ६३ ॥
 तैसें गा संन्यासैं एणें । तव अविद्येसी चि नाहीं जीणें ।
 मां तियेचें कार्य कोणे । घेपे दीजे कर्म ॥ ६४ ॥
 ह्मणौनि संन्यासिं इए पाइं । कर्माची मातु कीजेल काइ ।
 परि अविद्या आपुलां देहीं । आहे जैसी कां ॥ ६५ ॥
 जैं कर्तेपणाचेनि थावें । आत्मा शुभाशुभीं धावें ।
 द्रिष्टि भेदाचिये राणिवे । बैसली जैसी ॥ ६६ ॥
 तैं तन्हीं गा सुवर्मा । वेगली आत्मेया कर्मा ।
 अपाडें जैसी पश्चिमा । पूर्वेंसिं कां ॥ ६७ ॥

नातरि आकाशा आणि अमाला । सूर्या आणि मृगजला ।

वेगलीक भूतला । वायुसीं जैसी ॥ ६८ ॥

पांगुरौनि नैचें उदक । असे नै चि माजि खडक ।

परि जाणसि किं वेगलीक । कोडिची तेया ॥ ६९ ॥

हो कां पाण्यां जवली । परि सिनीं चि ते बाबुली ।

काइ संगी तव काजली । दीपु हणों ए ॥ ७० ॥

जन्हीं चंद्रीं जाला कलंकु । तन्हीं चंद्रींसि न्हवे किं एकु ।

आहे द्विष्टी डोलेयां विशेकु । अपाडु जैसा ॥ ७१ ॥

नाना वाटे वाटे जांतिया । बोघा बोघीं वाहांतेया ।

आरिसा आरिसेया पाहांतेया । अपाडु जेतुला ॥ ७२ ॥

पार्था गा तेतुलेनि मानें । आत्मेनसिं कर्म सीनें ।

परि घेवविजे अज्ञानें । तें किर असो ॥ ७३ ॥

पंचैतानि महाबाहो कारणानि निबोध मे ॥

सांख्ये कृतांते प्रोक्तानि सिद्धये सर्वकर्मणां ॥ १३ ॥

विकासें रवितें उपजवी । द्रुति अलीं करवि भोगवी ।

ते सरोवरीं कां बरवी । अब्जिनी जैसी ॥ ७४ ॥

पुढुर्ती आत्मक्रिया । अन्यकारणका चि तैसिया ।

करूं पांचां हिं तेया । कारणा रूप ॥ ७५ ॥

आणि पांचै कारणें तियें । तूं हीं जाणसील विपार्ये ।

जें शास्त्रें उभूनि बाहे । बोलती तेयांतें ॥ ७६ ॥

बेदरायाचिये राजधानीं । सांख्यवेदांताचां भुवनीं ।

निरूपणाचां निसाणध्वनीं । गाजति तियें ॥ ७७ ॥

जें सर्वकर्मसिद्धी लागि । इयें चि मुदलें हो जर्गी ।

एथ न सुआवा अभंगीं । आत्मराज ॥ ७८ ॥

एया बोलाचिया डांगुरुडी । तियें प्रसिद्धि आलीं किरीटी ।

ब्रणौनि तूसा कर्णपुटी । वसों काज ॥ ७९ ॥

आनी मुखांतरि आइकिजे । ऐसैं काइसैं हें बोझें ।
 मीं चितारतून तूझें । असतां हातीं ॥ २८० ॥
 आरिसा पुढां मांडिलेयां । लोकाचेया डोलेयां ।
 मानु देयावा पावेया । आपुलें नीकें ॥ ८१ ॥
 भक्तु जेथ जैसेनि पाहे । तेथ तें तें चि होंत जाए ।
 तो मीं तूझें जालां आहे । खेलणें आजि ॥ ८२ ॥
 ऐसेनि प्रीतिचेनि वेगें । देवो बोलतां से नेघे ।
 तव आनंदा माझि आंगें । विरत एरु ॥ ८३ ॥
 चांदिणेयांचा पडिभरु । जालेयां सोमकांताचा डोंगरु ।
 विघरौनि सरोवरु । हों पाहे जैसा ॥ ८४ ॥
 ऐसैं मुख आणि अनुभूती । या भावाची मोडौनि भीती ।
 आतैल अर्जुना कृती । मुख चि जेथ ॥ ८५ ॥
 तेथ समर्थु ह्मणौनि देवा । अवकाशु जाला आठवा ।
 मग बुडतेया धावा । जीवें केला ॥ ८६ ॥
 अर्जुना एसणें ढेंढें । प्रज्ञा पसरोंसिं बुडे ।
 आलें भरितें एवढें । तें काडुनि पुडुती ॥ ८७ ॥
 देवो ह्मणे हां गा पार्था । तूं आपणपें देख सर्वथा ।
 तव श्वासौनि एरें माथा । तुकविला ॥ ८८ ॥
 ह्मणे तूं हीं जाणासि दातारा । मीं तुसीं व्यक्तिसेजारा ।
 उभगलां आदी चि एकाहारा । एउं पाहें ॥ ८९ ॥
 तेया ही हा ऐसैसा । लोभें देया जरि लालसा ।
 तरि कां हो घालितसा । आडाड जिवा ॥ ९० ॥
 एथ श्रीकृष्णु ह्मणे मीकें । आश्रुइं नव्हे मा ठाउकें ।
 वेडेया चंद्रा चंद्रिके । निमलणें आहे ॥ ९१ ॥
 आणि हा इं बोलौनि भाऊ । तुज दाउनि आह्मीं बेहों ।
 जें रुसतां बांधे ठावों । तें प्रेम गा हें ॥ ९२ ॥

एथ एकमेकाचिये खूणे । विसंवाटु तवं जीणे ।
 ह्यणौनि असो हें बोलणें । इये विषिचें ॥ ९३ ॥
 मग कैसी कैसी ते आतां । बोलत होंतों पांडुसुता ।
 सर्वकर्मभिन्नता । आत्मेनसीं ॥ ९४ ॥
 तवं अर्जुनु ह्यणे देवें । माक्षिये मनिचें चि स्वभावे ।
 प्रस्ताविलें बरवें । प्रमेय तें चि ॥ ९५ ॥
 जें सकल कर्माचें बीज । कारणपंचक तुज ।
 सांचेन ऐसी पैज । घेतली कां ॥ ९६ ॥
 आणि आत्मेयां एथ काहिं । सर्वथा लागु नाहिं ।
 हें पुढारलासि तें देइ । लाहाणें माझें ॥ ९७ ॥
 ऐया बोला विश्वेशें । ह्यणितलें तोखें बहुवसें ।
 इये विषीं धरणें बैसे । ऐसें कें जोडे ॥ ९८ ॥
 तरि अर्जुना निरूपिजैल । तें किर भाषे चि आंतुल ।
 परि मेचु इये होइजैल । रिणियां तुज ॥ ९९ ॥
 तवं अर्जुनु ह्यणे देउ । काइ विसरलेति मागील भाउ ।
 हे गोठी कीं राखत आहों । मीतूपण चि ॥ ३०० ॥
 एथ श्रीकृष्णु ह्यणति हो कां । आतां अवधाना पसरु नीका
 करुनि तुहीं आइकां । पुढारलों तें ॥ १ ॥
 तरि साच चि धनुर्द्धरा । सर्व कर्माचा उभारा ।
 होये बाहिरिवाहिरा । कारणीं पांचें ॥ २ ॥
 आणि पंचकारणदलवाडें । जेहीं कर्माकार मांडे ।
 ते हेतु ही सवंगडे । पांच आथि ॥ ३ ॥
 येर आत्मतत्व उदासीन । तें हेतु ना उपादान ।
 ना आंगें करी संवाहन । कर्मसिद्धीचें ॥ ४ ॥
 तेथ शुभाशुभीं अंशीं । निफजतां कर्मे ऐसीं ।
 रात्रिदिउ कां आकाशीं । जिया परीं ॥ ५ ॥

कां तोय तेज धूम । एयां वायुसि समागमु ।
जालेयां होये अभ्रागमु । व्योम ते नेणे ॥ ६ ॥
नाना काष्ठि नाव मिले । ते नावोडेनि चले ।
चालिजे अनिलें । उदक साक्षी ॥ ७ ॥
कां कोणें एके पिडें । वेचतां अवतरे भाडें ।
ते भवंडिजे दंडें । भ्रमे चक्र ॥ ८ ॥
आणि कर्तुत्व कुलालाचें । तेथ काइ पृथ्वियेचें ।
आधार वांचौनि वेचे । विचारि पां ॥ ९ ॥
इयें असो लोकाचिया । राहाटी होंतु आघविया ।
कोण काम सवितेया । आंगा आलें ॥ १० ॥
तैसी पंचहेतुमिलणीं । पांचें चि इहिं करणिं ।
कीजे कर्मलतांची लावणी । आत्मा सिनां ॥ ११ ॥
आतां इयें चि वेगलालीं । पांचै विवंचूं गा भलीं ।
तूकूनि घेतलीं । मोतियें जैसीं ॥ १२ ॥

अधिष्ठानं तथा कर्त्ता करणं च पृथग्विधं ॥

विविधाश्च पृथक्चेष्टा दैवं चैवात्र पंचमं ॥ १४ ॥

तैसि यथालक्षणें । आइका पां कर्मकारणें ।
तरि देह हें मीं हणें । पहिलें एथ ॥ १३ ॥
ययातें अधिष्ठान ऐसें । ह्मणिजे तें यया दोसें ।
जें स्वभोग्येसीं वसे । भोक्ता एथ ॥ १४ ॥
इंद्रियांचा दाहिं हाति । जचौनि दिवसें राती ।
सुखदुःखें प्रकृती । जोडिजति जियें ॥ १५ ॥
तियें भोगावेया पुरुषा । आनु ठावो नाहिं चि देखां ।
ह्मणौनि अनुष्ठानभाषा । बोलिजे देह ॥ १६ ॥
हें चोवीसां हिं तत्वांचें । कुटुंबघर वसतिचें ।
तूटे बंधमोक्षाचें । गूतलें एथ ॥ १७ ॥

किंबहुना अवस्थात्रया । अधिष्ठान धनंजया ।
 ह्यगौनि देहा एया । हें चि नावं ॥ १८ ॥
 आणि कर्त्ता जें दूजें । कर्माचें कारण जाणिजे ।
 प्रतिबिंब ह्यणिजे । चैतन्याचें जें ॥ १९ ॥
 आकाश चि वरिखे नीर । तेथ तलहाटीं बांधे नाडर ।
 मग बिंबौनि तदाकार । होये जेवि ॥ ३२० ॥
 कां निद्राभरें बडुवें । राया आपणपें ठाउवें नव्हे ।
 मग स्वप्निचां माये । रंकपर्णी कां ॥ २१ ॥
 तैसें आपुलेनि विसरें । चैतन्य चि देहाकारें ।
 आभासौनि आविष्करे । देहपणें जें ॥ २२ ॥
 जेया विचाराचां देशीं । प्रसिद्धी गा जीउ ऐसी ।
 जेणें भाक केली देहेंसीं । आघवां विषीं ॥ २३ ॥
 पै प्रकृति करी कर्में । तो मियां केलीं ह्यणे भ्रमें ।
 एथ कर्त्ता एणें नामें । बोलिजे जीउ ॥ २४ ॥
 मग पातेयाचां केंसीं । एकी चि उठी दीठि जैसी ।
 मोकली चवरी ऐसी । चिरिवं गमे ॥ २५ ॥
 कां घरा आंतु एकु । दीपाचा अवलोकु ।
 गवाक्षी भेदें अनेकु । आवडे जेवि ॥ २६ ॥
 तेवि बुद्धिचें एक जाणणें । श्रोत्रादिभेदें एणें ।
 बाहिरि इंद्रियपणें । फांके जें कां ॥ २७ ॥
 तें पृथग्विध करण । कर्माचें यया कारण ।
 तिसरें गा जाण । नृपनंदना ॥ २८ ॥
 आणि पूर्वपश्चिमवाहाणी । निगालेयां वोघांचिया मिलणीं ।
 होये नदीनदपाणी । एक चि जेवि ॥ २९ ॥
 कां एकाएकू चि पुरुषु जैसा । अनुव्रत नवां रसां ।
 नवविधु ऐसा । आवडों लागे ३३० ॥

तैसी चि क्रियाशक्ति पवनी । असे जे अनुपायनी ।
 ते पडिली नाना स्थानी । नाना होए ॥ ३१ ॥
 जें वाचे करी एणें । तें तें चि होये बोलणें ।
 हाता आली घेणें । देणें होए ॥ ३२ ॥
 आगा चरणाचां ठांड । तरि गति ते चि पाई ।
 अधोद्वारीं दोहीं । क्षरण ते चि ॥ ३३ ॥
 कंदौनि कां हृदय वेन्हीं । प्राणायामाची उजिरी ।
 करितां ते चि शरीरीं । प्राणु ह्मणिपे ॥ ३४ ॥
 मग ऊर्ध्वचिया रिगिनिगा । पुडुतीं ते चि शक्ति पै गा ।
 उदानु ऐसिया लिंगा । पात्र जाली ॥ ३५ ॥
 अधोरंध्राचेनि वाहें । अपानु हें नांव लाहे ।
 व्यापकपणें होये । व्यानु ते चि ॥ ३६ ॥
 आरोगिलेन रसें । शरीर भरी सरिसें ।
 नाभि न संडितां असे । सर्वसंधी ॥ ३७ ॥
 ऐसिया इया राहाटी । मग ते चि क्रिया पाठीं ।
 समानु ऐसें किरीटी । बोलिजे गा ॥ ३८ ॥
 आणि जांभै सींक ढेंकरु । ऐसैसा होंत व्यापारु ।
 नाग कूर्मु कृकरु । इत्यादि होए ॥ ३९ ॥
 एवं वायुची हे चेष्टा । एकी चि परीं सूभटा ।
 वर्त्ततां पालटा । एतसे जे ॥ ४० ॥
 ते भेदली वृत्तिपंथें । वायुक्रिया गा एथें ।
 कर्मकारण चौथें । ऐसें जाण ॥ ४१ ॥
 आणि रुतु बरवा शारदु । शारदिं पुडुतीं चंद्रु ।
 चंद्रि जैसा संबंधु । पूर्णिमेचा तो ॥ ४२ ॥
 कां वसंति बरवा आरामु । आरामि प्रियसंगमु ।
 संगमि आगमु । उपचारांचा ॥ ४३ ॥

नाना कमलीं पांडवा । विकाशु जैसा बरवा ।
 विकाशीं यावा । परागांचा ॥ ४४ ॥
 वाचे बरवें कवित्व । कवित्वीं बरवें रसिकत्व ।
 रसिकत्वीं हि परतत्व । स्पर्श जैसा ॥ ४५ ॥
 तैसी सर्ववृत्तिवैभवि । बुद्धी चि येकली बरवी ।
 बुद्धि ही बरव नवी । इंद्रियप्रौढी ॥ ४६ ॥
 इंद्रियप्रौढीमंडला । शृंगारु एकु चि लील ।
 जें अधिष्ठात्रियांचा मेला । देवांचा जो ॥ ४७ ॥
 ह्यगौनि चक्षुरादिकिं दाहें । इंद्रियपीठीं सानुग्रहें ।
 सूर्यादिकां कां आहे । सुरांचे वृंद ॥ ४८ ॥
 तें देववृंद बरवें । कर्मकारण पांचवें ।
 अर्जुना एथ जाणावें । देवो ह्यणति ॥ ४९ ॥
 एवं माने तूझी आयणि । तैसी कर्मजातांचि हे खाणी ।
 पंचविध आकरणीं । निरोपिली ॥ ५० ॥

शरीरवाङ्मनोभिर्यत्कर्म प्रारभते नरः ॥

न्याय्यं वा विपरीतं वा पंचैते तस्य हेतवः ॥ १५ ।

आतां हे चि खाणि वाढे । मग कर्माची सृष्टि घडे ।
 जिहिं ते हेतु उघडे । दाउं पांचें ॥ ५१ ॥
 तरि अवसांत आली माधवी । हेतु होये नवी पालवीं ।
 पालवीं पुष्पपुंजु दावी । पुष्प फलातें ॥ ५२ ॥
 कां वारिषिया आणजे मेघु । मेघीं वृष्टिप्रसंगु ।
 वृष्टी तव भोगु । सस्यसुखाचा ॥ ५३ ॥
 नाना प्राची अरुणातें विये । अरुणें सूर्योदयो होये ।
 मूर्यें सकल पाहे । दिवो जैसा ॥ ५४ ॥
 तैसें मन हेतु पांडवा । होये कर्मसंकल्पभावा ।
 तो संकल्प लावी दीवा । वाचेचा गा ॥ ५५ ॥

मग वाचेचा तो दिवटा । दावी कृत्यजाताचिया वाटा ।
 तेन्हां कर्ता रिगे कामठां । कर्तुत्वाचा ॥ ५६ ॥
 तेथ शरीरादिदलवाडें । शरीरादिहेतु घडे ।
 जैसें लोहकर्म लोखंडें । निर्वालिजे ॥ ५७ ॥
 कां तांथुवाचा ताणा । तांथु घालितां वोइरणा ।
 तंतुमय चि विचक्षणा । होये पट्ट ॥ ५८ ॥
 तैसें मनावाचे देहाचें । कर्म मनादि हेतु रचे ।
 रत्नीं घडे रत्नाचें । दलवाडें जेवि ॥ ५९ ॥
 एथ शरीरादिकें कारणें । तें चि हेतु केवि हें कोणें ।
 आक्षेपिजे तरि तेणें । अवधारिजो ॥ ६० ॥
 आइकें सूर्याचेया प्रकाशा । हेतुकारण सूर्यो चि जैसा ।
 कां ऊंसाचें काडें ऊंसा । वाढी हेतू ॥ ६१ ॥
 नाना वाग्देवता वानावी । तें वाचा चि लागे कामवावी ।
 कां वेदा वेदें चि बोलावी । प्रतिष्ठा जे ॥ ६२ ॥
 तैसें कर्मा शरीरादिकें । कारण हें किर ठाउकें ।
 परि हें चि हेतु न चुके । हें इ एथ ॥ ६३ ॥
 आणि देहादिकिं कारणिं । देहादिहेतु मिलणीं ।
 होये जेयां उभारणीं । कर्मजातां ॥ ६४ ॥
 तें शास्त्रार्थें मानिलेयां । मार्गानुसारें धनंजया ।
 तरि न्याय तो न्याया । हेतु होए ॥ ६५ ॥
 जैसा पर्जन्योदकाचा लोट्ट । विपायें धरी सालिचा पाट्ट ।
 जन्निह जिरे परि अचाट्ट । उपेगु आथि ॥ ६६ ॥
 कां रोसें निगालें अवचटें । पडिलें द्वारकेचिये वाटे ।
 तें सीणे तन्हीं सुनाटें । न वचती पदें ॥ ६७ ॥
 तैसें हेतुकारण मेलें । उठी कर्म आंधलें ।
 तें शास्त्रांचे लाहे डोले । तें न्याय हाणिपे ॥ ६८ ॥

ना दूध वाढिता ठाऊ न पवे । त्वं उलंडौनि जाये स्वभावे ।
 तोही वेचु पारि नोहे । वेचलें तें ॥ ६९ ॥
 तैसें शास्त्रसाहे विण । केलें नोहे अकारण ।
 तरि लंगो पां नागवण । दानलेखि ॥ ३७० ॥
 आगा बावना वर्णां परौता । कोण्हीं मंत्रु आहे पांडुसुता ।
 कां बावना हिं नुच्चारितां । जीउ आथि ॥ ७१ ॥
 पारि मंत्राची कडसणी । जवं नेणिजे कोदंडपाणी ।
 तवं उच्चारफल वाणी । न पवे जेवि ॥ ७२ ॥
 तेवि कारणहेतुयोगें । जें बीसाट कर्म निगे ।
 तें शास्त्रांचिये न लगे । कसे जवं ॥ ७३ ॥
 कर्म होतसे तेव्हां इं । पारि होणे नव्हे पाहिं ।
 तो अन्याऊ गा अन्याइं । हेतु जाणावा ॥ ७४ ॥
 एवं पंचकारणका कर्मा । पांच ही हेतु हे सुवर्मा ।
 आतां पाहे पां आत्मा । सांपडला असे ॥ ७५ ॥

तत्रैवं सति कर्तारमात्मानं केवलं तु यः ॥

पश्यत्यकृतबुद्धित्वान्न स पश्यति दुर्मतिः ॥ १६ ॥

भानु नोहुनि रूपें जैसीं । चक्षुरूपातें कां प्रकाशी ।
 आत्मा नोहुनि कर्में तैसीं । प्रकटित असे ॥ ७६ ॥
 पै प्रतिबिंब आरिसा । दोन्हीं नोहुनि वीरेषा ।
 दोहीतें प्रकाशी जैसा । निहाळिता तो ॥ ७७ ॥
 कां अहोरात्र हें साविता । नोहुनि करी पांडुसुता ।
 तैसा आत्मा कर्मकर्ता । नोहोतु दीवी ॥ ७८ ॥
 तरि देहाअहंमानभूली । जेयाची बुद्धि देह आतली ।
 जेया आत्मविषीं जाली । मध्यमरात्रि ॥ ७९ ॥
 जेणें चैतन्या ईश्वरा ब्रह्मा । देह चि केलें परम सीमा ।
 तेया आत्मा कर्ता हे प्रेमा । आलोट उपजे ॥ ३८० ॥

जें आत्मा मी कर्मातीतु । सर्वकर्मा साक्षिभूतु ।
हे आपुली कहीं मातु । नाइके चि ॥ ८१ ॥
ह्मणौनि उमपा आत्मेयांतें । देह वरि मवी येथें ।
विचित्र काइ रात्रि देहातें । डुडुल करी ॥ ८२ ॥
पैं जेणें आकाशाचा कहिं । साच सूर्यो देखिला नाहिं ।
तो थिलरिचें बिंब काई । मानूं न ल्हाए ॥ ८३ ॥
थिलराचेनि जालेपणें । सूर्यासि आणी होणें ।
तेयाचां नासिं नासणें । कपें कंपु ॥ ८४ ॥
आगा निद्रिता चे३० न ये । तवें स्वप्न साच हों ल्हाए ।
दोरी नेणतां सपें बिहे । विस्मो कवणु ॥ ८५ ॥
जवें कवलु आधि डोलां । तवें चंद्रु देखावा पीवला ।
काइ मृगीं हीं मृगजला । भावावें ना ॥ ८६ ॥
तैसें शास्त्रागुरुचेनि नावें । जो वारा ही टेंकों नेंदी सीवे ।
केवल मौढ्याचेनि जीवें । जियाला जो ॥ ८७ ॥
तेणें देहात्मदृष्टिमूलें । आत्मेयां घापे देहाचें जालें ।
जैसा अभ्रिचा वेगु कोल्हें । चंद्रीं मानी ॥ ८८ ॥
मग तेया मानणेयां साठिं । देहबंदिसाले किरीटी ।
कर्माचां वज्रगांठीं । कालासे तो ॥ ८९ ॥
पाहे पां बंधभावना दृढा । नलिये वरि तो बापुडा ।
काइ मोकलां हिं चवडां । न ठके चि पूंसा ॥ ९० ॥
ह्मणौनि निर्मले आत्मरूपीं । जो प्रकृतिचें केलें आरोपी ।
तो कल्पकोडिचां मापीं । मवी कर्म ॥ ९१ ॥

यस्य नाहंकृतो भावो बुद्धिर्यस्य न लिप्यते ॥

हत्वापि स इमां लोकान्नहंति न निबध्यते ॥ १७ ॥

आतां कर्मा माझि असे । परि तेयातें कर्म न स्पर्शें ।

वडवानलातें जैसें । समुद्रादक ॥ ९२ ॥

तैसें वेगलेपणें । जेयाचें कर्म असणें ।
 तो किर जाणावा कवणें । तन्हीं काहिं सांघों ॥ ९३ ॥
 जें मुक्तातें निर्द्धारितां । लाभे आपुली चि मुक्ता ।
 जैसें दीसे दीपु पांतां । आपुली वस्तु ॥ ९४ ॥
 नाना आरिसा जवं उटिजे । तवं आपणेयां आपण भेटिजे ।
 कां पाणी पांतां पाणीं होइजे । लवणें जेवि ॥ ९५ ॥
 हें असो परतौनि माघौतें । प्रतिबिंब पाहे बिंबातें ।
 तवं पाहाणें जाउनि आइतें । बिंब चि उरे ॥ ९६ ॥
 तैसें हारतलें आपण पावें । तैं संतातें पांतां गिवसावें ।
 क्षणौनि वानावे आइकावे । ते चि सदा ॥ ९७ ॥
 तारि कर्म असौनि कर्म । जो नावरे समविषमें ।
 चर्मचक्षूचेनि चर्म । दीठि जैसी ॥ ९८ ॥
 तैसा सोडिला जो आहे । तेयाचें रूप आतां पाहे ।
 उपपत्तिची बाहे । उभूनि सांघों ॥ ९९ ॥
 तारि अविद्येचिया नीदा । विश्वस्वप्नाचा हा धांधा ।
 भोगित होंत प्रबुद्धा । अनादि जो ॥ १०० ॥
 तो महावाक्याचेनि नावें । गुरुकृपेचेनि थावें ।
 माथां हातु ठेवणें नोहे । थापटिला जैसा ॥ १ ॥
 तैसी विश्वस्वप्नेसि माया । नीद सांडौनि धनंजया ।
 सहसा चेइला अद्वया— । नंदपणें जो ॥ २ ॥
 तेधवां मृगजलाचे पूर । दीसति एक निरंतर ।
 हारपति कां चंद्रकर । फांकतां जैसे ॥ ३ ॥
 कां बालकत्व निगौनि जाए । तैं बागुला नाहिं त्राए ।
 पै जलालेयां इंधन नोहे । इंधन जेवि ॥ ४ ॥
 नाना चेउ आलेयां पाठीं । तें स्वप्न न दिसे दीठी ।
 तैसें अहंमम गा किरीटी । नूरे चि तेया ॥ ५ ॥

मग सूर्यु आंधारा लागि । रिगो पां भलेतिये सुरंगीं ।
 पारि तो तेयाचां भागीं । नाहीं चि जैसा ॥ ६ ॥
 तैसा आत्मतत्वे वेंठला होए । तो जेया जेया दृश्यातें पाहे ।
 तें दृश्य द्रष्टेनासिं होत जाये । तेयाचें चि रूप ॥ ७ ॥
 जैसा वन्हि जेया लागे । तें वन्ही चि जालें आंगें ।
 दाह्यदाहकविभागें । सांडिजे तें ॥ ८ ॥
 तैसा कर्माकारा दूजेया । तो करितेपणांचा आत्मेया ।
 अवल्हा ॐ ये तो गेलेयां । काहिं उरे ॥ ९ ॥
 तिये आत्मस्थितिचा जो रा ॐ । तो मग जाणे देहिं इये ठावो ।
 काइ प्रलयांबुचा उमाहो । वोघु मानी ॥ १० ॥
 तैसी ते पूर्णा अहंता । कां देहपणें पांडुसुता ।
 आवरे काइ सविता । बिबें धरिला ॥ ११ ॥
 पै मथूनि लोणीं घेपे । तें माघीतें ताकीं घापे ।
 तरि तेयाचें पण सिंपे । तेणें चि काइ ॥ १२ ॥
 नाना काष्ठौनि वीरेषा । वेगलविलेयां हुताशा ।
 राहे काष्ठाचेया मांदुसा । कोंडलेपणें ॥ १३ ॥
 कां रात्रिचेया पोटा आंतु । रिगाला जो कां भास्वतु ।
 तो रात्रि ऐसी मातु । आइके काइ ॥ १४ ॥
 तैसें वेद्यवेदकपणेंसि । पडिलें जेयाचां प्राप्ति ।
 तेया देह मीं हे ऐसी । अहंता कैची ॥ १५ ॥
 आणि आकाशें जेथजेथौनि । जावें तेथ असे भरौनि ।
 ह्मणौनि ठेलें कां अडौनि । आपें आप ॥ १६ ॥
 तैसें जें तेणें करावें । तें तो चि आहे स्वभावें ।
 मा कोणहीं कर्मि वेंठावें । कर्तेपणें ॥ १७ ॥
 नूरे चि गगनाचा ठा ॐ । नव्हे चि समुद्रीं बाहो ।
 नूठी चि ध्रुवा जावों । तैसें जालें ॥ १८ ॥

ऐसेनि अहंकृतीभावो । जेयाचां बोधि जाला वा३० ।
 तन्हीं देहा जवं निर्वाहो । तवं आधि कर्म ॥ १९ ॥
 आगा वारा जन्हीं वार्जो सरे । तन्हीं तो डोलु रुंखीं उरे ।
 कां सेंदे द्रुति राहे कापुरें । वेचलेनि हीं ॥ ४२० ॥
 सरलेयां गीताचा समारंभु । न वचे राहलेपणाचा सोभु ।
 भुइं लोलौनि गेलें अंभु । बोल थारे ॥ २१ ॥
 आगा मावळलें हीं अर्के । संध्येचिये भूमिके ।
 ज्योति दीप्ति कवतिकें । दीसे जेवि ॥ २२ ॥
 पै लक्ष भेदिल्यां हिं वरि । सरु धांवे चि तवं वेन्हीं ।
 जवं आहे उजिरी । बलाची ते ॥ २३ ॥
 नाना चांकिं भांडें जालें । तें कुंभारें परौतें नेलें ।
 तन्हीं भवे चि तें मागिलें । भवंडिलेपणें ॥ २४ ॥
 तैसा देहाभिमानु गेलेयां । देह जेणें स्वभावें धनंजया ।
 जालें तो आपैसेया । चेष्टवी चि तें ॥ २५ ॥
 संकल्पें विण स्वप्न । न लवितां दांगिचें वन ।
 न रचितां गंधर्वभुवन । उठी जैसें ॥ २६ ॥
 आत्मेयांचेन उद्यमें विण । तैसें देहादिपंचकारण ।
 होये आपणेयां आपण । क्रियाजात ॥ २७ ॥
 पै प्राचीनसंस्कारशेषें । पांचै कारणें सहेतुकें ।
 कामविजति गा अनेकें । कर्माकारें ॥ २८ ॥
 तेया कर्मा माझि मग । संहारो आववें जग ।
 अथवा नवें चांग । आन करवो ॥ २९ ॥
 परि कुमुद कैसें सूके । कैसें तें कमल फांके ।
 यें दान्हीं रवी न देखे । जिया परीं ॥ ४३० ॥
 कां वीजु वरिखौनि अभाळ । ठिकरिया आंतौनि भुतल ।
 अथवा करू साडुल । प्रसन्ना वृष्टी ॥ ३१ ॥

परि तेयां दोहीतें जैसें । नेणिजे कां आकाशें ।
 तैसा चि देहीं जो असे । विदेहदृष्टी ॥ ३२ ॥
 तो देहादिकिं चेष्टीं । घडतां मोडतां हिं सृष्टी ।
 न देखे स्वप्न किरीटी । चेइला जैसा ॥ ३३ ॥
 यन्हविं चामाचे डोले वेन्हीं । जे देखति देहधारी ।
 तें किर तो व्यापारीं । ऐसें चि मानीति ॥ ३४ ॥
 काइ तणाचा बाउला । जो आगरा मेरे ठेविला ।
 तो साचू चि राखता कोल्हां । मानिजे नां ॥ ३५ ॥
 पिसेया नेसलें नागिवें । हें लोकिं येउनि जाणावें ।
 ठणौरियाचे मवावे । आणिकिं घाये ॥ ३६ ॥
 कां महासतीयेचे भोग । देखे किर आघवें जग ।
 परि ते आगि ना आंग । ना लोकु देखे ॥ ३७ ॥
 तैसा स्वस्वरूपें उठिला । जो दृश्येंसिं द्रष्टा आटला ।
 तो नेणे काइ राहाटला । इंद्रियप्राप्त ॥ ३८ ॥
 आगा थोरीं कळोलीं साने । लोपतां तिरिचेनि जनें ।
 एकिं एक गीलिलें हें मनें । मानिजे जन्हीं ॥ ३९ ॥
 तन्हीं पाणियां कडे पाहिं । कोणहीं गीलितसे काइ ।
 तैसें पूर्णा दूजे नाहिं । जें तो मारी ॥ ४० ॥
 सोनेयांची कां चंद्रिका । सुवर्णसूळें चि देखां ।
 सोनेयांचिया महिषा । नाशु केला ॥ ४१ ॥
 तो देवलविसेंया कडां । व्यवहार गमला फुडा ।
 वांचौनि सूळ महिषु चामुंडा । सोनें चि असे ॥ ४२ ॥
 पै चित्रिचें पाणी हुताशु । तो दीठी चि भागु आभासु ।
 पटिं आगि ना वोल्हासु । दोन्ही नाहिं ॥ ४३ ॥
 मुक्ताचें देह तैसें । हालत संस्कारवसें ।
 देखौनि छोक पीसे । कर्त्ता क्षणती ॥ ४४ ॥

आणि तेया करणेयां आंतु । घडे तिहिं लोकां घातु ।
 परि तेणें केला हे मातु । बोलों नैए ॥ ४५ ॥
 तवं आंधारु चि देखावा तेजें । मा तें फेडि हें केवि बोलिजे ।
 तैसें ज्ञानियां नाहिं दूजें । करील काई ॥ ४६ ॥
 ह्मणौनि तेयाची बुद्धि । नेणे पापपुण्याची गंधि ।
 गंगा मीनलेयां नदी । विटालु जैसा ॥ ४७ ॥
 आगी आणि लागलेयां । काहिं पोले धनंजया ।
 किं शस्त्र रूपें आपणेयां । आपणचि काइ ॥ ४८ ॥
 तैसें आपणपेयां परौतें । जो नेणे क्रियाजातातें ।
 तेथ काइ लिपवी बुद्धितें । तेयाचिये ॥ ४९ ॥
 ह्मणौनि कार्यकर्ताक्रिया । हें स्वरूप चि जालें जेया ।
 नाहिं शरीरादिकिं तेया । कर्मबंधु ॥ ४५० ॥
 जें कर्ता जीउ विंदाणीं । काढौनि पांचै खाणी ।
 घडीत आहे करणीं । आउतीं दाहें ॥ ५१ ॥
 तेथ न्याउं आणि अन्याउं । हा द्विविधु साधूनि आवो ।
 उभितां न लवी ठेउं । कर्मभुवनें ॥ ५२ ॥
 या थोराडा किर कामां । विरजा नोहे का आत्मां ।
 परि ह्मणसी हान उपक्रमां । हातु लावी ॥ ५३ ॥
 तो साक्षी चिद्रूप । कर्मप्रवृत्तिचा संकल्पु ।
 उठी तो कां निरोपु । आपण चि दे ॥ ५४ ॥
 तरि कर्मप्रवृत्ती ही लागि । तेया आयासु नाहिं आगीं ।
 जे प्रवृत्तिचे उलगीं । लोक चि आथि ॥ ५५ ॥
 ह्मणौनि आत्मेयाचें केवल । जो रूप चि जाला निर्मल ।
 तेया नाहिं बंदिसाल । कर्माची हे ॥ ५६ ॥

ज्ञानं ज्ञेयं परिज्ञाता त्रिविधा कर्मचोदना ॥

करणं कर्म कर्त्तेति त्रिविधः कर्मसंग्रहः ॥ १८ ॥

प्ररि अज्ञानाचां पटीं । अन्यथाज्ञानाचें चित्र उठी ।
 तेथ चि तारणी हे त्रिपुटी । प्रसिद्ध जे ॥ ५७ ॥
 तें चि ज्ञाताज्ञानज्ञेय । हें जें जगाचें बीजत्रय ।
 तें कर्मा चि निसंदेह । प्रवृत्ति जाण ॥ ५८ ॥
 आतां या चि गा त्रया । व्यक्ती वेगलालिया ।
 आइकें धनंजया । करूं रूप ॥ ५९ ॥
 तरि जीवसूर्यबिंबिचे । जे रश्मि श्रोत्रादिकि पांचें ।
 धावौनि विषयपद्माचे । फोडिति मढ ॥ ६० ॥
 कां जीवन्मुक्ताचे उपलाने । घेउनि इंद्रियाचि केंकाणें ।
 विषयदेशिचिये नागवणे । आणित्ती जे ॥ ६१ ॥
 हें असो इंद्रिय राहाटे । जें सुखदुःखासीं जीवा भेटे ।
 ते सुषुप्तिकालीं वावाटे । जेथ ज्ञान ॥ ६२ ॥
 तेया जीवा नावं ज्ञाता । आणि हें जें सांघितलें आतां ।
 तें चि एथ पांडुसुता । ज्ञान जाण ॥ ६३ ॥
 जें अविद्येचिये पोटीं । उपजत खेळुं किरीटी ।
 आपणेंयातें वांटी । तिहिं ठांइ ॥ ६४ ॥
 आपुलिये धांवें पुढां । वाळुनि ज्ञेयाचा गुढा ।
 उभारी मागिला कडां । ज्ञातृत्वातें ॥ ६५ ॥
 ज्ञातेया ज्ञेया दोषां । तो नांदुणुकेचा बगा ।
 माजि जालेनि पै गा । वाहे जेणें ॥ ६६ ॥
 टाकूनि ज्ञेयाची सीवं । पुरे जेयाची धावं ।
 सकलपदार्था नावं । सूतसे जें ॥ ६७ ॥
 तें गा सामान्यज्ञान । एथ नाहिं आन ।
 ज्ञेयाचें हिं चिन्ह । आइक आतां ॥ ६८ ॥
 तरि शब्दस्पर्श । रूपगंधरसु ।
 हा पंचविध आभासु । ज्ञेयाचा जो ॥ ६९ ॥



भाषार्थदीपिका

जैसें एके चि चुतफले । इंद्रियां वेगलवेगलें ।
 रसें वर्णे परिमलें । भेटिजे स्पर्शें ॥ ४७० ॥
 तैसें ज्ञेय तरि एकसरें । परि ज्ञान इंद्रियद्वारे ।
 घे ह्यणौनि प्रकारें । पांचें जालें ॥ ७१ ॥
 आणि समुद्रीं वोघांचें जाणें । सरे लाणी पासिं धावणें ।
 कां फलिं सरे वाढणें । सस्याचें जेवि ॥ ७२ ॥
 तेवि इंद्रियांचां वाटीं । धावं तेया ज्ञानासि जेथ ठी ।
 होये तें गा किरीटी । विषयज्ञेय ॥ ७३ ॥
 एवं ज्ञातेया ज्ञाना ज्ञेया । तिहिं रूप केलें धनंजया ।
 ते हे त्रिविध सर्वक्रिया— । प्रवृत्ति जाण ॥ ७४ ॥
 जें शब्दादिविषय । हें पंचविध ज्ञेय ।
 तें चि प्रिय कां अप्रिय । एकी परिचें ॥ ७५ ॥
 ज्ञान मोटकें ज्ञातेया । डावी ना जवं धनंजया ।
 तवं स्वीकारा कां त्यजावेया । प्रवर्त्ते चि तो ॥ ७६ ॥
 परि मीनातें देखौनि बकु । जैसा निधानातें रंकु ।
 कां स्त्री देखौनि कामिकु । प्रवृत्ति धरी ॥ ७७ ॥
 जैसें खोलां धांवे पाणी । भवंरु फुलाचिये वाहाणी ।
 नाना सूटला सांजवणी । वत्सू चि पां ॥ ७८ ॥
 आगा स्वर्गिची उर्वशी । आइकौनि जेवि माणुसिं ।
 वरता लागति आकाशीं । यागाचिया ॥ ७९ ॥
 पै पारिवा जैसा किरीटी । चडला नभाचिये पोटीं ।
 पारिवी देखौनि लोटी । आंग सगलें ॥ ४८० ॥
 हें ना घनगर्जिता सरिसा । मोरु वोवांडे आकाशा ।
 ज्ञाता ज्ञेय देखौनि तैसा । धावं चि घे ॥ ८१ ॥
 ह्यणौनि ज्ञानज्ञेयज्ञाता । हें त्रिविध गा पांडुसुता ।
 होये चि कर्मा समस्तां । प्रवृत्ति एथ ॥ ८२ ॥

अध्याय १८ वा

तरि तें चि ज्ञेय विपायें । जारि ज्ञातेयाचें प्रिय होये ।
 तरि भोगावेया न साहे । क्षणु हिं भरि ॥ ८३ ॥
 नातरि अवचटे । तें वीरू होउनि भेटे ।
 तरि युगांत वाटे । सोडावेया ॥ ८४ ॥
 व्याला कां हारा । वरिपडा जालेयां नरा ।
 हरिखु आणि दरारा । सारिंसा चि उठी ॥ ८५ ॥
 तैसें ज्ञेयें प्रियाप्रियें । देखौनि ज्ञातेया होये ।
 मग त्याग स्वीकारीं बाहे । व्यापारतें ॥ ८६ ॥
 तेथ रागीं प्रतिमल्लाचां । गोसांविं सर्वदलाचा ।
 रथु सांडूनि पायांचा । होये जैसा ॥ ८७ ॥
 तैसें ज्ञातेपण जें असे । तें ए कर्त्ता ऐसिये दशे ।
 जेवितें बैठलें जैसें । रंधन करु ॥ ८८ ॥
 कां भवरें चि केला मला । वोरकलू चि जाला आंकसाला ।
 नाना देऊ रिगाला देउला— । चेया कामां ॥ ८९ ॥
 तैसा ज्ञेयाचिया हावां । ज्ञाता इंद्रियांचा मेलावा ।
 राहाटवी तेथ पांडवा । कर्त्ता होए ॥ ९० ॥
 आणि आपण चि होउनि कर्त्ता । ज्ञाना आणी करणता ।
 तेथ ज्ञेय चि स्वभावता । कार्य होये ॥ ९१ ॥
 ऐसा ज्ञानाचिया युगुती । पालटु पडे गा सुमती ।
 डोलेयांची शोभा राती । पालटे जैसी ॥ ९२ ॥
 कां अदृष्ट जालेयां उदासु । पालटे श्रीमंतांचा उल्हासु ।
 पुनिचे पाटीं शीतांशु । पालटे जैसा ॥ ९३ ॥
 तैसें चालितां करणें । ज्ञाता वेठिजे कर्त्तेपणें ।
 तेथिचीं हीं लक्षणें । आइक आतां ॥ ९४ ॥
 तरि बुद्धि आणि मन । चित्त अहंकार हान ।
 हें चतुर्विध चिन्ह । अंतष्करणाचें ॥ ९५ ॥

बाहीरि त्वचा श्रवण । चक्षु रसना घ्राण ।
 हें पंचविध जाण । ज्ञानेन्द्रिय गा ॥ ९६ ॥
 तेथ आंतुलें तव करणें । कर्त्ता कर्त्तव्या घे उमाणें ।
 मग तें चि जरि जाणें । सुखा येतां ॥ ९७ ॥
 तरि बाहिरिलें तियें हीं । चक्षुरादिकें दाही ।
 उठूनियां लवलाहीं । व्यापारा सुए ॥ ९८ ॥
 मग तो इन्द्रियकंदवु । करविजे तव रावु ।
 जव कर्त्तव्याचा लासु । हातासि ए ॥ ९९ ॥
 नातरि कर्त्तव्य जरि दुःखें । फलेंल हान ऐसें देखे ।
 तरि लावी त्यागमुखें । तियें चि दाही ॥ ५०० ॥
 मग फीटे दुःखाचा ठाऊ । तव राहाटवी रातिदिऊ ।
 विकणु आतें राऊ । जिया परीं ॥ १ ॥
 तैसेनि त्यागस्वीकारीं । वाहातां इन्द्रियाचां धुरीं ।
 ज्ञातेयातें अवधारीं । कर्त्ता ह्यणिपे ॥ २ ॥
 आणि कर्त्तेयाचां सर्वकर्मी । आउतांचिया परी क्षमी ।
 ह्यणौनि इन्द्रियातें आहीं । करणें ह्यणों ॥ ३ ॥
 आणि हें चि करण वेरी । कर्त्ता क्रिया जे उमारी ।
 तिया व्यापे तें अवधारीं । कर्म एथ ॥ ४ ॥
 सोनाराचिया बुद्धी लेणें । व्यापे चंद्रकरीं चांदिणें ।
 कां वेल्हालपणें । वेलि जैसी ॥ ५ ॥
 नाना प्रभा व्यापे प्रकाशु । गोडिया इक्षुरसु ।
 हें असो अवकाशु । आकाशें जैसा ॥ ६ ॥
 तैसें कर्त्तेयाचिया क्रिया । व्यापलें जें धनंजया ।
 तें कर्म गा बोलावेया । नाही आन ॥ ७ ॥
 एवं कर्त्ताकर्मकरण । इयां तिद्धिचें हें लक्षण ।
 दाविलें तुज विचक्षण— । शिरोमणी ॥ ८ ॥

ज्ञानं कर्म च कर्त्ता च त्रिधैव गुणभेदतः ॥
प्रोच्यते गुणसंख्याने यथावच्छुणु तान्यपि ॥

एथ ज्ञाताज्ञानज्ञेय । हें कर्माचें प्रवृत्तित्रय ।
तैसें चि कर्त्ताकरणकार्य । हा कर्मसंचयो ॥ ९ ॥
विहिं वेठला ऐसा धर्म । आथि बीजि जेवि द्रुमु ।
कां मनीं जोडे कामु । सदा जैसा ॥ ५१० ॥
तैसें कर्त्ताक्रियाकरणी । कर्माचें असे जितवणी ।
सोनें जैसें खाणी । सोनेयांचिये ॥ ११ ॥
हणौनि हें कार्य मीं कर्त्ता । ऐसें आथि जेथ पांडुसुता ।
तेथ आत्मा दूरिं समस्तां । क्रियां पासिं ॥ १२ ॥
या लागि पुडुतीं । आत्मा वेगला चि सुमती ।
आणि असो हें केती । जाणतासि तूं ॥ १३ ॥
परि सांधितलें जें ज्ञान । कर्म हें कर्त्ता हान ।
तें तिहिं ठांडं भिन्न । गुणीं आथि ॥ १४ ॥
हणौनि ज्ञानकर्मकर्त्तेया । पांती एउ न ये धनंजया ।
जें दोनि बांधति सोडावेया । एक चि प्रौढ ॥ १५ ॥
तें सात्विक होआवें ठाउवें । गुणभेदु सांघों पाहे ।
जो सांख्यशास्त्रि आहे । उवाइला ॥ १६ ॥
जें विचारा क्षीरसमुद्र । स्वबोधकुमुदिनीचंद्र ।
ज्ञानडोलसां नरेंद्र । शास्त्रांचें जें ॥ १७ ॥
किं प्रकृतिपुरुषें दोन्हीं । मिसलीं दिवोरजनी ।
तियें निवडितां त्रिभुवनीं । मार्तंड जें ॥ १८ ॥
जेथ अपारमोहरासी । तत्वाचां मापीं चौविसीं ।
उमाणें घेउनि परेसीं । सुरवाडिजे ॥ १९ ॥
अर्जुना तें सांख्यशास्त्र । पढे जेयाचें स्तोत्र ।
तें गुणभेदविचित्र । ऐसें आहे ॥ ५२० ॥

जें आपुलेनि अंगिकें । त्रिविधपणाचेनि अंकें
 दृश्यजात तेतुकें । अंकित केलें ॥ २१ ॥
 एयां सत्वरजतमां । तिहिं एवडी असे महिमा ।
 जें त्रिविध आदिब्रह्मा । अतिक्रमीं ॥ २२ ॥
 परि विश्विची आघवी मांदा । जेणें भेदलेनि गुणभेदीं ।
 पडिली तें तवं आदीं । ज्ञान सांघों ॥ २३ ॥
 जें दीठी जरि चोख कीजे । तरि भलेतें चोख चि सुझे ।
 तैसें ज्ञानें शुद्धें लाहिजे । सर्वें शुद्ध ॥ २४ ॥
 ह्मणौनि तें सात्विकज्ञान । आतां सांघों दे अवधान ।
 केवल्यगुणनिधान । श्रीकृष्ण ह्मणे ॥ २५ ॥

सर्वभूतेषु येनैकं भावमव्ययमीक्षते ॥
 अविभक्तं विभक्तेषु तज्ज्ञानं विद्धि सात्त्विकं ॥ २० ॥
 तरि अर्जुना गा तें फुडें । सात्विकज्ञान चोखडें ।
 जेयाचां उदई ज्ञेय बुडे । ज्ञातेनसिं ॥ २६ ॥
 जैसा सूर्यो नेदखे आंधारें । सरिता नेणिजति सागरें ।
 कां कवळियां न धरे । आत्मछाया ॥ २७ ॥
 तिया परीं जिया ज्ञाना । शिवादि तृणावसाना ।
 इया भूतव्यक्ती भिन्ना । नाडलति ॥ २८ ॥
 जैसें हातें चित्र पांतां । होये पाणियें मीठ धूतां ।
 कां चेउनि स्वप्ना येतां । जैसें होये ॥ २९ ॥
 तैसें ज्ञानें एणें । करितां ज्ञातव्याचें पाहाणें ।
 न जाणतां न जाणणें । जाणावें उरे ॥ ५३० ॥
 पै सोनें आटौनि लेणीं । न कढीति आपुलेया आणी ।
 कां तरंग न घेपति पाणीं । गाळनि जैसें ॥ ३१ ॥
 तैसी ज्ञेयाज्ञानाचेया हाता । न लगे हे दृश्यपथा ।
 तें ज्ञान जाण सर्वथा । सात्त्विक गा ॥ ३२ ॥

आरिसा पाॐ जातां कोडें । जैसे पातें चि रिघे पुढें ।
तैसें ज्ञेय लोटूनि पडे । ज्ञाता चि जें ॥ ३३ ॥
पुडुतीं तें चि सात्विकज्ञान । जें मोक्षलक्ष्मीचें भुवन ।
हें असो आइकें चिन्ह । राजसाचें ॥ ३४ ॥

पृथक्त्वेन तु यद्ज्ञानं नानाभावान्पृथग्विधान् ॥
वेत्ति सर्वेषु भूतेषु तद्ज्ञानं विद्धि राजसं ॥ २१ ॥

पारि पार्था परियस । तें ज्ञान राजस ।
जें भेदाची कास । धरूनि चाले ॥ ३५ ॥
विचित्रता भूतांचिया । आपण आंतूनि ठीकरीया ।
बहुचक्रे ज्ञातेया । आणिली जेणें ॥ ३६ ॥
जैसें साचा रूपा आड । घाटूनि विसराचें कवाड ।
मग स्वप्निचें कावाड । वोडरी निद्रा ॥ ३७ ॥
तैसें स्वज्ञानाचिये पौली । बाहिरि मिथ्याचां महाखेली ।
तिहिं अवस्थांचिया बाहली । दात्री जें जीवा ॥ ३८ ॥
अलंकारपणें ज्ञांकलें । बोला सोनें कां वायां गेलें ।
तैसें नामरूपिं दुराविलें । अद्वैत जेया ॥ ३९ ॥
अवतरली गाडुवां घडां । पृथ्वी अनोलख जाली मूढां ।
बन्धि होउनि ठेला कानबडा । दीपा साठि ॥ ५४० ॥
कां वस्त्रपणाचेनि आटोपें । मूर्खां प्रति तंतु हारपे ।
नाना मुग्धां पटु लपे । दाउनि चित्र ॥ ४१ ॥
तैसी जेया ज्ञाना । जाणौ भूतव्यक्ती भिन्ना ।
ऐक्यबोधाची वासना । निमौनि गेली ॥ ४२ ॥
मग इंधनीं भेदला अनल । फुला वरि परिमल ।
कां जलभेदें सकल । चंद्रु जैसा ॥ ४३ ॥
तैसे पदार्थभेद बहुवस । जाणों लाहान वेस ।
आंतलें तें राजस । ज्ञान एथ ॥ ४४ ॥

एदत्कृत्स्नवदेकस्मिन्कार्ये सक्तमहैतुकं ॥

अतत्त्वार्थवदल्पं च तत्तामसमुदाहृतम् ॥ २२ ॥

आतां तामसाचें लिंग । सांघेन उल्लख चांग ।
 डावलावेया मातंग— । सदनु जैसे ॥ ४५ ॥
 तरि किरीटी जें ज्ञान । हिंडे विधीचेनि वस्त्रें हीन ।
 भ्रुति पाठिमोरी नग्न । हणौनि तेया ॥ ४६ ॥
 येरिं ही शास्त्रबहिकरीं । जें निंदेचे इटाल वेन्हीं ।
 बोलविलेंसे डोंगरीं । म्लेंछधर्माचां ॥ ४७ ॥
 जें गा ज्ञान ऐसें । गुणाग्रहें तामसें ।
 घेतलें भवे पीसैं । होउनियां ४८ ॥
 जें सोडरींके बंधु नेणे । पदार्थी निषेध न हणने ।
 निरोविलें जैसें सुणें । सुना गावीं ॥ ४९ ॥
 तेया तोंडिं जें नाडले । कां खातां जेणें पोले ।
 तें चि एक वाले । एर घे चि ॥ ५० ॥
 पै सोनें चोरितां उंदिरु । न हणने थरुविथरु ।
 नेणे मांसखाइरु । कालें गोरें ॥ ५१ ॥
 नाना वना माझि बोहिरी । कडसणी जेवि न करी ।
 कां जीत मेलें न विचारी । बैसतां मासी ॥ ५२ ॥
 आगा वांती वाढलेया । साजुकां कां सडिलेयां ।
 विनेकु काउलेया । नाहिं जैसा ॥ ५३ ॥
 तैसें निषिद्ध सांडुनि जावें । कां विहित आदरें घेयावें ।
 हें विषयांचेनि नावें । नेणे चि जें ॥ ५४ ॥
 जेतुलें आड पडे दीठी । तेतुलें घे विषयां साठीं ।
 मग स्त्री द्रव्य वांटी । सिष्णोदरीं ॥ ५५ ॥
 तीर्थ अतीर्थ हे भाषा । उदकिं ना सनोलख ।
 ताहान बोले तें सुख । वांचूनियां ॥ ५६ ॥

तेया चि परीं खाद्याखाद्य । न न ह्यणे निवार्निद्य ।
 तोंडा आवडे तें मेध्य । ऐसा बोधु ॥ ५७ ॥
 आणि स्त्रीजात जेतुके । त्वगिन्द्रिय चि उल्लखे ।
 तिये विखिं सोइरिके । एकु चि बंधु ॥ ५८ ॥
 पै स्वार्था जें उपकरे । तेया चि नाव सोयरे ।
 देहसंबंधु न सरे । जिये ज्ञानि ॥ ५९ ॥
 मृत्युचें आघवें चिन्ह । आघवें चि आगी इंधन ।
 तैसें जग चि आपुलें धन । तामसाज्ञानां ॥ ५६० ॥
 ऐसेनि विश्व सकल । जे विखा आंतुलें केवल ।
 तेया एक जाणे फल । देहभरण ॥ ६१ ॥
 आकाशपतिता नीरा । जैसा सिंधू चि एकु थारा ।
 तैसें कृत्यजाता उदरा । लागि चि बुझे ६२ ॥
 वांचूनि स्वर्ग नरक आथि । तेया हेतू प्रवृत्तिनिवृत्ति ।
 इये अवघिये चि राती । जाणीवेचि ते ॥ ६३ ॥
 देहखंडा नाव आत्मा । ईश्वर पाखाणप्रतिमां ।
 इया परौता प्रेमा । वाढों नेणे ॥ ६४ ॥
 ह्यणौनि पडिलेनि शरीरें । केलेनसि आत्मा चि सरे ।
 मा भोगावेया उरे । कोणें वेखें ॥ ६५ ॥
 ना ईश्वर पांतां आहे । तो भोगवी हें जरि होए ।
 तरि देव चि खाए । विकूनियां ॥ ६६ ॥
 गाविंचे देउलेश्वर । न्यामक चि होंति जर ।
 तरि देशिचे डोंगर । उगे असति ॥ ६७ ॥
 ऐसा त्रिपायें देऊ मानिजे । तरि पाखाणमात्र चि जाणिजे ।
 आणि आत्मा तव ह्यणिजे । देहासी चि ॥ ६८ ॥
 एरें पापपुण्यादिकें । तें आघवें चि करुनि लटिकें ।
 हित मार्गी अग्निमुखें । आचरण जें कां ॥ ६९ ॥

जें चामल डोले वानिती । जें इंद्रियें गोडी काविती ।
 तें चि साच हे प्रतीती । फुडी जेथ ॥ ५७० ॥
 किंबहुना ऐसी पार्था । वाढती देखसी आस्था ।
 धूवांचि वेलि वृथा । आकाशीं जैसी ॥ ७१ ॥
 कोरडा ना बोला । उपेगा आथि गेला ।
 तो वाढौनि मोडला । भेंडु जैसा ॥ ७२ ॥
 नाना कां उंसाचीं कणिसें । कां नपुंसकें माणसें ।
 वन लागलें जैसें । सावेरीचे ॥ ७३ ॥
 नातरि बालकाचें मन । कां चोराघरिचें धन ।
 अथवा गलां स्तन । सेलियेचें ॥ ७४ ॥
 तैसें जें वायाणें । बोसल दीसे जाणणें ।
 तेयातें मीं ह्मणें । तामसज्ञान ॥ ७५ ॥
 तें हिं ज्ञान इया भासा । बोलिजे तो भाऊ ऐसा ।
 जात्यंधाचा कां जैसा । डोला वाडु ॥ ७६ ॥
 कां बधिराचे नीट कान । अपेया नावं पान ।
 तैसें अडिनावं ज्ञान । तमासि तेया ॥ ७७ ॥
 हें असो केती बोलावें । तन्हीं हें ऐसें देखावें ।
 ते ज्ञान नव्हे जाणावें । डोलस तम ॥ ७८ ॥
 एवं तीन्हीं गुणीं । भेदिलें यथालक्षणीं ।
 ज्ञान श्रोतेशिरोमणी । दाविलें तुज ॥ ७९ ॥

नियतं संगरहितमरागद्वेषतः कृतं ॥

अफलप्रेप्सुना कर्म यत्तत्सात्त्विकमुच्यते ॥ २३ ॥

आतां या चि त्रिप्रकारा । ज्ञानाचेनि धनुर्द्धरा ।
 प्राकाशें होति गोचरा । कर्त्तव्या क्रिया ॥ ९८० ॥
 ह्मणौनि कर्म पै गा । अनुसरे तिभागा ।
 मोहोरे जालेयां बोधा । पाणी जैसें ॥ ८१ ॥

तें चि ज्ञानत्रयवशें । त्रिविध कर्म जें असे ।
 तेथ सात्विक तवं ऐसें । परियस आदि ॥ ८२ ॥
 तरि स्वाधिकाराचेनि मार्गे । आलें जें मानिलें आगें ।
 पतिव्रतेचेनि परिष्वंगें । प्रियातें जैसें ॥ ८३ ॥
 सावलेया आंगा चंदन । प्रमदालोचनीं अंजन ।
 तैसें अधिकारासि मंडन । नित्यपणें जें ॥ ८४ ॥
 तें नित्यकर्म भलें । होये निमित्तिकें सावाइलें
 सोनेयांसि जोडलें । सौरभ्य जैसें ॥ ८५ ॥
 आणि आंगा जीवाची संपत्ति । वेचूनि बालाची करी पालति ।
 परि जीवनाची खंति । न पाहे माए ॥ ८६ ॥
 तैसें सर्वस्वें कर्म अनुष्ठी । परि फल न सूपे दृष्टी ।
 उखिती क्रिया पैठी । ब्रह्मीं करी ॥ ८७ ॥
 आणि प्रिया आलेयां धावें । संबंदा उरों ठाकों जावें ।
 तैसें संतप्रसंगें करावें । पारुखे जरि ॥ ८८ ॥
 तरि अकरणाचेनि खेदें । द्वेषातें जीविं न बंधें ।
 जालेयाचेनि आनंदें । फुंज नैए ॥ ८९ ॥
 ऐसिया हातवटिया । कर्म निफजे जें धनंजया ।
 जाण सात्विक तेया । गुण नाम गा ॥ ९० ॥
 या बरि राजसाचें । लक्षण सांधिजैल साचें ।
 न करि अवधानाचें । वाणेपण गा ॥ ९१ ॥

यस्तु कामेप्सुना कर्म साहंकारेण वा पुनः ॥

क्रियते बहुलायासं तद्राजसमुदाहृतं ॥ २४ ॥

तरि घरिं मातापितरां । धडा बोला नाहिं सवंसारा ।
 एर विश्व भरी आदरां । मूर्खु जैसा ॥ ९२ ॥
 कां तुलसीचेया झाडा । दूरौनि घाली सीतोडा ।
 द्राक्षीचेया तरि बुडा । दूध चि लाविजे ॥ ९३ ॥

तैसैं नित्यनैमित्तिकें । कर्म जियें आवश्यकें ।
 तेयांचां विखि न शके । बैसला उठूं ॥ ९४ ॥
 येरां काम्याचेनि नावें । देहसर्वस्व आघवें ।
 अर्जवितां हिं न मनवे । बहू ऐसैं ॥ ९५ ॥
 आगा देव्हडी वाढिया लाहिजे । तेथ मोल देंतां न धाडजे ।
 पेरितां पुरे न ह्मणिजे । बियां जेवि ॥ ९६ ॥
 कां परिमु जालेयां हातिं । लोहा लागि सर्व संपत्ति ।
 वेचु करितां उन्नती । साधकु जैसा ॥ ९७ ॥
 तैसीं फलें देखौनि पुढें । काम्य कर्म दुआडें ।
 करी परि तें थोडें । केलें मानीं ॥ ९८ ॥
 तेणें फलकामुकें । यथाविधि नेटकें ।
 काम्य कीजे जेतुकें । क्रियाजात ॥ ९९ ॥
 आणि तेया ही केलेयाचें । तोंडीं लावी डोंडिचें ।
 कर्मि या नावें पाटाचें । आंक जैसैं ॥ ६०० ॥
 तैसा भरे कर्मा अहंकार । मग पिता अथवा गुरु ।
 तें न मनी कालज्वर । अपघ जैसैं ॥ १ ॥
 तैसेनि साहंकारें । फल अभिलाखियें नरें ।
 कीजे गा आदरें । जें जें काहिं ॥ २ ॥
 पारि तें करणें बहुनसा । बलघौनि करी आयासा ।
 जीवनउपाओ कां जैसा । कोल्हांटियाचा ॥ ३ ॥
 एका कणा लागि उंदिरु । असिका उसपे डोंगरु ।
 कां सेवाला दोसैं दर्दुरु । समुद्रु डडुली ॥ ४ ॥
 पैं भीके परौतें न लाए । तन्हीं गारुडी सर्प वाहे ।
 काडू कीजे सीणु होये । गोडु ये कां ॥ ५ ॥
 हें असो परिमाणुचेनि लाभें । पाताल लंघीति अलिंबे ।
 तैसैं स्वर्गसुखलोभें । विचंवणें जें ॥ ६ ॥

तैं काम्य कर्म सक्केश । जाणावें एथ राजस ।

आतां चिन्ह परियस । तामसाचें ॥ ७ ॥

अनुबन्ध क्षयं हिंसामनपेक्ष्य च पौरुषं ॥

मोहादारभ्यते कर्म यत्तत्तामसमुच्यते ॥ २५ ॥

तरि तैं गा तामस कर्म । जें निदेचें कालें धाम ।

निषेधाचें जन्म । साचें जेणें ॥ ८ ॥

जें निफजविलेया पाठिं । काहिं चि फल न दिसे दीठी ।

रेघ काढिलेयां पोटीं । तोयाचां जेवि ॥ ९ ॥

कां कांजी गुसललेयां । सारकतु फुंकिलेयां ।

काहिं न दिसे गाळिलेयां । बोलुवेचा घाणा ॥ ६१० ॥

नाना उपणिलेयां भूस । विंधलेयां आकाश ।

मांडिलेयां पाश । वोरयासि ॥ ११ ॥

हें आघवें चि जैसें । वांझे होउनि नाशे ।

जें केलेयां पाठिं तैसें । वायां चि जाणूं ॥ १२ ॥

यन्हविं नरदेहा एवडें । धन आटाणिये पडे ।

जें निफजवितां मोडे । जगाचें सुख ॥ १३ ॥

जैसा कमलवनीं फांसु । काढिलेयां कांटसु ।

आपण झिजे नाशु । कमळां करी ॥ १४ ॥

कां आपण आंगें जले । आणि नागवी जगाचे डोले ।

पतंगु जैसा सलें । दीपाचेनि ॥ १५ ॥

तैसें सर्वस्व वायां जाऊ । वरि देहासि हो घाऊ ।

परि पुढिला अपाऊ । निफजे जेणें ॥ १६ ॥

मासी आपणेयातें गिलवी । परि पुढिलातें वांती सीणवी ।

तें कश्मल आठवी । आचरण जें ॥ १७ ॥

तें हिं करावेया दोसें । मज सामर्थ्य असे ।

किं नाहिं हें ऐसें । न पांत करी ॥ १८ ॥

केवढा माझा उपाऊ । करितां कोणु प्रस्ताऊ ।
 केलेयां आऊ । काइ एथ ॥ १९ ॥
 इये जाणिवेची सोए । अविवेकाचेनि पाएं ।
 प्रसूनियां होए । साटोपु कर्मी ॥ ६२० ॥
 आपुला वसैठा जालुनि । विसाटे जैसा बन्हि ।
 कां स्वमर्यादा गीलुनि । सिंधु उठी ॥ २१ ॥
 मग नेणे बहू थोडें । न पाहे मागें पुढें ।
 मार्गामार्ग एकीवडे । करीतु चाले ॥ २२ ॥
 तैसें कृत्याकृत्यें सरकटित । आपु पर न विचारित ।
 कर्म होये तें निश्चित । तामस जाण ॥ २३ ॥
 ऐसें गुणत्रयें भिन्ना । कर्मासि गा अर्जुना ।
 हे केली विवंचना । उपपत्तिसि ॥ २४ ॥

मुक्तसंगोऽनहं वादी धृत्युत्साहसमन्वितः ॥
 सिध्यसिध्योर्निर्विकारः कर्त्ता सात्त्विक उच्यते ॥ २६ ॥

आतां या चि कर्मा भजतां । कर्माभिमानियां कर्त्ता ।
 तो जीउ ही त्रिविधता । पातला असे ॥ २५ ॥
 चतुराश्रमवशें । पुरुषु चतुर्द्धा दीसे ।
 कर्त्तेया त्रिविध तैसें । कर्मभेदें ॥ २६ ॥
 परि तेयां तिहिं आंतु । सात्त्विक तवं प्रस्तूतु ।
 सांचैन दत्तचित्तु । आकर्णि तूं ॥ २७ ॥
 तरि फलउद्देशें सांडिलिया । वाढति जेवि सरलिया ।
 शाखा कां चंदनाचेया । बावनेयां ॥ २८ ॥
 कां न फलतां हिं सार्थका । जैसिया नागवाळिका ।
 तैसिया करी नित्यादिका । क्रिया जो गा ॥ २९ ॥
 पारि फलशून्यता । नाहिं तेया विफलता ।
 पै फलासी चि पांडुसुता । फल काइसें ॥ ६३० ॥

आणि कृत्यादिकें करी बहुवसें । पारि कर्त्ता मी हें नुमसे ।
 वर्षाकालिचे जैसे । मेघवृंद ॥ ३१ ॥
 तेंविं चि परमात्मलिंगा । समर्पावेया जोगा ।
 कर्मकलापु पै गा । निफजावेया ॥ ३२ ॥
 तेया कालातें न लंघणें । देशशुद्धि हान साजणें ।
 कां शास्त्राचां वार्ति पाहाणें । क्रियानिर्णयो ॥ ३३ ॥
 वृत्ती करणें येकवला । चित्त जावों नेंदणें फला ।
 नियमाचिया साखला । वाहाणें हान ॥ ३४ ॥
 हा निरोधु साहावेया लागि । धैर्याचिया चांगाचांगी ।
 चित्तवणी जितिया आंगीं । वाहे जो कां ॥ ३५ ॥
 आणि आत्मेयांचिया आवडी । कर्म करितां सुरवाडीं ।
 देहसुखाचिये परिवडी । येवों न लहाये ॥ ३६ ॥
 ऐसां निद्रा दुरावें । क्षुधा न बणवे ।
 सुरवाडु न पवे । आंगाचा ठाऊ ॥ ३७ ॥
 तवं अधिकाअधिक । उत्साहो धरी आगलिक ।
 सोनें जैसें पुटीं तूंक । तूटलेयां ॥ ३८ ॥
 जरि आवडिं आथि साच । तरि जीवित्व ही सलंछ ।
 आगि घालितां रोमांच । देखिजति ॥ ३९ ॥
 मा आत्मेयां एवढिया प्रिया । वालभैला जो धनंजया ।
 देहाची सिद्धता तेया । खेदु होइल ॥ ६४० ॥
 ह्मणौनि सुरवाडू तूटे । जवं हें देह आटे ।
 तवं आनंदु दुणावटे । कर्मि जेया ॥ ४१ ॥
 ऐसेन जो कर्म करी । आणि कोणहीं एकिं अवसरीं ।
 आलें तें कर्म ठाके ऐसी सरी । वाहे जरि ॥ ४२ ॥
 तरि कडाडिं मोडे जो गाडा । तो आपणपेयां न मनी अवघडा ।
 तैसा ठाकलेनि थोडा । न्हवे चि जो कां ॥ ४३ ॥

नातारि आदरिलें । अव्यंग सिद्धी गेलें ।
 तरि तें हिं जीतलें । मिरौं नेणे ॥ ४४ ॥
 इया खुणा कर्म करितां । देखिजे जो पांडुसुता ।
 तेयातें ह्मणिजे तत्वता । सात्विकु कर्त्ता ॥ ४५ ॥
 रागी कर्मफलप्रेप्सुर्लुब्धो हिंसात्मको शुचिः ॥
 हर्षशोकान्वितः कर्त्ता राजसः परिकीर्तितः ॥ २७ ॥
 आतां राजसा कर्त्तया । बोलखण हे धनंजया ।
 जें अभिलाखा जगिचेया । वसैठा तो ॥ ४६ ॥
 जैसा गाविचेया कश्मला । उकरडां एकवला ।
 कां श्मसानीं अमंगला । आववेयांसि ॥ ४७ ॥
 तिया परीं जो अशेषां । विश्विचेयां अभिलाखां ।
 पाये पाखालणियां दोषां । घरटा जाला ॥ ४८ ॥
 ह्मणौनि फलाचा लागु । देखे जो आसलगु ।
 तिये कर्मि चांगु । रोहो मांडी ॥ ४९ ॥
 आणि आपजलिये जोडी । उपखों नेंदी काडी ।
 आणि क्षणीं क्षणीं कुरवंडी । जीवाची करी ॥ ६५० ॥
 कृपणु ठेवां आपुला । तैसा दक्षु परावेया मोला ।
 बकु जैसा खुतला । मासेयांसि ॥ ५१ ॥
 आणि गोवि केलेयां जवलि । झगटलियां आंग फाली ।
 फलें आंतु पोली । बोरंटी जैसी ॥ ५२ ॥
 तैसा मनें वाचा कायें । भलेतेया दुःख जाये ।
 स्वार्थु साधितां न पाहे । परावें हित ॥ ५३ ॥
 तेविं चि आंगें कर्मी । आचरणें न्हवे क्षमी ।
 निगे मनोधर्मि । अरोचक ॥ ५४ ॥
 कनकाचेया फला । आंतु माजु बाहिरी मैला ।
 तैसा सबाह्यें दुबला । शुचित्वें जो ॥ ५५ ॥

आणि कर्मजात केलेयां । फल लाहे जरि धनंजया ।
 तरि हरिखें जगा येया । वांकुलिया वाए ॥ ५६ ॥
 अथवा तें आदरिलें । हीन फल जरि गेलें ।
 तरि शोकें तेणें जियालें । धिक्करुं लागे ॥ ५७ ॥
 कर्म राहाटि ऐसी । जेयातें गा देखसी ।
 तो जाण त्रिशुद्धिहीं । राजसु कर्त्ता ॥ ५८ ॥

अयुक्तः प्राकृतः स्तब्धः शठो नैष्कृतिकोलसः ।

विषादी दीर्घसूत्री च कर्त्ता तामस उच्यते ॥ २८ ॥

आतां येया पाठिं येरु । कुकर्माचा आगरु ।
 तो ही करुं गोचरु । तामसु कर्त्ता ५९ ॥
 तरि मीं लागलेयां कैसैं । पुढील जलत असे ।
 हें नेणिजे हुताशें । जिया परीं ॥ ६० ॥
 पैं शखें मियां तीखटें । नेणे कैसैं निवटें ।
 कां नेणिजे कालकूटें । आपुलें केलें ॥ ६१ ॥
 तैसा पुढिला आपणपेया । घाये करीतु धनंजया ।
 आदरी उखटिया । क्रिया जिया कां ॥ ६२ ॥
 तिया करितां वेलीं । काड जालें हें न संभाली ।
 चलला वायु वाहुटली । चेष्टे जैसा ॥ ६३ ॥
 पैं करणेयां आणि जेया । मेलु नाहिं धनंजया ।
 तो पाहुनि पिसंया । कैची त्राये ॥ ६४ ॥
 आणि इंद्रियांचें वोडिरिलें । चरौनि राखे जो जियालें ।
 बैला तलिं वर्तलें । पोसणें जैसैं ॥ ६५ ॥
 कां हांसेया रुदना वेल । नेणतां आदरी बाल ।
 राहाटे उछंखल । तिया परी ॥ ६६ ॥
 जो प्रकृति आतलेपणें । कृत्याकृत्यसवाडु नेणे ।
 फुगे केरें धालेपणें । उकरडें जैसैं ॥ ६७ ॥

ह्यणौनि मान्याचेनि नावें । ईश्वरा हि परि न लवे ।
 स्तब्धपणें न मनवे । डोंगरासि ॥ ६८ ॥
 आणि मन जेयाचे काललि । राहाटि फुडी चोरिली ।
 दीठि ते किर बोली । पण्यांगनांची ॥ ६९ ॥
 किंबहुना कपटिचें । देह चि वलिलें तेयाचें ।
 तें जीणें कीं जुवाराचें । टिंठघर ॥ ६७० ॥
 न्हेवे तेयाचा प्रादुर्भावो । तो साभिलाख भिल्लांचा गावों ।
 ह्यणौनि न ये येवों जावों । तिया वाटा ॥ ७१ ॥
 आणि आणिकाचें नीकें केलें । तें वीरुं होये जेया आलें ।
 जैसें पय मीनलें । लवण करी ॥ ७२ ॥
 कांहिं विरुढे ऐसा पदार्थु । घातला आगी आंतु ।
 तिये चि क्षणीं धडाडितु । आगि होए ॥ ७३ ॥
 नाना सुद्रव्यें गोमटीं । जालेयां शरीरा पैठीं ।
 होउनि ठाकति किरीटी । मलु चि जेवि ॥ ७४ ॥
 तैसें पुढिलाचें ब्रवें । जेयाचा भितरु पावे ।
 आणि विरुद्ध चि आघवें । होये चि गा ॥ ७५ ॥
 जो गुण घे दे दोष । अमृताचें करी विख ।
 दूध पाजिला देख । व्यालु जैसा ॥ ७६ ॥
 आणि इहिकीं जियावें । जेणें परत्रां साचा होआवें ।
 तें उचित कृत्य पावे । अवसरीं जिये ॥ ७७ ॥
 तेधवां जेया आपैसी । नीद ये ठेविली ऐसी ।
 दुहवेवारी जैसी । विटाले लोटे ॥ ७८ ॥
 पै द्राक्षरस कां उसा । वेले तोंड सडे वायसा ।
 कां डोले फूटति दिवसा । डुडुलांचें ॥ ७९ ॥
 तैसा कल्याणु कालु पाहे । तै तेया आलसु खाए ।
 ना प्रमादीं तरि होए । तो क्षणे तै ॥ ८० ॥

तेविं चि सागराचां पोटीं । जले अखंड आगिठी ।
 तैसा विषादु वाहे पोटीं । जिवाचिये ॥ ८१ ॥
 आगी धूवां एकावधी । कां अपाना आणि दुर्गंधि ।
 तैसा जो जीविता अवधी । विषादे केला ॥ ८२ ॥
 आणि कल्पांताचिया पारा । वेगळेया ही जो वीरा ।
 सूत्र धरी व्यापारा । साभिलाखें ॥ ८३ ॥
 अगा जगा ही परौती । सुचावा हे पै चित्तीं ।
 करितां विधिं हाति । तृण हिं न लगे ॥ ८४ ॥
 ऐसा जो लोका आंतु । पापपुंजु मूर्तु ।
 देखिजे तो अव्याहतु । तामसु कर्ता ॥ ८५ ॥
 एवं कर्म कर्ता ज्ञान । यां तिहिंचें त्रिधा चिन्ह ।
 दाविलें तुज सुजन— । चक्रवर्ती ॥ ८६ ॥

बुद्धेर्भेदं धृतेश्चैव गुणतत्त्विविधं शृणु ॥

प्रोच्यमानमशेषेण । पृथक्त्वेन धनंजय ॥ २९ ॥

आतां अविद्येचां गावीं । मोहाची वेढूनि मदवी ।
 संदेहाचिं आघवीं । लेउनि लेणीं ॥ ८७ ॥
 आत्मनिश्चयाची बरव । जिये आरिसां पाहे सावेव ।
 तिये बुद्धिची ही धावं । त्रिधा चि असे ॥ ८८ ॥
 अगा सत्त्वादिगुणिं इहिं । काई एक तिहिं ठाई ।
 न कीजे चि एथ पाई । जगा माझि ॥ ८९ ॥
 आगि नसतां पोटीं । कोठें काष्ट असे सृष्टी ।
 तैसें तें कैचें दृश्य किरीटी । त्रिधा जें नोहे ॥ ९० ॥
 ह्यगौनि तिहिं गुणिं । बुद्धि केली त्रिगुणीं ।
 धृतिसि ही घाटणी । तैसी चि असे ॥ ९१ ॥
 तें चि एकैक वेगलालें । एथ चिन्ह अलंकारलें ।
 सांघिजैल उपाइलें । भेदलेपणें ॥ ९२ ॥

परि बुद्धिघृति एयां । दोहिं भागां माक्षि धनंजया ।
 आदिं रूप बुद्धिचेया । भेदासि करूं ॥ ९३ ॥
 तारि उत्तममध्यमनिष्ठ्या । संसारासि गा सूभटा ।
 प्राणियां यंतिया वाटा । तीनि आथि ॥ ९४ ॥
 जे सात्विकराजसतामसनिबद्ध । हे ते मार्ग प्रसिद्ध ।
 संसारभयसंबंध । जीवां येयां ॥ ९५ ॥

प्रवर्त्ति च निवृत्तीं च कार्याकार्ये भयाभये ॥
 बंधमोक्षं च या वेत्ति बुद्धिः सा पार्थ सात्विकी ॥ ३० ॥
 ह्यणौनि अधिकारें मानलें । जें विधिचेनि अर्धें आलें ।
 तें एथ चि एक भलें । नित्यकर्म ॥ ९६ ॥
 तें चि आत्मप्राप्तिफल । दीठि सूनि केवल ।
 कीजे जैसें कां जल । सेविजत ताहाने ॥ ९७ ॥
 येतुलेनि तें कर्म । सांडी भयजन्म विषम ।
 करुनि दे सुगम । मोक्षसिद्धी ॥ ९८ ॥
 तें कर्म करी तो भला । संसारभयें सांडिला ।
 करणीयत्वे आला । मुमुक्षुभागा ॥ ९९ ॥
 तेथ जो बुद्धी ऐसा । बलीं बांधे भरवसा ।
 मोक्षु ठेविला ऐसा । जोडैल एथ ॥ १०० ॥
 ह्यणौनि निवृत्तिची मांडली । सूनि प्रवृत्ती तलि ।
 ए कर्मि बुडकली । द्यावी किं नां ॥ १ ॥
 तृषार्त्ता पाणियें जीणें । कां पुरीं पडिलेयां प्रवाहणें ।
 अंध कूपिं गति किरणें । सूर्याचेनि ॥ २ ॥
 नाना पथ्येंसिं अखद लाहे । तरि रोगें दाटिला ही जिये ।
 कां मीना जीवाला होए । जलाचा जारि ॥ ३ ॥
 तरि तेया जीविता । नाहिं जैसें अन्यथा ।
 तैसें कर्मा येया प्रवर्त्ततां । जोडे चि मोक्षु ॥ ४ ॥

हैं किर जेयाचिये कडे । जें ज्ञान आधि चोखडें ।
 आणि करणीं फुडें । ऐसैं जाणे ॥ ५ ॥
 जियें तिहिं काम्यादिकें । संसारभयदायकें ।
 अकृत्यपणाचे आबुखे । पडिले जेयां ॥ ६ ॥
 तिये कर्म अकार्थी । जन्ममरणसभयीं ।
 प्रवृत्तिफलें विपायीं । मागिलीं चि ॥ ७ ॥
 पै गा आगी माझि न रिगवे । अधाविं न घलवे ।
 धगधगीत नांगवे । शूल जेवि ॥ ८ ॥
 कां कालियाणा धुधुवांतु । देखौनि न पसरवे हातु ।
 न वचवे खोंपे आंतु । वाघाचिये ॥ ९ ॥
 तैसैं कर्म अकरणिय । देखौनि महाभय ।
 उपजे निःसंदेह । बुद्धि जेया ॥ १० ॥
 वाढिलें रांधौनि विखें । तेथ जाणिजे मृत्यु न चुके ।
 तेवि निषेधिं कें देखे । बंधातें जो ॥ ११ ॥
 मग बंधुभयभरिति । तिये निषेधीं प्राप्ति ।
 विनियोगु जाणे निवृत्ती । कर्माचिये ॥ १२ ॥
 ऐसैं कार्याकार्यविवेकीं । जे प्रवृत्तिनिवृत्तिमापकीं ।
 खराकुडापारखी । जिया परीं ॥ १३ ॥
 तैसी कृत्याकृत्यशुद्धी । बुद्धे जें निरवधी ।
 सात्विक ह्मणिपे बुद्धी । ते गा जाण ॥ १४ ॥

यथा धर्ममधर्मं च कार्यं चाकार्यमेव च ॥

अयथावत्प्रजानाति बुद्धिः सा पार्थ राजसी ॥ ३१ ॥

आणि बकाचां गावीं । घेपे क्षीरनीर सकलवी ।
 कां अहोरात्राची गोवी । आंधलें नेणे ॥ १५ ॥
 जेया फुलाचें गोमटें फावे । तो किं काष्टें कोरूं धावे ।
 परि भ्रमरपण नव्हे । अंन्हा जेवि ॥ १६ ॥

तैसि इयें कार्याकार्यें । धर्माधर्मरूपें इयें ।
 तियें न सुहतां जियें । जाणती जे कां ॥ १७ ॥
 आगा डोळां विण मोतियें । घेंतां पाडु मिले विपायें ।
 न मिलणें तें आहे । ठेविळें तेथ ॥ १८ ॥
 तैसैं अकरणीय अवचटें । नोडवे तरी चि लोटे ।
 यन्हवि जाणे एकवटें । दोन्हीं जे कां ॥ १९ ॥
 ते गा बुद्धि ऐसी । जाण एथ राजसी ।
 आखत टाकिली जैसी । मांदिऐसी ॥ ७२० ॥

अधर्म धर्ममिति या मन्यते तमसावृता ॥

सर्वार्थान्विपरीतांश्च बुद्धिः सा पार्थ तामसी ॥ ३२ ॥

आणि राजा जिया वाटा जाण । तें चोरांसि अडवंतावो होये ।
 कां राक्षसांसि दिवो पाहे । राति होउनि ॥ २१ ॥
 नाना निधान चि निदैवां । होये कोलिसेयाचा उडवा ।
 पै असतां आपणपें जीवा । नाहिं जालें ॥ २२ ॥
 तैसैं धर्मजात जेतुकें । जिये बुद्धीसि पातकें ।
 साच तें लटकें । ऐसैं बुझे ॥ २३ ॥
 हे आघवे चि अर्थ । ते करुनि घाली अनर्थ ।
 गुणार्तें व्यवस्थित । दोष मानी ॥ २४ ॥
 किंबहुना श्रुतिजातें । प्रतिष्ठौनि केलें सरतें ।
 तेतुलें हिं उपरतें । जाणे जे बुद्धी ॥ २५ ॥
 ते कोण्हातें हिं न पुसतां । तामसी जाणावी पांडुसुता ।
 रात्रि काइ धर्मार्था । साच करावी ॥ २६ ॥
 एवं बुद्धीचे भेद । तीन्ही तुज विशद ।
 सांघितले स्वयंबोध । कुमुदचंद्रा ॥ २७ ॥

धृत्या यया धारयते मनःप्राणेंद्रियक्रियाः ॥

योगेनाव्यभिचारिण्या धृतिः सा पार्थ सात्त्विकी ॥ ३३ ॥

आतां इया चि बुद्धिदृष्टि । निष्ठेकिली कर्मजाती ।
 बोधु मांडिजे धृती । त्रिविधा जिया ॥ २८ ॥
 तियेचे ही विभाग । तीनि यथालिंग ।
 सांघिजती चांग । अवधान दे ॥ २९ ॥
 तरि उदैला दिनकर । चोरीसि शेंके अंधकार ।
 कां राजाज्ञा अव्यवहार । कुंठवी जेवि ॥ ३० ॥
 नाना पवनाचा सादु । उचललेयां नीटु ।
 आंगेंसि बोभाटु । सांडिती मेघ ॥ ३१ ॥
 कां अगस्तिचेनि दर्शनें । सिंधु घेउनि ठांति मौन ।
 चंद्रोदइ कमलवर्ने । मीठी देंती ॥ ३२ ॥
 हें असो पा० उचलिला । मदमुखु न ठेवी चि खाला ।
 गाजौनि पुढां जाला । सिद्धु जरि ॥ ३३ ॥
 तैसा जो धीरु । उठिलेयां अंतर ।
 मनादिकें व्यापार । सांडिति उर्गी ॥ ३४ ॥
 इंद्रियां विषयांची गांठि । आपैसेया गळति किरीटी ।
 मना मायेचां पोटी । रिगति दाही ॥ ३५ ॥
 अधऊर्ध्व गुढें काढी । प्राणु नवां पेंढी ।
 बांधौनि घाली उंडी । मध्यमे माझि ॥ ३६ ॥
 संकल्पविकल्पाचें लुगडें । सांडूनि मन उघडें ।
 बुद्धि ही मागिली कडे । उर्गे बैसे ॥ ३७ ॥
 ऐसें धैर्यराजें जेणें । मनप्राणकरणें ।
 स्वचेष्टा संभाषणें । सांडिबीजती ॥ ३८ ॥
 मग आघवीं चि संडी । ध्यानाचां आंतुलीं मढीं ।
 कोंडिजति निरवढी । योगाचिया ॥ ३९ ॥
 परि परमात्मेयां चक्रवर्ती । उगाणीति जवं हातीं ।
 तवं लांनु नेघतां धृती । धरिजति जिया ॥ ४० ॥

ते गा धृति एथे । सात्विक हें निरुते ।
 आइक अर्जुनाते । श्रीकांतु ह्मणे ॥ ४१ ॥
 आणि होउनियां शरीरी । स्वर्गसंसाराचां दोहीं घरीं ।
 नांदे जो पोटभरी । त्रिवर्गोपाये ॥ ४२ ॥

यया तु धर्मकामार्थान् धृत्या धारयतेऽर्जुन ॥
 प्रसंगेन फलाकांक्षी धृतिः सा पार्थ राजसी ॥ ३४ ॥

तो मनोरथाचां सागरी । धर्मार्थकामाचें ताहं भरी ।
 जेणें धैर्यबलें करी । क्रियावणिज ॥ ४३ ॥
 जें कर्मभांडवला सुए । तेयाची चौगुणां येती पाहे ।
 एवढें सायासें हें साहे । जेया धृति ॥ ४४ ॥
 ते गा धृति राजस । पार्था एथ परियस ।
 आतां आइकें तामस । तिसरी जे ॥ ४५ ॥

यया स्वप्नं भयं शोकं विषादं मदमेव च ॥
 न विमुंचति दुर्मेधा धृतिः सा पार्थ तामसी ॥ ३५ ॥

तरि सर्व अधर्मे गुणें । जेयाचें कां रूपा एणें ।
 कोलिसा कालेपणें । घडिलां जैसा ॥ ४६ ॥
 आहो प्राकृतु आणि हीनु । तेया ही किं गुणसत्वाचा मानु ।
 पारि न ह्मणिजे पुण्यजनु । राक्षसु काइ ॥ ४७ ॥
 कां ग्रहां माझि इंगलु । तेयातें ह्मणिजे मंगलु ।
 तैसा तमिं धसालु । गुणसंबंधु हा ॥ ४८ ॥
 तैसा सर्वदोषांचा वसैठा । तम चि कामौनि सूभट्टा ।
 उभारिला आंगवटा । जेया नराचा ॥ ४९ ॥
 तो आलसु सूनि असे काखे । ह्मणौनि निद्रे कहीं न मूके ।
 पापें पोसितां दुःखें । न संडिजे जेवि ॥ ७५० ॥
 आणि देहाधनाचिया आवडी । सदा भयातें न संडी ।
 विसंभों न शके दोढी । काठिन्य जैसें ॥ ५१ ॥

आणि पदार्थजाती स्नेहो । बांधे ह्मणौनि तो शोका ठाऊं ।
 केला न पाप जाऊं । कृतघ्न जैसा ॥ ५२ ॥
 आणि असंतोखु जीवेसीं । धरुनि ठेला अहर्निशीं ।
 ह्मणौनि मैत्र तेणेंसीं । विशादें केलें ॥ ५३ ॥
 लसणातें न संडी गंधि । कां अपथ्यशीलातें व्याधि ।
 तैसी केली मरणा अवधी । विशादें तेया ॥ ५४ ॥
 आणि वयसा वित्तकामु । येयांचा वाढवी संभ्रमु ।
 ह्मणौनि मदें आश्रमु । बंधला तेथ ॥ ५५ ॥
 आगितें न संडी तापु । सलाते जातिचा सापु ।
 कां जगाचा वैरी वासिपु । अखंड जैसा ॥ ५६ ॥
 नातरि शरीरातें कालु । न विसंभे कवणही वेळु ।
 तैसा आधि अढळु । तामसिं मदु ॥ ५७ ॥
 एवं पांचै हे निद्रादिक । तामसाचां ठाईं दोष ।
 जिया धृती देख । धरिले असति ॥ ५८ ॥
 तिथे धृती नावें । तामसी एथ हें जाणावें ।
 ह्मणितले तेणें देवें । जगाचेनि ॥ ५९ ॥
 एवं त्रिविधा जो बुद्धी । कीजे कर्मनिश्चयो आदीं ।
 तो धृती इया सिद्धी । नेइजे एथ ॥ ६० ॥
 सूर्ये मार्गु गोचरु होए । आणि तो चालति फिर पाए ।
 परि चालणें तें आहे । धैर्ये जेवि ॥ ६१ ॥
 तैसी बुद्धि कर्मातें दावी । तें करणसामग्र निफजवी ।
 परि निफजावेया होआवी । धीरता जे ॥ ६२ ॥
 ते हे गा तुज प्रति । सांघितली त्रिविध धृति ।
 येया कर्मत्रया निष्पत्ति । जालेयां मग ॥ ६३ ॥

सुखं त्विदानीं त्रिविधं शृणु मे भरतर्षभ ॥
 अभ्यासाद्रमते यत्र दुःखांतं च निगच्छति ॥ ६६ ॥

येथ फल येक जें निफजे । सुख जेयातें ह्मणिजे ।
 तें हिं त्रिविध जाणिजे । कर्मवशें ॥ ६४ ॥
 तरि फलरूप तें सुख । त्रिगुणि भेदलें देख ।
 विवंचूं आतां चोख । चोखीं बोलीं ॥ ६५ ॥
 चोखी ते कैसी सांघें । पै घेऊं जातां बोलबगे ।
 कानिचिये ही लागे । हातिचा मळ ॥ ६६ ॥
 ह्मणौनि जेयाचेनि अवेहेरें । अवधान होये बाहिरें ।
 तें आइक हो अंतरें । जिवाचेनि जीवें ॥ ६७ ॥
 ऐसें ह्मणौनि देऊ । त्रिविधा सुखाचा प्रस्ताऊ ।
 मांडिला तो निर्वाहो । निरोपित असे ॥ ६८ ॥
 ह्मणे सुखप्रया संज्ञा । सांघों ह्मणौनि प्रतिज्ञा ।
 बोलिजे तें प्राज्ञा । आइक आतां ॥ ६९ ॥
 तरि सुख तें गा किरीटी । दाविजेल तुज दीठी ।
 जेणे आत्मेनसीं भेटि । जीवासि होए ॥ ७० ॥
 परि मात्रेचेनि मापें । दिव्योषध जैसें घेपे ।
 कां कथिलाचें कीजे रूपें । रसभावनीं ॥ ७१ ॥
 नाना लवणाचे जल । होआवेया दोनि च्यारि वेल ।
 देउनि सांडिजति ढाल । तोयाचे चि जेवि ॥ ७२ ॥
 तेवि जालेनि सुखलेशें । जीउ भाविलेयां अभ्यासें ।
 जीवपणाचें नाशे । दुःख जेथ ॥ ७३ ॥
 तें येथ आत्मसुख । जालें असे त्रिगुणात्मक ।
 तें हिं सांघों येकैक । रूप आतां ॥ ७४ ॥

यत्तदग्रे विषमिव परिणामे मृत्तपमम् ॥

तत्सुखं सात्त्विकं प्रोक्तमात्मबुद्धिप्रसादजम् ॥ ३७ ॥

तरि चंदनाचें बुड । सर्पिं जैसें दुवाड ।
 कां निधानाचें तोंड । विवंचीतें ही ॥ ७५ ॥

आगा स्वर्गिचें गोमटें । अडव यागसंकटे ।
 कां बापपण दासटें । त्रासकार्लें ॥ ७६ ॥
 ह असो दीपाचिये सिद्धी । अवघड धूं आर्धि ।
 नातारि तो बोषधी । जीभेचा ठाऊ ॥ ७७ ॥
 तिया परीं पांडवा । जेया सुखाचा रिगावां ।
 विषमु तेया मेलवा । यमदमाचा ॥ ७८ ॥
 देंत सर्वस्नेहा मीठी । आंगीं ऐसें वैराग्य उठी ।
 स्वर्गसंसाराकांठी । काढित चि ॥ ७९ ॥
 विवेकश्रवणें खरपुसें । जेथ व्रताचरणें कर्कसें ।
 करितां जांति भोकसे । बुद्ध्यादिकांचे ॥ ८० ॥
 सुषुम्नेचेनि तोंडें । गीलजे प्राणापानाचे लोंढे ।
 बोहणीए चि एवढें । भारी जेथ ॥ ८१ ॥
 तें सारसां हिं विघडतां । वोहांहूनि वत्स काढितां ।
 नव्हे भणग दवडितां । भाणेया वरौनि ॥ ८२ ॥
 पै गा माये पुढौनि बालक । कार्लें नेंतां जें एक ।
 होये कां उदक । तूटतां मीनां ॥ ८३ ॥
 तैसें विषयांचें घर । इंद्रियां सांडितां धोर ।
 युगांत होये तें वीर । वीतराग साहांति ॥ ८४ ॥
 ऐसा जेया सुखिचा आरंभु । दावी काठिण्याचा क्षोभु ।
 मग क्षीराब्धिंलाभु । अमृताचा जैसा ॥ ८५ ॥
 पहिलेया वैराग्यगरला । धैर्यशंभु बोडविला गला ।
 तरि ज्ञानांमृते सोहला । पाहे जेथ ॥ ८६ ॥
 पै कोळिता ही हूनु बहुवसें । द्राक्षाचें हिरवेपण असे ।
 तें परिपाकीं कां जैसें । माधुर्य होए ॥ ८७ ॥
 तें वैराग्यादिक तैसें । पीकळें आत्मप्रकाशें ।
 मग वैराग्येसीं हीं नासे । अविद्याजात ॥ ८८ ॥

तेधवां सागरीं गंगा जैसी । आत्मा मीनलेयां बुद्धि तैसी ।
 अद्वयआनंदाची आपैसी । खाणि उघडे ॥ ८९ ॥
 ऐसें स्वानुभवदिश्रामें । वैराग्यमूल जें परिणमे ।
 तें सात्विक एणें नावें । बोलिजे सुख ॥ ७९० ॥

विषयेंद्रियसंयोगाद्यत्तदग्रेऽमृतोपमम् ॥

परिणामे विषमिव तत्सुखं राजसं स्मृतं ॥ ३८ ॥

आणि विषयइंद्रियां । मेलु होतां धनंजया ।
 तें सुख जाये थडिया । सांडौनि दोन्हीं ॥ ९१ ॥
 अधिकारिया रिगतां गावों । जाला जैसा उत्सावो ।
 कां रिणावरि विवाहो । विस्तारिला ॥ ९२ ॥
 नाना रोगीं जीभे पासिं । केलें गोडें होंति साखरेसीं ।
 कां वत्सनागा जैसी । महुललै ते ॥ ९३ ॥
 पहिले सवंचोरां मैत्र । भेटिहाटिचें कलत्र ।
 कां लाघविचे विचित्र । विनोद ते ॥ ९४ ॥
 तैसें विषयेंद्रियदोखीं । जें सुख जीवातें पोखी ।
 मग उपटला खडकीं । राजहंसु जैसा ॥ ९५ ॥
 तैसी जोडि आघवी आटे । जीविताचा ठाऊ फीटे ।
 सुकृताचेया ही मुटे । धनाची गांठि ॥ ९६ ॥
 आणि भोगिलें जें काहिं । स्वप्न जैसें होये नाहिं ।
 मग हाणिचां चि घाई । लोलावें उरे ॥ ९७ ॥
 ऐसें पाहांति जें सुख । इहिकिं परिणामे देख ।
 परत्रीं किर विप । होउनि परते ॥ ९८ ॥
 जें इंद्रियजाता लला । दीधलेयां धर्माचा मला ।
 जाल्लनि भोगिजे सोहळा । विषयांचा जेथ ॥ ९९ ॥
 तेथ पातकें मांधति थाऊ । तियें नरकीं देंति ठाऊ ।
 जेणें सुखें अप्राऊ । परत्रीं ऐसा ॥ ८०० ॥

पै नावें विष मद्धरें । परि मारुनि अतिखरें ।
तैसें आदि जें गोडिरें । अंतीं कडू ॥ १ ॥
पार्था तें सुख साचें । वलिलें आहे रजाचें ।
ह्मणौनि न सीवें तेयाचें । आंग कहीं ॥ २ ॥

यदग्रे चानुबन्धे च सुखं मोहनमात्मनः ॥

निद्रालस्यप्रमदोत्थं तत्तामसमुदाहृतं ॥ ३९ ॥

आणि अपेयाचेनि पानें । अखाद्याचेनि भोजनें ।
स्वैरस्त्रीसंनिधानें । होये जें सुख ॥ ३ ॥
कां पुढिलाचेनि मारें । नातारि पशुप्रहारें ।
जें सुख अवतरे । भांडाचां बोलीं ॥ ४ ॥
जें आलस वारि पोखिजे । निद्रे माझि देखिजे ।
जेयाचां आदीं अंतीं भूलिजे । आपुली वाट ॥ ५ ॥
तें गा सुख पार्था । तामस जाण सर्वथा ।
हें न संगों चि जें कथा । असंभाव्य हे ॥ ६ ॥

न तदस्ति पृथिव्यां वा दिवि देवेषु वा पुनः ॥

सत्त्वं प्रकृतिजैर्भुक्तं यदेभिः स्यात्त्रिभिर्गुणैः ॥ ४० ॥

ऐसें कर्मभेदे मुदलें । फलमुख ही त्रिधा जालें ।
तें हें एथ मियां केलें । गोचर तुज ॥ ७ ॥
तें कर्त्ता कर्म फल । हे त्रिकुटी एकि केवल ।
वांचूनि कहीं चि असे स्थूल । सूक्ष्मादि ॥ ८ ॥
आणि हे तव त्रिकुटी । तिहिं गुणिं किरीटी ।
गुंथिली आहे पटीं । तांथुवीं जैसी ॥ ९ ॥
ह्मणौनि प्रकृतिचां लोकीं । न बांधिजे सत्त्वादिकीं ।
तैसी स्वर्गीं नां मृत्युलोकीं । आथि वस्तु ॥ ८१० ॥
कैचा लोंवे विण कांबला । मातिये विण मोदला ।
कां जलें विण कळोलां । होणें आहे ॥ ११ ॥

तैसें नोहोनि गुणागुणाचे । लिष्टिचां रचलां रचे ।
 ऐसें नाहिं गा सार्चे । प्राणिजातां ॥ १२ ॥
 या लागि हें सकल । तिहिं गुणाचें केवल ।
 घडिलें आहे निखल । ऐसें जाण ॥ १३ ॥

ब्राह्मणक्षत्रियविशां शूद्राणां च परंतप ॥

कर्माणि प्रविभक्तानि स्वभावप्रभवैर्गुणैः ॥ ४१ ॥

गुणीं देवत्रईं मेलविली । लोकिं त्रिकुटी पाडिली ।
 चतुर्वर्णां घातली । सिनानिं उलिंगें ॥ १४ ॥
 ते चि च्यान्ही वर्ण । जरि पूससी कोण ।
 तरि ब्राह्मण । मुख्य जे कां ॥ १५ ॥
 एर क्षत्री वैश्य दोन्ही । ते ही ब्राह्मणाचां चि मानीं ।
 जें ते वैदिके विधानीं । योग्य क्षणौनि ॥ १६ ॥
 चौथा शूद्र जो धनंजया । वेदीं लागु किर नाहीं तेया ।
 तन्हीं वृत्ति वर्णत्रया । आधीन तेयाची ॥ १७ ॥
 तिये वृत्तिचिया जकलिका । वर्णा ब्राह्मणादिकां ।
 आहो शूद्र ही देखां । चौथा जाला ॥ १८ ॥
 जैसा फुलाचेनि सांघातें । तांथू तुरंबिजे श्रीमंतें ।
 तैसें द्विजसंगें शूद्रातें । स्वीकारीति श्रुती ॥ १९ ॥
 ऐसीसी गा पार्था । चतुर्वर्णव्यवस्था ।
 करूं आतां कर्मपंथा । ययाचेया रूप ॥ ८२० ॥
 जे हीं ते वर्ण च्यान्ही । ये जन्ममृत्युचीं कातरी ।
 तूकौनियां ईश्वरीं । पैठे होंति ॥ २१ ॥
 जिये आत्मप्रवृत्तिचां इहीं । गुणिं सत्त्वादीकीं तिहीं ।
 कर्म चौघां चौं ठां । वांटिलीं वर्णां ॥ २२ ॥
 जैसें बापें जोडिलें लेंका । वांटे सूर्य मार्ग पथिकां ।
 नाना व्यापार सेवकां । स्वामि जैसा ॥ २३ ॥

तैसें प्रकृतिचां गुणीं । जेया कर्माची वेव्हाणी ।
 केली आहे वर्णां । चौ हीं इहीं ॥ २४ ॥
 ते सत्वे आपुलां आंगीं । समुनिनिमुनि भागीं ।
 दोषे केले नियोगी । ब्राह्मणक्षत्री ॥ २५ ॥
 आणि रज परि सात्विक । तेया ठेविले वैश्य लोक ।
 रज चि तमें भेसक । तेथ शूद्रु जाला ॥ २६ ॥
 ऐसा एका चि प्राणिवृंदा । भेटु वर्णा चतुर्धा ।
 गुणीं चि इहीं प्रबुधा । केला जाण ॥ २७ ॥
 मग आपुलें ठेविलें जैसैं । आइतें चि दीपें दीसे ।
 गुणभिन्न कर्म तैसें । शास्त्र दावी ॥ २८ ॥
 ते चि आतां कोण कोण । वर्णविहिताचें लक्षण ।
 हें सांघों आइक श्रवण । सौभाग्यनिधी ॥ २९ ॥

शमो दमस्तपः शौचं क्षांतिरार्जवमेव च ॥

ज्ञानं विज्ञानमास्तित्वयं ब्रह्मकर्म स्वभावजम् ॥ ४२ ॥

तरि सर्व इंद्रियांची वृत्ति । घेउनि आपुलां हातीं ।
 बुद्धि आत्मेयां मिले एकांति । प्रिया जैसी ॥ ८३० ॥
 ऐसा बुद्धिचा उपरमु । तेया नावं ह्यणिपे शमु ।
 तो गुणु गा उपक्रमु । जेया कर्माचा ॥ ३१ ॥
 आणि बाह्यइंद्रियांचें धाडें । पीटुनि विविचेनि दंडें ।
 नेंदिजे अधर्मा कडे । कहीं चि जाऊं ॥ ३२ ॥
 तो पै गा शमा विरजा । दमगुणु जेथ दूजा ।
 आणी स्वधर्माचिया वोजा । जीणें जें कां ॥ ३३ ॥
 तेवि चि सटिवियेचिये राती । न विसंभिजे जेवि वाती ।
 तैसा ईश्वरनिर्णयो चित्ती । वाहाणे जें गा ॥ ३४ ॥
 बेया नावं तप । हें तीजेया गुणाचे रूप ।
 आणि शौच ही निष्पाप । द्विविध जेथ ॥ ३५ ॥

मन भावशुद्धी भरलें । आंग क्रिया आलंकरलें ।
 ऐसें सबाह्य जियालें । साजिरें जें कां ॥ ३६ ॥
 तेया नावं शौच पार्था । तो कर्मि गुणु चौथा ।
 आणि पृथ्वीचेया परी सर्वथा । सर्व जें साहाणें ॥ ३७ ॥
 ते गा क्षमा पांडवा । गुणु जेथ पांचवां ।
 स्वरां माझि सोहावा । पंचमु जैसा ॥ ३८ ॥
 आणि वांकुडेनि बोधेंसि । गंगा हे उजू चि जैसी ।
 कां पुटीं वललां उंसीं । गोडी जेवि ॥ ३९ ॥
 तैसा विषमा हिं जीवां । लागि उजुकारु होआवा ।
 तें आर्जव गा सावां । तेथिचा गुणु ॥ ८४० ॥
 आणि पाणियें प्रयत्नें माली । अखंड जचे झाडां मुलीं ।
 परि तें आघवें चि फलीं । जाणे जेवि ॥ ४१ ॥
 तैसें शास्त्राधारे तेणें । ईश्वरू चि एकु पावणें ।
 हें फुडें जें कां जाणणें । तें एथ ज्ञान ॥ ४२ ॥
 ते गा कर्मि जिये । सातवां गुणु होये ।
 आणि विज्ञान हें पाहे । एवरूप ॥ ४३ ॥
 तरि सत्वशुद्धिचिये वेले । शास्त्रें कां ध्यानबलें ।
 ईश्वरतत्त्वीं चि मिले । निष्ठकबुद्धी ॥ ४४ ॥
 हें विज्ञान बरवें । तें गुणें जें आठवें ।
 आणि आस्तिक्य जाणावें । नववा गुणु ॥ ४५ ॥
 पै राजमुद्रा आथिलेया । प्रजा भजे भलेतेया ।
 तेवि शास्त्रें स्वीकरिलेयां । मार्गमात्रातें ॥ ४६ ॥
 आदरें कां वर्तणें । तें आस्तिकत्व मी ह्मणें ।
 तो नववा गुणु जेणें । कर्म साच ॥ ४७ ॥
 एवं नवै शमादिक । गुणु जेथ निर्दोख ।
 तें कर्म जाण स्वाभाविक । ब्राह्मणाचें ॥ ४८ ॥

तो नवगुणरत्नाकर । ययां नवां रत्नांचा हार ।
 न फेडित ले दिनकर । प्रकाशु जैसा ॥ ४९ ॥
 नाना चांपाचां पौलीं पूजिला । चंद्रु चंद्रिका धवलिला ।
 कां चंदनु निजें चर्चिला । सौरभ्यें जेवि ॥ ८५० ॥
 तेवि नव गुण टिकलग । लेणें ब्राह्मणाचें हें अव्यंग ।
 कहीं चि न संडी आंग । ब्राह्मणाचें ॥ ५१ ॥

शौर्य तेजो धृतिर्दाक्ष्य युद्धे चाप्यपलायनं ॥
 दानमीश्वरभावश्च क्षात्रं कर्म स्वभावजं ॥ ४३ ॥

आतां उचित जें क्षत्रियां । तें हिं कर्म धनंजया ।
 सांघों आइक प्रज्ञेचिया । भरोवरी ॥ ५२ ॥
 तारि हा भानु तेजें । नापेक्षी जेवि विरजें ।
 कां सिंहें न पाहिजे । जावलिया ॥ ५३ ॥
 ऐसा स्वयंभु जो जीव लाटु । सावार्यें विण उद्धटु ।
 तो शौर्य गा श्रेष्ठ । पहिला गुण ॥ ५४ ॥
 आणि सूर्याचेनि प्रतापें । कोडि ही नक्षत्रें हारपे ।
 ना तो तन्हीं न लोपे । सचंद्रीं तिहीं ॥ ५५ ॥
 तैसा आपुलेनि प्रौढ गुणें । जगासि विस्मयो देणें ।
 आपण तरि न क्षोभणें । काइसेनि हीं ॥ ५६ ॥
 तें प्रागल्भ्य रूप तेजा । जिये कार्मिं गुणु दूजा ।
 आणि धीरु तो तीजा । तेथिचा गुणु ॥ ५७ ॥
 वारिपडिलेयां आकाश । बुद्धिचे डोले मानस ।
 झांकी ना तें साहस । धैर्य जेथ ॥ ५८ ॥
 आणि पाणी होये भलेतेतुकें । पारि तें जीणौनि पद्म फांके ।
 कां आकाश ऊंचिया जींके । आवडेतया ॥ ५९ ॥
 तेवि विविधा अवस्था । पातलिया जीणौनि पार्था ।
 प्रज्ञाफलतेया अर्था । वेद देणें जें ॥ ८६० ॥

तें दक्षत्व गा चोख । जेथ चौथा गुणु देख ।
 आणि जूझ अलौकीक । पांचवां गुणु ॥ ६१ ॥
 आदित्याचिं झाडें । ठाकति रविबिंबा कडे ।
 तेवि समोर शत्रू पुढें । होणें जें कां ॥ ६२ ॥
 माहेवणी प्रयत्नेसिं । चुकविजे सेजे जैसी ।
 रिपू पाठि नेंदिजे तैसी । रणांगणीं ॥ ६३ ॥
 हा क्षत्रियांचां आचारीं । पांचवां गुणेंद्रु अवधारीं ।
 चौं हीं पुरुषार्था शिरीं । भगति जैसी ॥ ६४ ॥
 आणि जालेनि फुलें फलें । शाखिये जैसे मोकळे ।
 कां उदार परिमलें । पद्मकर ॥ ६५ ॥
 नाना आवडिचेनि मापें । चांदिणें भलेतेणें घेपे ।
 पुढिलाचेनि संकल्पें । तैसें जें देणें ॥ ६६ ॥
 तें उमप गा दान । जेथ सावें गुणरत्न ।
 आणि आज्ञे एकायतन । होये जेणें कां ॥ ६७ ॥
 पोखुनि अवेव आपुले । करविजति मानविलें ।
 तेवि पालणें लोभविलें । जग जें भोगी ॥ ६८ ॥
 तेया नावं ईश्वरभावो । जो सर्व सामग्रियेचा ठावो ।
 तो गुणा माक्षि राउ । सातवां जेथ ॥ ६९ ॥
 ऐसे जे शौर्यादिकां । इहिं सातवां गुणिं विशेषिं ।
 अलंकृत सप्तरुषीं । आकाश जैसें ॥ ७० ॥
 तैसें सप्तगुणिं विचित्र । कर्म जें जगीं पवित्र ।
 तें साहाजें जाण क्षात्र । क्षत्रियांचें ॥ ७१ ॥
 नाना क्षत्री नव्हे नरु । तो सत्वसोनेयांचा चि मेरु ।
 ह्यणौनि गुणस्वर्गा आधारु । सातां इयां ॥ ७२ ॥
 नाना सप्तगुणार्णविं । परिवारली बरवी ।
 हे क्रिया नव्हे पृथिवी । भोगीतसे तो ॥ ७३ ॥

अध्याय १८ वा

७७५

कां गुणां सातें बोधीं । हे क्रिया ते गंगा जगीं ।
तेया महोदधीचां आंगीं । विलसत जैसी ॥ ७४ ॥
हे परी बहुवस देख । शौर्यादिगुणात्मक ।
कर्म गा नैसर्गिक । क्षत्रियजातीसि ॥ ७५ ॥

कृषिगोरक्ष्यवाणिज्यं वैश्यकर्म स्वभावजं ॥
परिचर्यात्मकं कर्म शूद्रस्यापि स्वभावजं ॥ ७४ ॥

आतां वैश्याचिये जाती । उचित जें महामती ।
तें आडक निरुती । क्रिया सांगों ॥ ७६ ॥
तरि भूमि बीज नांगरु । या भांडवलाचा आधार ।
घेउनि लाभ अपारु । मेलवणें जें ॥ ७७ ॥
किंबहुना कृषि जीणें । गोधनें राखौनि वर्तणें ।
कां सवंगाची वीकणें । महर्गि वस्तु ॥ ७८ ॥
आणि वैश्यक्षत्रियब्राह्मण । हे द्विजन्मे तीन्ही वर्ण ।
यांचें जें सुश्रूषण । तें शूद्रकर्म ॥ ७९ ॥
पै द्विजसेवे परीतें । धावणें नाहिं शूद्रातें ।
एवं चतुर्वर्णांचि उचितें । दाबिलि कर्म ॥ ८० ॥

स्वे स्वे कर्मण्यभिरतः संसिद्धिं लभते नरः ॥
स्वकर्मनिरतः सिद्धिं यथा विंदति तच्छुणु ॥ ४५ ॥

आतां यें चि गा विचक्षणा । वेगलालेया वर्णा ।
उचित जैसें करणां । शस्त्रादिक ॥ ८१ ॥
नातरि जलदच्युता । पाणियां उचित सरिता ।
सरितेसि पांडुसुता । सिंधु उचित ॥ ८२ ॥
तैसें वर्णाश्रमवर्शें । जें करणें आलें असे ।
गोरेया आंगा जैसें । गोरेपण ॥ ८३ ॥
तेया स्वभावविहिता कर्मा । शास्त्राचेनि मुखें वीरोत्तमां ।
प्रवर्त्तविषया लागि प्रेमा । अढळ कीजे ॥ ८४ ॥

पै आपुलें चि रत्न थीतें । घेपे पारखियाचेनि हातें ।
 तैसें स्वकर्म आपैतें । शास्त्रें करावें ॥ ८५ ॥
 जैसी दीठि असे आपुलां ठाई । परि दीपें विण भोगु नाहिं ।
 मार्गु न ल्हांतां काहिं पाई । असतां होए ॥ ८६ ॥
 ह्मणौनि जातिवशें साचारु । सहजु असे जो अधिकारु ।
 तो आपुलां शास्त्रि गोचरु । आपणपेयां कीजे ॥ ८७ ॥
 मग घरिचा चि ठेवा । आणि डोलां दावी दीवा ।
 तारे काइ घेंतां पांडवा । आलसु असे ॥ ८८ ॥
 तैसें स्वभावें भागा आलें । वरि शास्त्रें खरें केलें ।
 तें विहित जो आपुलें । आचरे गा ॥ ८९ ॥
 परि आलसु सांडौनि । फलकामु दवडौनि ।
 आगें जीवें मोडौनि । तेथ चि भरु ॥ ९० ॥
 बोधी पडिलेयां पाणीं । नेगें आनानीं वाहाणीं ।
 तैसा जिये आचरणीं । व्यवस्थौनि ॥ ९१ ॥
 अर्जुना जें इया परीं । तें विहित कर्म करी ।
 तो मोक्षाचां ऐली द्वारीं । पैठा होए ॥ ९२ ॥
 जें अकरणां आणि निषिद्धा । न वचे चि काहीं संबंदा ।
 ह्मणौनि भावा विरुद्धा । मूकला तो ॥ ९३ ॥
 आणि काम्यकर्मा कडे । न परते चि तेकडे ।
 तेथ चंदनाचे खोडे । न ले चि तो ॥ ९४ ॥
 येर नित्य कर्म तवं । फळत्यागें वेचलें सर्व ।
 ह्मणौनि मोक्षाची सीव । टाकूं लाहे ॥ ९५ ॥
 ऐसेनि शुभाशुभी संसारीं । सांडिला तो अवधारीं ।
 वैराग्यमोक्षद्वारीं । उभा ठाके ॥ ९६ ॥
 जे सकलभागाची सीमां । मोक्षलाभाची प्रमां ।
 नाना कर्ममार्गश्रमा । सेवटु जेथ ॥ ९७ ॥

मोक्षफलें दीधली बोल । जें सुकृततरूचें फूल ।
 तिये बैरागी ठेवी पाउल । भवरू जैसा ॥ ९८ ॥
 पै आत्मज्ञानसुदिनांचा । बाधावा सांगितेया अरुणाचा ।
 उदो तेया वैराग्याचा । ठावो पावे ॥ ९९ ॥
 किंबहुना आत्मज्ञान । जेणें हाता ए निधान ।
 तें वैराग्य दिव्यांजन । जीवें ले तो ॥ १०० ॥
 ऐसी मोक्षाची योग्यता । सिद्धी जाये पांडुमुता ।
 अनुसरौनि विहिता । कर्मा येया ॥ १ ॥
 विहित कर्म पांडवा । आपुला अनन्यु बोलवावा ।
 आणि हे चि प्रेमसेवा । सर्वात्मकाची ॥ २ ॥
 पै आघवां चि भोगेंसि । पतिव्रता क्रीडे प्रियेंसि ।
 किं तेया चि नावं जैसीं । तपें तिया केलीं ॥ ३ ॥
 कां बालका एकि माए । वांचौनि जीणें काइ आहे ।
 ह्मणौनि सेवा कीं तो होए । पाटाचा धर्म ॥ ४ ॥
 नाना पाणी ह्मणौनि मासा । गंगा न संडीतु जैसा ।
 सर्वतीर्थसंवासा । वरिपडा जाला ॥ ५ ॥
 तैसा आपुलिया विहिता । उपा३० असे न विसंबता ।
 ऐसा कीजे किं जगन्नाथा । आभारु पडे ॥ ६ ॥
 आगा जेया जें विहित । तें ईश्वराचें मनोगत ।
 ह्मणौनि केऱ्या निभ्रांत । परितोखु पावे ॥ ७ ॥
 पै जीवाचां कसीं उतरली । ते दासि किं गोसांविणि जाली ।
 तैसी सेवेची तेयां माउली । विहित जेवि ॥ ८ ॥
 तैसें ते स्वामिचेया मनोभावा । न चूकिजे हे चि सेवा ।
 ऐरिं ते पांडवा । वणिज करणें ॥ ९ ॥

यतः प्रवृत्तिर्भूतानां येन सर्वमिदं ततं ॥

स्वकर्मणा तमभ्यर्च्य सिद्धिं विंदति मानवः ॥ ४६ ॥

ह्यणौनि विहितक्रिया केली । नव्हे तेयाची खूण पालिली ।
 जेया पासौनि कां आलीं । आकार भूतें ॥ ९१० ॥
 जो अविद्येचिया चिंधिया । गुंडाळुनि जीव बाडलिया ।
 खेलव्रीतसे गुणियां । अहंकाररज्जु ॥ ९११ ॥
 जेणें जग हें समस्त । आंतु बाहिरि भरित ।
 जालें आहे दीपनात । तेजें जैसें ॥ ९१२ ॥
 तेया सर्वात्मका ईश्वरा । स्वकर्मकुसुमाची बीरा ।
 पूजा केली होये अपारा । तोखा लागि ॥ ९१३ ॥
 ह्यणौनि तिये पूजे । रिझलेनि आत्मराजें ।
 वैराग्यसिद्धि दीजे । पसाया तेया ॥ ९१४ ॥
 जें वैराग्यदशे । ईश्वराचेनि वेधवसैं ।
 हें सर्व ही नावडे जैसें । वांत होणें ॥ ९१५ ॥
 प्राणनाथाचिये आधी । विरहिणीतें जीणें बाधी ।
 तैसें मुखजात त्रिशुद्धी । दुःखा चि लागि ॥ ९१६ ॥
 सम्यग्ज्ञाना उदैजतां । वेधें चि तन्मयता ।
 उपजे ऐसी योग्यता । बोधाची लाहे ॥ ९१७ ॥
 ह्यणौनि मोक्षलाभा लागि । जो व्रतें वाहांतसे आंगीं ।
 तेणें स्वधर्मु चांगीं । अधिष्ठावा ॥ ९१८ ॥

श्रेयान्स्वधर्मो विगुणः परधर्मात्स्वनिष्ठितात् ॥

स्वभावनियतं कर्म कुर्वन्नाप्नोति किल्बिषं ॥ ४७ ॥

आगा आपुला हा स्वधर्मु । आचरणें जन्हीं विषमु ।
 तन्हीं पाहावा तो परिणामु । फलैल जेणें ॥ ९१९ ॥
 जें सुखा लागि आपणपेयां । निंब चि आधि धनंजया ।
 तें कडुवटपण तेया । भोगिजे ना ॥ ९२० ॥
 फलणेयां ऐली कडे । केलि तें पाहांतां आशा मोडे ।
 ऐसें त्यजिलें तरि जोडे । तैसें कें गोमटें ॥ ९२१ ॥

तेवि स्वधर्मु सांकडु । देखौनि केला जरि कीडु ।
 तरि मोक्षसुरवाडु । अंतरला ॥ २२ ॥
 आणि आपुली माए । कुब्ज जन्ही आहे ।
 तन्हीं जीणें जीजे तें नांहे । स्नेह कुन्हीं कीं ॥ २३ ॥
 एरी जिया पराविया । रंभेहुनि बरविया ।
 तिया काइ कराविया । बालकें तेणें ॥ २४ ॥
 अगा पाणियांहुनि बौहें । तूणीं गुणु कीरु आहे ।
 परि मीनां काइ होए । असणें तेथ ॥ २५ ॥
 पै आघवियां जगीं जें विष । तें कीडेयाचें पीयूष ।
 आणि जगा गूल देख । तेथ मरण तेया ॥ २६ ॥
 हणौनि विहित जें जेया जीणें । फीटे संसाराचें धरणें ।
 क्रिया कठोर तन्हीं तेणें । तें चि करावें ॥ २७ ॥
 एरा पराचारा बरविया । ऐसें होईल टेंकलेयां ।
 पायांचें चालणें डोया । केलें जैसें ॥ २८ ॥
 यया लागि कर्म आपुलें । जें जातिस्वभावेंसि आलें ।
 तें करी तेणें जीतलें । कर्मबंधातें ॥ २९ ॥

सहजं कर्म कौंतेय सदोषमपि न त्यजेत् ॥

सर्वारंभा हि दोषेण धूमेनाग्निरिवावृताः ॥ ४८ ॥

आणि स्वधर्मू चि पालावा । परधर्मु तो गालावा ।
 हा नियमु हीं पांडवा । न कीजे चि पां ॥ ३० ॥
 तन्हीं आत्मा दृष्ट नोहे । तयं कर्म करणें कां ठाए ।
 आणि करणें तेथ आहे । आयासु आधीं ॥ ३१ ॥
 हणौनि भलेतिये कर्मी । आयासु जरि उपक्रमी ।
 तरि काइ स्वधर्मी । दोषु सांघें ॥ ३२ ॥
 अगा उजू वाटा चालावें । तन्हीं पाये चि सीणवावे ।
 ना आढरानें धावावें । तन्हीं तें चि ॥ ३३ ॥

पै शिला कां सिधौरिया । दाटणें एक धनंजया ।
 परि जें वाहांतां विसावेया । मिलैल तें घेपे ॥ ३४ ॥
 यन्हवि कणा भूसा । काडितां हिं सोसु सरिसा ।
 जें चि रांधणें माणुसा । तें चि हवि ॥ ३५ ॥
 परि धर्मपत्नी कां धांगडि । पोसितां जरि एकि वोढि ।
 तरि कां अपखडि । आणावी आंगां ॥ ३६ ॥
 दधिजलाचेया गुसलणां । व्यापार सारिखा विचक्षणां ।
 बालुवे तिलां घाणा । गालणें एक ॥ ३७ ॥
 आगा पाठीं लागतां घाई । मरण न चुके चि पाहीं ।
 तरि समोरिलां काई । आगलें कीजे ॥ ३८ ॥
 कुलस्त्री दांडेयांचे घाए । निगाली ही जारे साहे ।
 तरि स्वपतितें वारें । साडिलें कीं ॥ ३९ ॥
 तैसें आवडतें हिं करणें । न निफजे सीणलेयां हिं उणें ।
 तरि त्रिहित बा कोणें । बोलें भारी ॥ ९४० ॥
 वरि थोडें चि अमृत घेंतां । सर्वस्व वेचो कां पांडुसुता ।
 जेणें जोडे जीविता । अक्षयत्व ॥ ४१ ॥
 एर काह्या मोलें पुरुनु । विष पियावें घेउनु ।
 आत्महत्यासीं निमौनु । जाइजे जेणें ॥ ४२ ॥
 तौसिं जाचूनियां इंद्रियें । वेचौनियां आयुष्याचेनि दियें ।
 सांचिलीं पापियें आन आहे । दुःख वांचौनि ॥ ४३ ॥
 ह्मणौनि करावा चि स्वधर्म । जो करितां हीरौनि श्रमु ।
 उचित देईल परमु । पुरुषार्थराजु ॥ ४४ ॥
 या कारणें किरीटी । स्वधर्माची राहाटी ।
 न विसंबिजे संकटीं । सिद्धमंत्रु जैसा ॥ ४५ ॥
 कां नावेसि जैसें उदधी । महारोगीं दिव्योषधी ।
 न विसंभिजे तेया बुद्धी । स्वकर्म एथ ॥ ४६ ॥

असक्तबुद्धिः सर्वत्र जितात्मा विगतस्पृहः ।

नैष्कर्म्यसिद्धिं परमां संन्यासेनाधिगच्छति ॥ ४९ ॥

मग इया चि गा कपिध्वजा । स्वकर्माचिया महापूजा ।

तोखला ईशु तमरजां । झाडि करुनि ॥ ४७ ॥

सुधासत्वाचिया वाटा । आणि आपुली उत्कंठा ।

भवस्वर्गा कालकूटा । ऐसें दावी ॥ ४८ ॥

जियें वैराग्य एणें बोलें । मागां संसिद्धी रूप केलें ।

किंबहुना तें आपुलें । मेलवी खागें ॥ ४९ ॥

मग जीतलेयां हें भोए । पुरुषु सर्वत्र जैसा आहे ।

कां जाला ही जें लाहे । तें आतां सांगों ॥ ५० ॥

तरि दाहीक हें संसारें । सर्वें मांडिलेंसे जे गुंपिरें ।

तेथ नांतुडे वागुरे । वारा जैसा ॥ ५१ ॥

पैं परिपाकाचिये वेले । फल देंटें ना देतु फलें ।

तैसें स्नेह खुलें । सर्वत्र होए ॥ ५२ ॥

पुत्रवित्तकलत्र । हें जालेयां हिं स्वतंत्र ।

माझें न हसणे पात्र । विप्र चि जैसें ॥ ५३ ॥

ऐसा हे विषयजातीं । बुद्धि पोलिली जैसी माधुती ।

पाउलें घेंति एकांतीं । हृदयं चि रिंगे ॥ ५४ ॥

ऐसेया अंतष्करण । बाहियें येतां तेयाची आण ।

न मोडी समर्था भेण । दासि जैसी ॥ ५५ ॥

तैसी ऐक्याचिये मुठी । माझिवडें चित्त किरीटी ।

करुनि वेधी निहटी । आत्मेयाचां ॥ ५६ ॥

तेधवां दृष्टादृष्टस्पृहे । निमांतें जालें चि आहे ।

आगि दडपिलेयां धूर्वे । न्हाइजे काइ ॥ ५७ ॥

हणौनि निर्मले मानसिं । स्पृहा नाशौनि जाये आपैसी ।

किंबहुना तो ऐसी । भूमिका पावे ॥ ५८ ॥

पै अन्यथाबोधु आववा । मावलौनि तेया पांडवा ।
 बोधमात्रीं चि जीवा । ठावो होए ॥ ५९ ॥
 धारवणी वेचें सरे । तैसें भोगें प्राचीन पुरे ।
 नवे तवं नुपकरे । काहिं चि करुं ॥ ६० ॥
 तैसी कर्मसाम्यदशा । होये तेथ वीरेशा ।
 श्रीगुरु आपैसा । भेटे चि गा ॥ ६१ ॥
 रातिची चौपाहारी । वेचलेयां अवधारीं ।
 डोलेयां तमोरी । मिठे जैसा ॥ ६२ ॥
 कां एउनु फलाचा घडु । पारुखची केलिचा वाडु
 गुरु भेटौनि करी पाडु । मुमुक्षा तैसा ॥ ६३ ॥
 मग आलंगिला पूर्णिमां । उणीव सांडी चंद्रमा ।
 तैसें होये वीरोत्तमा । गुरुकृपा तेया ॥ ६४ ॥
 तेधवां अबोध मात्र असे । तें तवं तेया कृपा नासे ।
 तेथ रात्रीसवें जाये आपैसैं । आंधारें जैसैं ॥ ६५ ॥
 तैसें अबोधनासा सवें । नासे क्रियाजात आववें ।
 ऐसा समूल संभवे । संन्यासु हा ॥ ६६ ॥
 एणें समूलज्ञानसंन्यासैं । दृश्याचा ठाऊ जेथ पूसे ।
 तेथ बुझावें तें आपैसैं । तो चि आहे ॥ ६७ ॥
 चेडलेयां वरि पाहिं । स्वप्निचां तिये डोहीं ।
 आपणेयांतें काई । काढूं जाइजे ॥ ६८ ॥
 तें मीं नेगें आतां जाणैन । हें सरलें तेया स्वप्न ।
 जाला ज्ञातृज्ञेया विहीन । चिदाकाश जो ॥ ६९ ॥
 मुखाभासैं आरिसा । परौता नेलेयां वीरेषा ।
 पांतेपणें विण जैसा । पांत ठाके ॥ ७० ॥
 तैसें नेणणें जें गेलें । तेणें जाणणें हीं नेलें ।
 मग निष्क्रिय उरलें । चिन्मात्र चि ॥ ७१ ॥

तेथ स्वभावे धनंजया । नाहिं कोणहीं चि क्रिया ।
 हणौनि प्रवादु तेया । निष्कर्म्य ऐसा ॥ ७२ ॥
 ते आपुलें आपणपें । असतू चि होउनि आरोपे ।
 तरंगु कां वायुलोपें । समुद्रु जैसा ॥ ७३ ॥
 तैसें न होणें निफजे । नैष्कर्म्यसिद्धि हणिजे ।
 सर्वा हीं सिद्धी साहाजें । प्रेम हें चि ॥ ७४ ॥
 देउलिचिया कामा कलशु । परमु गंगे सिंधुप्रवेशु ।
 कां सुवर्णशुद्धी कसु । सोळांवां जैसा ॥ ७५ ॥
 तैसें आपुलें नेणगें । फेडिजे कां जाणगें ।
 तें हिं गीळनि जें असणें । ऐसी जे दशा ॥ ७६ ॥
 तिये परौतें काहिं । निफजणें एथ नाहिं ।
 हणौनि हणिपे पाहीं । परमसिद्धि ते ॥ ७७ ॥

सिद्धि प्राप्तो यथा ब्रह्म तथाप्नोति निबोध मे ॥
 समासेनैव कौंतेय निष्ठा ज्ञानस्य या परा ॥ ५० ॥

परि हे चि आत्मसिद्धि । जो कोणु भाग्यनिधि ।
 श्रीगुरुकृपालब्धीं । कालि पावे ॥ ७८ ॥
 उदैजतां दिनकर । प्रकाशु आते आंधार ।
 कां दीपा संगें दीपाकार । होये तंतु ॥ ७९ ॥
 ते लवणांची कणिका । मिलत खेळु उदका ।
 उदक चि होउनि देखां । ठाके जेवि ॥ ८० ॥
 कां निद्रितु चेवविलेयां । स्वप्नेसीं नीदे वायां ।
 जाउनि आपणपेयां । मिले जैसा ॥ ८१ ॥
 तैसिं जियां कोणहाचीं दैवें । गुरुवाक्यश्रवणां चि सर्वें ।
 द्वैत गीळनि विसंवे । आपणपेयां वृत्ति ॥ ८२ ॥
 तेयासि मग करणें । हें बोलिजैल चि कवणें ॥
 आकाशा एणें जाणें । होये काइ ॥ ८३ ॥

हणौनि तेयासि काहिं । त्रिशुद्धी करणें नाहिं
 परि ऐसैं हें जरि काहिं । नोहे जेया ॥ ८४ ॥
 कानावचनाचिये भेटी । सरिसा चि पै किरिटी ।
 वस्तु होउनि उठी । कव्हणी एकु जो ॥ ८५ ॥
 यन्हविं स्वकर्माचिया वन्ही । काम्यनिषेधाचां इंधनीं ।
 रजतमें किर दोन्हीं । जालिलीं आधीं ॥ ८६ ॥
 पुत्र वित्त परलोकु । ययां तिहींचा अभिलाखु ।
 घरिं होये पाइकु । हें इं जालें ॥ ८७ ॥
 इंद्रियें सदा पदार्थी । रिगतां विटाललीं होंतीं ।
 तियें प्रत्याहारतीर्थी । नाहाणिलि कीर ॥ ८८ ॥
 आणि स्वधर्माचें फल । ईश्वरीं अपौनि केवल ।
 घेउनि केलें अढल । वैराग्यपद ॥ ८९ ॥
 ऐसी आत्मसाक्षात्कारीं । लाभे ज्ञानाची उजिरी ।
 ते सामग्री किर पुरी । मेलविली ॥ ९० ॥
 आणि तिये चि समइं । सदुरु भेटले पाहीं ।
 तेविं चि तिहीं । राहिजे ना ॥ ९१ ॥
 परि औषध घेंत खेऊ । काइ लाभे आपुला थाऊ ।
 किं उदैजतां चि दीऊ । मध्यान होए ॥ ९२ ॥
 सुक्षेत्रिं आणि बोलटें । विं पेरिलें गोमटें ।
 परि अलोट फल भेटे । परि वेले पै गा ॥ ९३ ॥
 जोडला मार्गु प्रांजलु । मीनला सुसंगाचा मेलु ।
 तारि पाविजे वांचौनि वेलु । लागे चि किं ॥ ९४ ॥
 तैसा वैराग्यलाभु जाला । वरि सदुरु भेटला ।
 जीवा अंकुरु फूटला । विवेकाचा ॥ ९५ ॥
 तेणें ब्रह्म एक आथि । एर आघवी चि भ्रांति ।
 हे हीं किर प्रतीति । गाढी केली ॥ ९६ ॥

परि तें चि जें परब्रह्म । सर्वात्म सर्वोत्तम ॥
 मोक्षाचें हीं काम । सरे जेथ ॥ ९७ ॥
 इया तीन्हीं अवस्था पोटी । जिरविजें कां किरीटी ।
 तेया ज्ञानासि ही मीठी । दे जे वस्तु ॥ ९८ ॥
 ऐक्याचें ऐक्यपण सरे । जेथ अद्वयकणु हीं विरे ।
 काहिं चि तुरौनि उरे । जें कां हिं गा ॥ ९९ ॥
 तिये ब्रह्मां एकपणें । ब्रह्म चि होउनि असणें ।
 तें काम चि वारुनि तेणें । पाविजे पै ॥ १००० ॥
 भूकैलेया पासीं । उगारिलें षड्सीं ।
 तो तृप्ति प्रासीं । लाहे जेवि ॥ १ ॥
 तैसा वैराग्याचा उल्लास । विचाराचा तो दिवा ।
 आंबुधितां आत्मठेवा । काढी चि तो ॥ २ ॥
 तरि भोगिजे आत्मरिद्धि । यवडी योग्यतेची सिद्धि ।
 जेया आंगिं निरवधी । लेणें जाली ॥ ३ ॥
 तो जेणें क्रमें ब्रह्म । होणें करी कां सुगम ।
 तेया क्रमाचें आतां वर्म । आइक सांघों ॥ ४ ॥

बुद्ध्या विशुद्ध्या युक्तो धृत्यात्मानं नियम्य च ।
 शब्दादीन्विषयास्त्यक्त्वा रागद्वेषौ व्युदस्य च ॥ ५१ ॥
 तरि गुरु दाविलेया वाटा । एउनि विवेकतीर्थतटा ।
 धूनियां मलकटा । बुद्धिचा तेणें ॥ ५ ॥
 मग राहूनि उगलिली । प्रभा चंद्रें आलंगिली ।
 तैसी शुद्धी ते जडली । आपणपां बुद्धि ॥ ६ ॥
 सांडौनि कुळें दोन्हीं । क्रिया अनुसर कामिनी ।
 द्वंद्व्यागें स्वर्चितनीं । पडिली तैसी ॥ ७ ॥
 आणि ज्ञान ऐसें जिव्हार । नेवों नेति निरंतर ।
 इंद्रियिं पीकेलें थोर । शब्दादिक जें ॥ ८ ॥

तें रश्मिजाल काढिलेयां । मृगजल जाये लया ।
 तैसें धृतिरोखें तेया । पांचां हिं केलें ॥ ९ ॥
 नेणतां अधमाचें अन्न । खादलेयां कीजे वमन ।
 तैसीं बोकविलीं सवासन । इंद्रियें विषयीं ॥ १० ॥
 मग प्रत्यक्प्रवृत्ति चोखटे । गंगेचेनि लाविलीं तटें ।
 ऐसी प्रायश्चित्तें धोवटें । केलीं एणें ॥ ११ ॥
 पाठिं सात्विकें धीरें तेणें । शोधारिलीं तियें करणें ।
 मनसिं योगधारणें । मेळविलीं ॥ १२ ॥
 तेविं चि प्राचीन इष्टानिष्ठें । भोगेंसिं येउनि भेटे ।
 तेथ देखिलेयां हिं वोखटें । द्वेषु न करी ॥ १३ ॥
 ना गोमटें चि विपायें । तें आणूनि पुढां सुवे ।
 तारि तेया लागि नोहे । साभिलाखु ॥ १४ ॥

विविक्तसेवी लघ्वाशी यतवाक्कायमानसः ॥

ध्यानयोगपरो नित्यं वैराग्यं समुपाश्रितः ॥ ५२ ॥

इया परीं इष्टानिष्ठीं । रागद्वेष किरीटी ।
 त्यजूनि गिरिकपाटीं । निकुंजीं वसे ॥ १५ ॥
 गजबज सांडिलिया । वसत्री वनस्थलिया ।
 आंगाचिया मांदिया । एकलिया ॥ १६ ॥
 शमदमादिकिं खेले । न बोलणेंचि चोवळे ।
 गुरुवाक्याचेनि मेलें । नेणे वेळु ॥ १७ ॥
 आणि आंगा बल यावें । नातारि क्षुधा जावें ।
 कां जीभेचे पुरवावे । मनोरथ ॥ १८ ॥
 भोजन करितां विषीं । यां तिहींतें हीं न लेखी ।
 आहारिं मीति संतोषीं । माप सुथे ॥ १९ ॥
 आसनाचेनि पावकें । दुरपतां प्राणु पोखे ।
 येया चि लागि मोटकें । अशन करी ॥ २० ॥

आणि परपुरुषें कामिली । कुलवधू आंग न घली ।
 निद्रालस्य न मेकली । आसन तैसें ॥ २१ ॥
 दंडवताचेनि प्रसंगें । भुइं हान आंग लागे ।
 वांचौनि एर नेघे । रामस्य जेथें ॥ २२ ॥
 देहनिर्वाहा पुरतें । राहाटवी हातपायांतें ।
 किंबहुना आपैतें । सबाह्य केलें ॥ २३ ॥
 आणि मनाचा उंबरा । वृत्तीसि देखों नेदी वीरा ।
 तेथ कें वाग्व्यापारा । अवकाशु असे ॥ २४ ॥
 ऐसेन देहवाचामानस । हें जीणौनि बाह्य प्रदेश ।
 आकोलिलें आकाश । ध्यानाचें तेणें ॥ २५ ॥
 गुरुवाक्यें उटिला । बोधाचा निश्चयो आपुला ।
 नेहालीं हातीं घेतला । आरिसा जैसा ॥ २६ ॥
 पै ध्याता आपणपें चि परी । ध्यानरूपें वृत्ती माझारि ।
 ध्येयत्वे हे अवधारीं । ध्यानरूढि गा ॥ २७ ॥
 तेथ ध्यानध्येयध्याता । यां तिहिं एकरूपता ।
 होये तवं पांडुसुता । कीजे तें गा ॥ २८ ॥
 क्षणौनि तो मुमुक्षु । आत्मज्ञानीं जाला दक्षु ॥
 परि पुढां सूनि पक्षु । योगाभ्यासाचा ॥ २९ ॥
 अपानरंघ्रद्वया । माझारि धनंजया ।
 पारणी पीडूनियां । कांवरूमूला ॥ १०३० ॥
 आकुंचूनु अध । देउनि तीन्हीं बंध ।
 करूनि एकवद शुद्ध । वायुभेद ॥ ३१ ॥
 कुंडलिणी जागौनि । मध्यमा विकासौनि ।
 आधारादि भेदुनि । आज्ञा वेन्हीं ॥ ३२ ॥
 सहस्रदलाचा मेघु । पीयूखु वरिखौनि चांगु ।
 तो मूल वेन्हीं उग्यु । आणूनियां ॥ ३३ ॥

नाचतेया पुण्यगिरि । चिद्वैरवाचां खापरी ।
 मनपवनाचां खीचु करी । वाढूनियां ॥ ३४ ॥
 जालेयां योगाचा गाढा । मेलवा सून हा पुढां ।
 ध्याना मागिली कडां । स्वयंभ केले ॥ ३५ ॥
 आणि ध्यानयोग दोन्ही । इयें आत्मतत्त्वज्ञानी ।
 पैठि होआवेया निर्विघ्नी । आदीं चि तेणें ॥ ३६ ॥
 वीतराग तेया सारिखा । जोडूनि ठेविला सखा ।
 तो आघविया चि भूमिका । सर्वे चाले ॥ ३७ ॥
 पांचें तें दीसे तवं वेन्हीं । दीठितें न संडी दीपु जरि ।
 तारि कें असे अवसरी । देखावेया ॥ ३८ ॥
 तैसें मोक्षीं प्रवर्तलेयां । वृत्ति ब्रह्मी जाये लया ।
 तवं वैराग्य आधि तेया । भंगु कैचा ॥ ३९ ॥
 ह्मणौनि सर्वैराग्यु । ज्ञानाभ्यासु तो सभाग्यु ।
 करूनि जाला योग्यु । आत्मलाभा ॥ १०४० ॥
 ऐसी वैराग्याची आंगी । बाणूनियां वज्रांगी ।
 राजयोगतुरंगी । आरूढला ॥ ४१ ॥
 वरिपडिलें दीठी । सानें थोर ही निवटी ।
 ते बली विवेकमूठी । ध्यानांचे खांडे ॥ ४२ ॥
 ऐसेनि संसाररणा आंतु । आंधरीं सूर्यु तैसा असे जांतु ।
 मोक्षविजयश्रिये वरैतु । होआवेया ॥ ४३ ॥

अहंकारं बलं दर्पं कामं क्रोधं परिग्रहं ॥

विमुच्य निर्ममः शान्तो ब्रह्मभूयाय कल्पते ॥ ५३ ॥

तेथ आडवैरें चि आले । दोषवैरी जे घोपटिले ।
 तेयां माझि पहिलें । देहीं अहंकार ॥ ४४ ॥
 जो न मोकली मारुनि । जिवों नेंदी उपजौनि ।
 विचंबी खोडां घालुनि । हाडाचां इये ॥ ४५ ॥

तेयाचा देह हा थारा । मोडूनि घेतला वीरा ।
 आणि बल हा दुसरा । मारिला वैरी ॥ ४६ ॥
 जें विषयांचेनि नावें । चौगुणें हीं परि ठावें ।
 जीणें मृतावस्था धांवें । सर्वत्र जगा ॥ ४७ ॥
 तो विषयविषिचा थावो । आघवेयां दोषांचा रावो ।
 ध्यानखड्गाचा घाओ । साहील कैचा ॥ ४८ ॥
 आणि प्रियप्राप्ती । करी जेया सुखाची व्यक्ती ।
 तेयाची घाळनि बूथि । आंगीं जो वाजे ॥ ४९ ॥
 जो सन्मार्ग भुलवी । मग अधर्माचां अडवी ।
 सूनि वाघां सांपडवी । नरकादिकां ॥ १०५० ॥
 तो विश्वासें मारितां रिपु । निवट्टानि घातला दर्पु ।
 आणि जेयाचा आहा कंपु । तापसांसिं ॥ ५१ ॥
 क्रोधा ऐसा हा महादोखु । देख पां जेयाचा परिपाकु ।
 भरिजे तवं अधिकु । रिता होये जो ॥ ५२ ॥
 तो कामु कोण्हीं चि ठाई । नसे ऐसें केलें पाहीं ।
 किं तें चि क्रोधा ही । साहाजें जालें ॥ ५३ ॥
 मूलाचें तोडणें जैसें । होये कां शाखा दोसें ।
 कामें नासिलेनि नासे । तैसा क्रोधु ॥ ५४ ॥
 ह्यणौनि कामु वैरी । जाला जेथ ठाणौरी ।
 तेथ सरली वारी । क्रोधाची ही ॥ ५५ ॥
 समर्थु आपुला खोडा । सीसें वाहावी जैसा होडा ।
 तसा भुंजौनि गाढा । परिग्रहो ॥ ५६ ॥
 जो माथा चि पालाणवी । आंगा आवगु घालवी ।
 ममत्वाची घेववी । जिये दांडी ॥ ५७ ॥
 शिष्यशास्त्रादिविलामें । मठामुद्राचेनि मीसें ।
 घातले आहाति पांसें । निसंगां जेणें ॥ ५८ ॥

वरि कुटंबपणें सरे । तरि वनीं वनवें अवतरे ।
 नागिवेया ही शरीरें । लागला आहे ॥ ५९ ॥
 ऐसा दुर्जयो परिग्रहो । तेयाचा फेड्ढनि ठाउ ॥
 भवविजयाचा उत्साहो । भोगीतु असे तो ॥ १०६० ॥
 तेथ अमानित्वादि आघवे । ज्ञानगुणाचे जे मेलवे ।
 ते कैवल्यदेशिचे आघवे । राय जैसे आले ॥ ६१ ॥
 नव्हे सम्यग्ज्ञानाचिया । राणिवा उगाणूनि तेया ।
 परिवारु होउनियां । राहांति आपण ॥ ६२ ॥
 प्रवृत्तीचिये राजबीदी । अवस्थाभेदप्रमदीं ।
 कीजताये प्रतिपदीं । सुखाचें लोण ॥ ६३ ॥
 पुढां बोधाचिये कांवि वेन्हीं । विवेकु दृश्याची मांदी सारी ।
 योगभूमि आरतीकरी । यंति जैसिया ॥ ६४ ॥
 तेथ रिद्धीसिद्धीचीं अनेकें । वृद्धें मिलतें प्रसंगें ।
 तिये पुष्पवर्षी आंगें । नाहांतसे तो ॥ ६५ ॥
 ऐसें ब्रह्मैक्या सारिखें । स्वराज्य यंतां जवळिके ।
 झलंबित आहे हरिखें । तीन्ही लोक ॥ ६६ ॥
 तेधवां वैरी कां मैत्रिया । तेयासि माझें ह्मणावेया ।
 सन्माना धनंजया । उरे चि ना ॥ ६७ ॥
 हें ना भलेतेणें व्याजें । जो जेयातें ह्मणे माझें ।
 तें नोडवे चि मां दूजें । अद्वितीयु जाला ॥ ६८ ॥
 पै आपुलिया ऐकी सत्ता । सर्वें कवळनि पांडुसुता ।
 कहि न लगती ममता । धाडिली तेणें ॥ ६९ ॥
 ऐसा जीतलेयां रिपुवर्गु । आपु मानलेयां हा जगु ।
 आपैसेया योगतुरंगु । थीरु जाला ॥ १०७० ॥
 वैराग्याचें गाढलें । आंगीं त्राण होतें उभलें ।
 तें हिं नावेक ढिलें । केलें तेधवां ॥ ७१ ॥

आणि लोटी ध्यानाचें खाडें । तें दूजें नाहिं फुडें ।
 ह्मणौनि हातु आखुडे । वृत्तिचा ही ॥ ७२ ॥
 जैसैं रसोपध खरें । आपुलें काज करुनि पुरें ।
 आपण हिं उतरे । तैसें होतें ॥ ७३ ॥
 देखौनि टाकिता टाधो । धांवतां थिरावे पाउ ॥
 तैसा ब्रह्मसामीप्यें थावों । अभ्यासु सांडी ॥ ७४ ॥
 घडतां महोदधीसीं । गंगा वेगें सांडिजे जैसी ।
 कां कामिनी कंथा पासीं । मंथर होए ॥ ७५ ॥
 नाना फलतिए वेळे । केलिची वाढि मांडुले ।
 कां गावां पुढें वाले । मार्गु जैसा ॥ ७६ ॥
 तैसा आत्मसाक्षात्कार । होइल देखों गोचर ।
 ऐसा साधनहातियेरु । खलु चि ठेवी ॥ ७७ ॥
 ह्मणौनि ब्रह्मसिं तेया । ऐक्याचा समयो धनंजया ।
 होतसे तें उपाया । उहटु पडिला ॥ ७८ ॥
 मग वैराग्याची गोधुलुक । जें ज्ञानअभ्यासाचें वार्द्धक ।
 योगफलाची ही परीपाक - । दशा जे कां ॥ ७९ ॥
 ते शांति पै गा सुभगा । संपूर्ण ये तेयाचिया आंगा ।
 तें ब्रह्म होआवेया जोगा । होये तो पुरुष ॥ १०८० ॥
 पुनिवेहूनि चाउदसीं । जेतुलें उणेपण शशी ।
 कां सोलें पाहूनि जैसी । पन्हरावी वानी ॥ ८१ ॥
 सागरीं हीं पाणि वेगें । संचरे तें रूप गंगे ।
 येर निश्चल जें उगें । तें समुद्र जैसा ॥ ८२ ॥
 ब्रह्म आणि ब्रह्महोतिये । योग्यते तैसा पाडु आहे ।
 तें चि शांतिचेनि लाहें । होतें तो गा ॥ ८३ ॥
 पै तें चि होणेन विण । प्रतीती आलें ब्रह्मपण ।
 ते ब्रह्म होती जाण । योग्यता एथ ॥ ८४ ॥

ब्रह्मभूतः प्रसन्नात्मा न शोचति न कांक्षति ॥

समः सर्वेषु भूतेषु मद्भक्तिं लभते परां ॥ ५४ ॥

ते ब्रह्मभावयोग्यता । पुरुष मग तो पांडुसुता ।

आत्मबोधप्रसन्नता—। पदीं वैसे ॥ ८५ ॥

जेणें निफजे रससोए । तो तापु ही जैं जाए ।

तैं ते कां होए । प्रसन्न जैसी ॥ ८६ ॥

नाना भरतिया लगबगा । शरत्कालिं सांडिजे गंगा ।

कां गीत राहातां उपांगा । अहटु पडे ॥ ८७ ॥

तैसा आत्मबोधीं उद्यमु । करितां होये जो श्रमु ।

तो ही जेथ समु । होउनि जाए ॥ ८८ ॥

आत्मबोधप्रशस्ती । हे तिये दशेची क्षिति ।

ते भोगितसे महामती । योग्यु तो गा ॥ ८९ ॥

तेधवां अप्राप्तें शोचावें । काहिं कामावेया कामावें ।

हैं सरलें समभावें । भरतेया तेया ॥ १०९० ॥

उदया यंतां गभस्ती । नानानक्षत्रव्यक्ती ।

हारविजति दीप्ती । आंगिका जेवि ॥ ९१ ॥

तेवि उठितिया आत्मप्रथा । हे भूतभेदव्यवस्था ।

मोडितमोडितां पार्था । वास पाए तो ॥ ९२ ॥

पाटेया वरिलें आखरें । जैसिं पूसतें यंति करें ।

तैसीं हरपति भेदांतरें । तेयाचिया दीठी ॥ ९३ ॥

ऐसेनि अन्यथाज्ञानें । जियें घेपति जागरस्वप्ने ।

तियें दोन्हीं केलीं लीनैं । अव्यक्ता माझि ॥ ९४ ॥

मग तैं हिं अव्यक्त । बोधु वाढतां झिजत ।

पूर्णबोधीं समस्त । बुडौनि जाए ॥ ९५ ॥

नाना चालिचिया वाढी । वाट होंत थोडी ।

पातलां ठांडें बुडी । देउनि रिगे ॥ ९६ ॥

जैसी भोजनव्यापारी । क्षुधा जिरत अवधारी ।
 तृप्तिचां अवसरी । नाहिं होए ॥ ९७ ॥
 कां जागृति जवं उद्दीपे । तवं तवं नीद हारपे ।
 मग जागिनलेयां स्वरूपे । नसे चि गा ॥ ९८ ॥
 हें ना आपुलें पूर्णत्व भेटे । जेथ चंद्रासि वाढि कुंठे ।
 तेथ शुक्लपद्म आटे । निशेषु जैसा ॥ ९९ ॥
 तैसें बोध्यजात गीलितु । बोध बोधे ये मज आंतु ।
 मिसळला तेथ सांघातु । अबोधु गेला ॥ १०० ॥
 तेधवां कल्पांतिचिये वेले । नदी सिंधुचे पेंडवले ।
 मोडौनि भरे जलें । आब्रह्म जैसें ॥ १ ॥
 नाना गेलेयां घटमठ । आकाश ठाके एकवट ।
 कां जलौनि काष्ठें काष्ठ । वन्ही चि होए ॥ २ ॥
 नातारि लेणेयांचे ठसे । आटौनि गेलेयां मूसे ।
 नामरूपभेदे तैसें । सांडिलें सोनें ॥ ३ ॥
 हें हीं असो चेडलेयां । तें स्वप्न नाहिं जालेयां ।
 आपण चि कां आपणेयां । उरिजे जैसें ॥ ४ ॥
 तैसा मी एकु वांचौनि काहिं । तेया तेया ही सकट नाहिं ।
 हे चौथी भक्ति पाहीं । माझी तो लाहे ॥ ५ ॥

भक्त्या मामभिजानाति यावान्यश्चास्मि तत्त्वतः ॥
 ततो मां तत्त्वतो ज्ञात्वा विशते तदनंतरं ॥ ५५ ॥

येर आर्त्त जिज्ञासु अर्थी । हे भक्ति जिहीं पंथी ।
 ते तीन्ही पावौनि चौथी । ह्मणत आहों ॥ ६ ॥
 यन्हविं तीजी नां चौथी । हे पहिली नां सरती ।
 पै माझी सहजस्थिति । भक्ति नावं ॥ ७ ॥
 जें नेणतें माझे प्रकाशूनि । अन्यथात्वे मातें दाउनि ।
 सर्व ही सर्वी भजौनि । बुझावितसे ॥ ८ ॥

जो जेथ जैसैं पाउं बैसे । तिया तेथ तैसैं चि असे ।
 हें उजिवडें कां दीसे । अखंडें जेणें ॥ ९ ॥
 स्वप्निचें दीसणें न दिसणें । जैसैं आपुलेनि असिलेपणें ।
 विश्वाचें आहे नाही जेणें । प्रकाशे जैसैं ॥ १११० ॥
 ऐसा सहजु माझा । प्रकाशु जो कपिध्वजा ।
 तो भक्ति या उज्जा । बोलिजे गा ॥ ११ ॥
 ह्मणौनि आर्त्ताचां ठांड । हे आर्त्ति होउनि पाहीं ।
 अपेक्षणीय जें कांहि । तें मीं केलां ॥ १२ ॥
 जिज्ञासु पुढां वीरेषा । हे चि होउनि जिज्ञासा ।
 मी जिज्ञासु ऐसा । दाखविला ॥ १३ ॥
 हे चि होउनि अर्थना । मी चि माझां अर्थी अर्जुना ।
 करुनि अर्थाभिधाना । आणी मातें ॥ १४ ॥
 अथवा घेउनि अज्ञानातें । माझिया भक्ती जें हें वर्त्ते ।
 तें दावी मज द्रष्टेयातें । दृश्य करुनि ॥ १५ ॥
 एथ मुख चि दीसे मुखें । या बोला कांहि न चुके ।
 परि दूजेपण हें लटकें । आरिसा करी ॥ १६ ॥
 दीठी चंद्रू चि घे साचें । परि येतुलें हें तिभिराचें ।
 जें एक चि असे तेयाचें । दोनि दावी ॥ १७ ॥
 तैसैं सर्वत्र मीं चि मियां । देखतसैं भक्ती इया ।
 परि दृश्यत्व हें वायां । अज्ञानवसें ॥ १८ ॥
 तें अज्ञान आतां फीटलें । माझें दृष्टत्व मज भेटलें ।
 निजबिंबिं एकवटलें । प्रतिबिंब जैसैं ॥ १९ ॥
 पै जेधवां इ असे कीडाल । तेधवां इ सोनें चि अढल ।
 परि तें गेलेयां केवल । उरे जैसैं ॥ ११२० ॥
 हो कां पुनिवे आदिं कांहि । चंद्रिं सांधा चि नाहिं ।
 परि तिये दीं भेटे पाहीं । पूर्णता तेया ॥ २१ ॥

तैसा मी चि अज्ञानद्वारें । दीलें परि हस्तांतरें ।
 मग दृश्य तें सरे । मियां चि मीं लाभें ॥ २२ ॥
 ह्मणौनि दृश्य पंथा । अतीतु माझा पार्था ।
 भक्तियोगु चौथा । ह्मणितला गा ॥ २३ ॥
 येया ज्ञानभक्ती सहज । भक्तु एकवटला मज ।
 तो मी चि केवल तुज । श्रुत ही आहे ॥ २४ ॥
 जें उभूनियां भुजा । ज्ञानियां आत्मा माझा ।
 हें बोलिलों कपिध्वजा । सप्तमाध्याइं ॥ २५ ॥
 ते हे कल्पादिभक्ति मियां । भागवतमीपें ब्रह्मेयां ।
 उत्तम ह्मणौनियां । उपदेशिली ॥ २६ ॥
 ज्ञानिये इयेतें स्वसंवित्ति । ह्मणति शैव शक्ति ।
 आह्मीं परमभक्ति । आपुली ह्मणों गा ॥ २७ ॥
 हे मज मिलतिये वेले । तेयां क्रमयोगियां फळे ।
 मग समस्त ही निखलें । मियां चि भरे ॥ २८ ॥
 तेथ वैराग्य विवेकेंसी । आटे बंधु मोक्षेंसी ।
 वृत्ति तिया आवृत्तिसी । बुडौनि जाए ॥ २९ ॥
 घेउनि ऐलपणातें । परत्व हारपे जेथें ।
 गीद्वनि च्यान्ही भूतें । आकाश जैसें ॥ ११३० ॥
 तेया परीं साध्य— । साधनातीत शुद्ध ।
 तें मीं होउनि एकवद । भोगी तो माझे ॥ ३१ ॥
 घडौनि सिंधुचेया आंगा । सिंधु वरि तळपे गंगा ।
 तैसा पाडु तेया भोगा । अवधारिजो ॥ ३२ ॥
 कां आरसेयासि आरिसा । उट्टनि दाविला जैसा ।
 देखणां अतिसो तैसा । भोगणां तिये ॥ ३३ ॥
 चेइलेयां स्वप्न नासे । आपुलें ऐक्य चि दीसे ।
 तें दूजेन विण जैसें । भोगिजे कां ॥ ३४ ॥

हें असो दर्पण नेलेयां । तो मुखबोध ही गेलेयां ।
 देखिलेपण एकलेयां । आस्वादजे जेवि ॥ ३५ ॥
 तो चि जालेयां भोगु तेयाचा । न घडे हा भावो जेयांचा ।
 तें हि बोलें किर बोलाचा । उच्चार कीजे ॥ ३६ ॥
 तेयाचां नेणों गावीं । रवि प्रकाशे हान दिवी ।
 किं व्योमा लागि पडवी । उभिली तिहिं ॥ ३७ ॥
 हांगा राजत्व नव्हतां आंगि । रावो आपण काइ भोगी ।
 किं आंधार हान आलंगी । दिनकरातें ॥ ३८ ॥
 आणि आकाश जें नव्हे । तें आकाश काइ जाणावें ।
 रत्नाचां रूपिं मिरवे । गुंजांचें लेणें ॥ ३९ ॥
 ह्मणौनि मी होणें नाहिं । तेया मीं आहें कें हों ।
 मग भजेल हें काइ । बोलों किर ॥ ११४० ॥
 यया लागि तो क्रमयोगी । मी जाला चि मातें भोगी ।
 तारुण्य कां तरुणांगी । जिया परीं ॥ ४१ ॥
 तरंगु सर्वांगिं तोय चुंबी । प्रभा सर्वत्र विलसे बिंबिं ।
 नाना अवकाशु नर्मी । लुंठतु जैसा ॥ ४२ ॥
 तैसा रूप होउनि माझें । मातें क्रिया विण तो भजे ।
 घनाकार कां साहाजें । सेनेयातें जेवि ॥ ४३ ॥
 चंदनाची द्रुति जैसी । चंदनीं असे आपैसी ।
 कां एकत्र गर्भशशी । चंद्रिका ते ॥ ४४ ॥
 तैसी क्रिया किर न साहे । तन्हीं अद्वैतीं भक्ति आहे ।
 हें अनुभवा जोगें नोहे । बोला ऐसें ॥ ४५ ॥
 तेधवां पूर्वसंस्कारसंदें । जें काहिं तो अनुवादे ।
 तेणें आलविलेनि वो दें । बोलता मीं चि ॥ ४६ ॥
 बोलतेया बोलता चि भेटे । तेथ बोलिलें हें न घटे ।
 तें मौन तवं गोमटें । स्तवन माझें ॥ ४७ ॥

ह्यणौनि तेया बोलतां । बोलीं बोलता मीं भेटतां ।
 मौन होये तेणें तत्वता । स्तवी तो मातें ॥ ४८ ॥
 तैसैं चि बुद्धीं कां दीठी । जें देखों जाये तो किरीटी ।
 तें देखणेयां दृश्य लोटी । देखतें चि दावी ॥ ४९ ॥
 आरिसेया आदी जैसैं । देखतें चि मुख दीसे ।
 तेया तें देखणें तैसैं । मेलवी द्रष्टें ॥ ११५० ॥
 दृश्य जाउनियां दृष्टें । द्रष्टेयासी चि जें भेटे ।
 तैं एकलेपण न घटे । द्रष्टेपण हि ॥ ५१ ॥
 तेथ स्वप्निचिया प्रिया । चेउनि झोंबों गेलेयां ।
 ठाडजे दोन्हीं होउनियां । आपण चि जैसैं ॥ ५२ ॥
 कां दोन्ही काष्ठांचिया वृष्टी । माझि वन्हि जो एकु उठी ।
 तो दोनि हे भाष आटी । आपण चि होए ॥ ५३ ॥
 नाना प्रतिबिंब हाति । घेउं गेलेयां गभस्ती ।
 बिंबता ही थिती । जाये जैसी ॥ ५४ ॥
 तैसा मी होउनि देखतें । तो घेउं जाये दृश्यातें ।
 तेथ दृश्य नेथिलें तें । दृष्टत्व ही ॥ ५५ ॥
 रवी आंधारु प्रकाशितां । नुरे चि जेवि प्रकाश्यता ।
 तेवि दृश्या नाहिं दृष्टता । मी जालेयां ॥ ५६ ॥
 मग देखिजे कां नेदखिजे । ऐसी जे दशा निफजे ।
 तें तें दर्शन माझें । साचोकारें ॥ ५७ ॥
 तें भलेतेया किरीटी । पदार्थाचिया भेटी ।
 दृश्यादृश्यातीता दृष्टी । भोगी तो सदा ॥ ५८ ॥
 आणि आकाश हें आकाशें । दाटलें न ढले जैसैं ।
 मियां आपणपेनि तैसैं । जालें तेया ॥ ५९ ॥
 कल्पांतिं उदक उदकें । रुंधलेयां वाहो ठाके ।
 तैसैं आत्मेनि मियां एकें । कोंदला तो ॥ ११६० ॥